

2 ካኦቶ ማፃኣፖ ዓይያ ካር

ለምዓሳ ካኦቶ ማፃኣፖ ቤርታሳ ካኦቶ ማፃኣፖ ሃይሶ ኬኤዚ ዓቁሴሰካፓ ዓርቃያ ዒሰራዔኤሌ ዓጮኮ ለምፆ ካኦቶ ዛሎ ኬኤዛኔ፤ ሃና ማፃኣፓ ለምፆ ዴኤፒ ዴኤፒ ቤሲ ፓቁንታኒ ዳንዳዓኔ፡-

1. ኪሪሰቶሴ ሾይንታንዳሂኮ ቤርታ ታዞጳሳ ጃኤቶ ሌዖኮ ሄካሰካፓ ዴንዲ ሳማሪያ ካታሞኮ ሻሂንቲያና ኪሪሰቶሴ ሾይንቶኮ ቤርታ ለንካይ ጃኤታና ለማታሚ ለምፆ ለዔ ሄላንዳኦና ጌይፆ፡- ኬዶ ዛሎ ካኦቶ ሎኦሚያ ሄላንዳኦና ዓኣ ለምፆ ካኦቶ ሃይሶ፤

2. ዒሰራዔኤሌ ካኦቶ ጌይፆ፡- ኬዶ ዛሎ ካኦቶኮ ሎኦሚያፓ ዓርቃያ ዴንዲ ኪሪሰቶሴ ሾይንታንዳሂኮ ቤርታ ዶንጎ ጃኤታና ሳሊታሚ ላሃሳ ሌዖ፡ ካኦቲ ናቡካዳናፆሬ ዩሩሳላሚ ያሊ ባሺ ዓርቁ ሻሄሂ ሄላንዳኦና ካኦታፎ ዪሁዳ ካኦቶ ዛሎ ሃይሶ፤

ጌዳሊያ ጎሮሂ ባብሎኔ ካኦቲ ዴማ ማዒ ዪሁዳ ዓጮ ዎይሃያ ማዔሂንታ ዪሁዳ ካኦቲ፡ ዮዓኪኔ ባብሎኔይዳ ቱኡዞ ማኣራፓ ቡሊንቲ ኬሰኬሂ ዛሎ ማፃኣፔላ ፓይዲ ፓይዲ ኬኤዜሰካፓ ሃሻኔ።

ዩይ ቢያ ፑርቶ ባካ ዒሰራዔኤሌ ዓሶ ሄላኒ ዳንዳዔሂ ዪሁዳና ዒሰራዔኤሌ ዓጮናኮ ካኦቶንታ ዴርንታ ያኦሲም ጉሙርቁንቱዎያ ማዔሂርኬ፤ ዩሩሳላሚኮ ሻሂንቲያና ዪሁዳ ዓጮ ዴር ባኣካፓ ባሺሂ ዓጮፓ ዳውሲንቲፆ ዒሰራዔኤሌ ዓሶ ዛሎ ኬኤዚንታ ሃይሳ ዲማዳንዳጉዲ ማሄ ባኮኮ ዴኤፖ ዴኤፖኬ።

ለምዓሳ ካኦቶ ማፃኣፖ ጋራ ኮሺ ዔርቲያ ማዔ፡ ያኦሲ ማሊያ ኬኤዛ፡ ዔኤሊያሴ ቤዛ ኬሰኬሂ ዔልሳዒኬ።

ማፃኣፔላ ዲማ ዲማ ዓርቁ ባኮ

ለምፆ ፓቁንቲ ካኦቶ (1:1—17:41)

- 1. ያኦሲ ማሊያ ኬኤዛ ዔኤሊያሴ ዛሎ (1:1—8:15)
- 2. ዪሁዳና ዒሰራዔኤሌ ዓጮና ካኦቶ (8:16—17:4)
- 3. ሳማሪያኮ ሎኦሚያ (17:5-41)

ዪሁዳ ዓጮ ካኦቶ (18:1—25:30)

- 1. ሂዚቂያሴፓ ዴንዲ ዒዮሲያሴ ሄላንዳኦና (18:1—21:26)
- 2. ዒዮሲያሴ ዎይሄ ዎይሂያ (22:1—23:30)
- 3. ጋፒንሂ ማዔ ዪሁዳ ዓጮ ካኦቶ (23:31—24:20)
- 4. ዩሩሳላሚኮ ሎኦሚያ (25:1-30)

ጾኑ ማሊያ ኬኤዛ ዔኤሊያሴና ካኣቲ ዓካዚያሴና

1 ዒሰራዔኤሌ ዓጮኮ ካኣቲ፣ ዓክዓቤ ሃይቄሰካፓ ሞዓኣቤ ዓሳ ዒሰራዔኤሌ ዓሰሞ ዋይዚ ዒጭ።

2 ዒማና ዒሰራዔኤሌኮ ካኣቲ፣ ዓካዚያሴ ሳማሪያይዳ ካኣቲሞ ማኣሮኮ ዑፃ ኮሾና ቤዛፓ ኬዲ ሎኦሚ ሃርጊ ዓኣኔ፤ ዬያሮ ዒዚ፡- «ሃይ ሃርጋ ታና ዋዳንዳቲያ ዓይሳንዳቲያ ፒሊሰጫሜይዳ ዓኣ ዔክሮኔ ካታሞ ጾኣዛሢ፣ ቢዔልዜቡሉ ታኣሞ ጾኦጪ ሙኩዋቲ» ጌይ ኪኢታ ዓሲ ዳኬ።

3 ጋዓንቲ ናንጊና ናንጋ ጎዳኮ ኪኢታንቻሢ ቲሲቤ ዓጮ ዓሢ፣ ዔኤሊያሴሞ፡- «ዔቂጋፓ ሳማሪያ ዓጮ ካኣቲ፣ ዓካዚያሴ ዳኬ ኪኢቶ ዓሰንሢና ካኣማኒ ዳንዴ፤ ዔያቶሞ ሂዚ ጌዔ፡- «ዔክሮኔ ካታሞ ጾኣዛሢ፣ ቢዔልዜቡሉ ዒንሢ ጾኦጪ ዳንዳሢ ዒሰራዔኤሌ ዓጮይዳ ጾኦሲ ባኣሴ ጌይዳ»

4 ዬያሮ ናንጊና ናንጋ ጎዳ፡- «ሃይሾ፣ ሃሢ ኔ ሃይቃንዳኔ፤ ዳቃዓኬ! ኔ ላሂ ቤዛፓኣ ዔቃዓኬ! ጌዔኔ ጎዑዋቲ» ጌይ ዓይሢ።

ናንጊና ናንጋ ጎዳ ዒዛ ዓይሢ ጎይ፣ ዔኤሊያሴ ማዳኔ፤

5 ዬካፓ ዬንሢ ኪኢቶ ዓሰንሢ ማዒ ካኣቲ ኮይላ ሙካዛ፣ ካኣቲ፡- «ዋይቲሞ ዒንሢ ማዒ ሙኬይ?» ጌይ ጾኦጪ።

6 ዔያታ ዒዛሞ፡- «ፔቲ ዓሲ ጎይ፣ ኦኡና ካኣሚ ኔ ባንሢ ማዒ ኦ ሙካንዳጉዲ፤ ሃሃ ናንጊና ናንጋ ጎዳኣ ኔ ዛሎ ጌዔ ባኮ ኔኤሞ ኦ ኬኤዛንዳጉዲ ኦና ዓይሢ፤ ዒዚ ኦኡሞ ኬኤዜ ጎይ፣ ሂዚኬ፡- «ዔክሮኔ ካታሞ ጾኣዛሢ፣ ቢዔልዜቡሉ ጾኦጪ ኪኢቶ ዓሰ ኔ ዳኬሢ ዓይጎሮዳይ? ዒሰራዔኤሌይዳ ጾኦሲ ባኣሴ ጌዒዳ? ዬያሮ ኔኤኒ ሃይቃንዳኔ! ሃርጋፓ ኔ ፖዒንዳሞሴ! ላሂ ቤዛፓኣ ኔ ዔቃዓኬ!» ጌዔ።

7 ዬካፓ ካኣቲ፡- «ጎይ፣ ዒንሢና ካኣሚ ዬያ ጌዒ ኬኤዜሢ ዋዚጉዳ ዓሲዳይ?» ጌይ ዔያቶ ጾኦጪ።

8 ዔያታ ማሃ፡- «ቆልሞ ጋፓኔፓ ኮሾና ማኣ፣ * ማይንቲ ኬርና ቃልሾ ቱኪ ዓኣኔ» ጌዔ።

ካኣቲ ዒማና፡- «ዬይ ዔኤሊያሴዋይ!» ጌዔ።

9 ዬካፓ ካኣቲ ፔቲ ፖኦሊሶኮ ሱኡጌሰኬያ ደንጊታሚ ዓሲና ዋላ ዴንዲ ዔኤሊያሴ ዔኪ ሙካንዳጉዲ ዓይሢዛ፣ ዔኤሊያሴ ፔቲ ጌሚሪዳ ኬሰኪ ዴዒ ዓኣንቲ ዬይ ሱኡጋሢ ዳንቃ፡- «ጾኦሲ ዒሢዮ! ካኣቲ ኔና ሃይካፓ ኬዲ ዒዛ ኮይላ ሙኩሞ ጌይ ዓይሢ።» ጌዔ።

* 1:8 ቆልሞ ጋፓኔፓ ኮሾና ማኣ፣ ጋዓዛ፡- ፔቲ ፔቲ ማፃአፓ «ዓሢኮ ዑፃ ጋፓኔና» ጋዓ።
1:8 ማቲ. 3:4፤ ማር. 1:6።

10 ዔኤሊያሴ ዒማና፡- «ታኣኒ ፆኦሲ ዓሲ ማዔቴ ጫሪንጫፓ ታሚ ኬዲ ኔናንታ ደንጊታሞ ኔ ዓሶንታ ሙዖንጎ!» ጋዓዛ፣ ቤዘማና ታሚ ኬዲ ዬያ፡ ፖኦሊሶኮ ሱኡጋሢና ደንጊታሞ ዓሶና ሙዔቴ።

11 ካኣቲ ሃሣ ላሚ ሜሌ ፖኦሊሶኮ ሱኡጋሢና ደንጊታሚ ዓሶና ዋላ ዳኬኔ፤ ዒዚያ ዔኤሊያሴ ኮይላ ሙካዮ፡- «ፆኦሲ ዓሢዮ! ካኣቲ ኔና ሃሣ ዒዛ ኮይላ ሙኮም ጌይ ዓይሣኔ» ጌዔ።

12 ዔኤሊያሴ ጊንሣ ሃሣ፡- «ታኣኒ ፆኦሲ ዓሲ ማዔቴ ታሚ ጫሪንጫፓ ኬዲ ኔናንታ ደንጊታሞ ኔ ዓሶንታ ሙዖንጎ!» ጌዔ። ዬያሮ ቤዘማና ፆኦሲ ታሚ ጫሪንጫፓ ኬዲ ፖኦሊሶ ሱኡጋሢና ደንጊታሞ ዓሶና ሙዔቴ።

13 ሃሣ ካኣቲ ደንጊታሚ ዓሶና ዋላ ፖኦሊሴ ሱኡጋሢና ዳኬኔ፤ ዬና ሃይሣሲኬ፤ ዬይ ሱኡጋሢ ጋዓንቴ ጌሜሮ ኬሰካዮ ዔኤሊያሴ ኮይላ ጉምዓቲ፡- «ፆኦሲ ዓሢዮ! ታናንታ ታኣና ዋላ ዓኣ ዓሶንታሞ ሚጨንቲ ኑና ማኣሬ! ሸምፓሢ ኑኡኮ ዓይሴ!

14 ፖኦሊሶ ሱኡጎ ላምዖንሢና ዔያቶኮ ዓሶና ዋላ ቢያ ጫሪንጫፓ ታሚ ኬዲ ሙዔቴ፤ ታና ጋዓንቴ ሚጨንቲ ሃዳራ ማኣሬ!» ጌይ ዔኤሊያሴ ሸኢቁ።

15 ናንጊና ናንጋ ጎዳኮ ከኢታንቻሢ ዔኤሊያሴ ኮይላ፡- «ዒዛና ዋላ ኬዳ፤ ፔቲታዮ ዒጊጨፖ» ጌዔ። ዬያሮ ዔኤሊያሴ ዬያ፡ ፖኦሊሶ ሱኡጋሢና ዋላ ካኣቲ ኮይላ ኬዳዮ፡-

16 «ናንጊና ናንጋ ጎዳ ሂዚ ጋዓ፤ ሲሰራዔኤሌ ዓጮይዳ ፆኦሲ ባኣያ ማሂ ዔክሮኔ ካታሞ ፆኦዛሢ፤ ቢዔልዜቡሌ ኮይላ ፆኦጫንዳጉዲ ከኢታ ዓሲ ኔ ዳኬሢሮ ሃይቃንዳ፤ ኔኤኒ ዳቂንዳዋሴ!» ጌዔ።

17 ናንጊና ናንጋ ጎዳ ዔኤሊያሴ ዛሎና ኬኤዜ ጎይዖ ዓካዚያሴ ሃይቁ፤ ዒዛኮ ዓቲንቁ ናይ ባኣሢሮ ዒዛ ቤዛ ዒዛኮ ጌርሲ፤ ዒዮራሜ ካኣታዳ፤ ዬይ ያዲ ማዔሢ ዒዮሳፒዩ ናኣዚ፤ ዒዮራሜ ዪሁዳይዳ ካኣታዳንቴ ላምዓሳ ሌዖናኬ።

18 ካኣቲ፡ ዓካዚያሴ ማዳ ሜሌ ባካ ቢያ ዒሰራዔኤሌኮ ካኣቶ ሃይሳ ፆኦፒንታ ማፃእፖይዳ ፆኦፒንቲ ዓኣ።

2

ዔኤሊያሴኮ ሌካ ጫሪንጫ ዔውቲዖ

1 ናንጊና ናንጋ ጎዳ ዔኤሊያሴ ዓልጎ ዠባሪና ሌካ ጫሪንጫ ዔካንዳ ዋዳ ሃላዛ፡ ዔኤሊያሴና ዔልሳዒና ጌልጌላፓ ዔቂ ዳንዳ፤

1:12 ሉቃ. 9:34።

2 ዔያታ ዴንዳ ጎይሣ ዓአንቴ ዔኤሊያሴ ዔልሳዒ ኮይላ፡- «ኔኤኒ ሃይካ ዴዔ፤ ታኣኒ ቤኤቴኤሌ ዴንዳንዳጉዲ ናንገና ናንገ ጎዳ ታና ዓይሣኔ» ጌዔኔ።

ዔልሳዒ ጋዓንቴ፡- «ናንገና ናንገ ጎዳ ሃይቆ! ፔቴታዎ ታኣኒ ኔ ጌዳፓ ዲማዳዓኩ!» ጌዔኔ፤ ዬያሮ ዔያታ ዎላ ቤኤቴኤሌ ዴንዴ።

3 ዖኦሲ ማሊዎ ኬኤዛያታዎ ዒኢካ ናንገ ዓሳ ዔልሳዒ ኮይላ ሙካዎ፡- «ናንገና ናንገ ጎዳ ሃሮ ኔ ጎዳሣ ኔ ኮይላፓ ዲማሲ ዔካሣ ኔኤኒ ዔራ?» ጌይ ዖኦጮኔ።

ዔልሳዒ ዒማና፡- «ሂዮ፣ ታ ዔራኔ፤ ጋዓንቴ ዬያ ታኣሞ ኬኤዚ ሺሪፖቴ!» ጌዔኔ።

4 ዬካፓ ሃሣ ዔኤሊያሴ ዔልሳዒ ኮይላ፡- «ኔኤኒ ሃይካ ዴዔ፤ ታኣኒ ዒያሮኮ ዴንዳንዳጉዲ ናንገና ናንገ ጎዳ ታና ዓይሣኔ» ጌዔኔ።

ዔልሳዒ ጋዓንቴ፡- «ናንገና ናንገ ጎዳ ሃይቆ! ፔቴታዎ ታኣኒ ኔጌዳፓ ዲማዳዓኩ!» ጋዓዛ፣ ዎላ ዔያታ ዒያሮኮ ዴንዴ።

5 ዬሮ ዓጮይዳ ናንገ፣ ዖኦሲ ማሊዎ ኬኤዛ ዓሳ ዔልሳዒ ኮይላ ሃሣ ሙካዎ፡- «ናንገና ናንገ ጎዳ ሃሮ ኔ ጎዳሣ ኔ ኮይላፓ ዲማሲ ዔካሣ ኔኤኒ ዔራ?» ጌይ ዖኦጮኔ።

ዔልሳዒ ዒማና፡- «ሂዮ፣ ታ ዔራኔ፤ ጋዓንቴ ዒንሣ ታኣሞ ኬኤዚ ኬኤዚ ሺሪፖቴ» ጌዔኔ።

6 ዬካፓ ዔኤሊያሴ ዔልሳዒ ኮይላ፡- «ኔኤኒ ሃይካ ዴዔ፤ ታኣኒ ዮርዳኖሴ ዎሮ ዴንዳንዳጉዲ ናንገና ናንገ ጎዳ ታና ዓይሣኔ» ጌዔኔ።

ዔልሳዒ ጋዓንቴ፡- «ናንገና ናንገ ጎዳ ሃይቆ! ፔቴታዎ ታ ኔጌዳፓ ዲማዳዓኩ!» ጋዓዛ፣ ዔያታ ዎላ ጎይዖ ዴንዴ።

7 ዒማና ዖኦሲ ማሊዎ ኬኤዛ ዓሳ፣ ደንገታሚ ዓሲ ዔያቶ ገንዖ ዮርዳኖሴ ዎሮ ዴንዴ፤ ዔኤሊያሴና ዔልሳዒና ዎሮ ዓጮ ሙካዎ ዔቁኔ፤ ዖኦሲ ማሊዎ ኬኤዛ፣ ደንገታሞ ዓሳንሣ ጋዓንቴ ዔያቶ፣ ዳካ ሃኬ ዔቁኔ፤

8 ዬካፓ ዔኤሊያሴ ፔኤኮ ዴኤፖ ኮኦቶ ኬሲ ዔኪ ዎኣዎ ዒዛና ጳርቁኔ፤ ዎኣዎ ዬማና ላምዎ ፓቁንቴም ዔኤሊያሴና ዔልሳዒና ዎሮ ዖኦሲ ፒንቁኔ፤

9 ዒኢካ ዔኤሊያሴ ዔልሳዒ ኮራ፡- «ታ ኔ ኮይላፓ ዔውታንዳሢኮ ቤርታ ታ ኔኤም ዓይጎ ዎደንዶቴያ ታኣሞ ኬኤዜ» ጌዔኔ።

2:9 ላሚ. ዎም 21:17።

ዔልሳዒ ዒማና፡- «ኔ ቤዛ ማዲያ ታና ማሃኒ ዳንዳዒ ዒያኖ ጳንጩ ማሂ * ታአም ዒንጌ» ጌዔኔ።

10 ዔኤሊያሱ፡- «ኔኤኒ የኦጩ ባካ ዳኤሢ ባአዚኬ፤ ጋዒንቴ ታአኒ ኔ ኮይላፓ ዲማዲ ጩሪንጩ ዔውታአና ኔ ታና ዳንቁቴ ኔኤኒ የኦጩ ባኮ ዔካኒ ዳንዳዒ፤ ኔ ታና ዳንቁባአቴ ኔ ዔካዒኬ» ጌዔኔ።

11 ዬያ ጌዒ ዔያታ ጌሰቲ ጌሰቲ ጎይቦ ዳንዳንቴ ታሚ ፓራ ጎቻ፡ ታሚ ሳርጌላ የይታ ዔያታ ዔሩዋንቴ ባአኮ ዔያቶኮ ጌሊ ለምዒሢ ዲማሴኔ፤ ዬማና ዒልጎ ዠባሬና ሌካ ጩሪንጩ ዔኤሊያሱ ዔውቴኔ።

12 ዔልሳዒ ዬያ ቢያ ዛጋዖ፡- «ዒሰራዔኤሌ ዒሶኮ ሳርጌሎ የይቶና ፓራሢና ማዔ፤ ታ ዒደሢያ! ታ ዒደሢያ!» ጌዒ ዔኤሊያሱ ባንሢ ዒላቴኔ፤ ዬማፓ ዒዚ ዔኤሊያሱ ላሚ ዳንቁባአሱ።

ዔልሳዒ ዒማና ሚርጌና የዬሢሮ ማአዒሢ ፔኤኮ ዳርዘዛ ላምዖ ቤሲ ፓቁንቲ ዳርዔኔ፤

13 ዬካፓ ዒዚ ዔኤሊያሱኮ ሳዒ ኬዳ፡ ዳኤፖ ኮኦቶ ዔኪ ዳንዳዖ የርዳኖሴ ዋሮ ዒጫ ሙኪ ዔቁኔ።

14 ዬያ ኮኦቶና ዒዚ ዋአቦ ጳርቃዖ፡- «ናንጊና ናንጋ ጎዳ ማዔ ዔኤሊያሱ የኦዘሢያ! ኔ ዋካዳይ?» ጌዔኔ፤ ዬካፓ ላሚ ዋአቦ ዒዚ ጳርቃዘ ዋአቦ ፓቁንቴም ዒዚ ሶ ሱኮ ፒንቁኔ፤

15 ዒያርኮፓ ሙኬ፡ የኦሲ ማሊቦ ኬኤዘዘንሢ ዒዛ ዛጋዖ፡- «ዔኤሊያሱም የኦሲ ዒንጌ ዒያኖ ዋልቃ ዒልሳዒም ዒንጊንቴ!» ጋዒዖ፡ ዒዛ ኮይላ ሙኪ ቦንቾ ዔኤሊሢ ዔኤሊ፡-

16 «ሃይሾ! ሃይካ ዶዲ ዶዲ ደንጊታሚ ዒሲ ኦኡኮ ዒአኔ፤ ዔያታ ዳንዲ ኔ ጎዳሢ ኮዖንጎ፤ ናንጊና ናንጋ ጎዳኮ ዒያና ጎዖንቴ ዒዛ ዔኪ ፔቴ ዲካይዳ፡ ሃንጎ ዶኦቹዳ ጌሢያናንዳኔ» ጌዔኔ።

ዔልሳዒ ጋዒንቴ፡- «ዔይዔ፡ ዔያቶ ዳኪፖቴ» ጌዔኔ።

17 ዔያታ ጋዒንቴ ዒዚ ዒፃንዳሢኮዋ ካራ ባይዚ ሺኢቁሢሮ ዒዚ ዔኤዒዛ ደንጊታም ዒሳ ዳንዲ ሃይሦ ኬሊ ጉቤ ኮዒዖ ዔኤሊያሱ ዳንቃኒ ዳንዳዒባአሱ፤

18 ዬካፓ ዒያርኮይዳ ዳዒ ዔያቶ ካፓ፡ ዔልሳዒ ኮይላ ማዒ ሙኬኔ፤ ዔልሳዒ ዒማና፡- «ታ ዒንሢ «ዳንዲፖቴ» ጌይባይ?» ጌዔኔ።

ዔልሳዒ የኦሲ ዋልቆና ማዳ ዲቃሢ ሄርሺሳ ባኮ

* 2:9 ጳንጩ ማሂ ጋዒዙ፡ ዔልሳዒ ጌዒሢ ዔኤሊያሱ ማዳ ማዳ ጳንጩ ማሂ ማዳኒቱዋንቴ ዒሰራዔኤሌ ዒሶ ዳምቦና ቶይዶ ናኦቶም ማዳኒታሢጉዲ ዬያ ማዳ ዔኪ ማዳኒኬ፤ (ላሚ. ዋማ 21:17 ዛጌ።) 2:12 2ካእቶ. ማ 13:14።

19 ዲያርኮይዳፓ ደካ ዓሲ ዔልሳዒ ኮይላ ሙካዖ፡- «ኑ ጎዳሢዮ! ኔ ዔራሢፕዲ ሃና ካታሚላ ናንጊም ኮሺኬ፤ ጋዓንቴ ዋእፃ ፑርቴሢሮ ኑኩኮ ላኣሎ ቡሊሲ ባሺኔ †» ጌዔኔ።

20 ዬያሮ ዔልሳዒ፡- «ዓኪ ዖቲዳ ሶኦጌ ዋሃ ታኣም ዔኪ ሙኩዋቴ» ጌይ ዓይሣዛ፡ ዒዚ ዓይሣ ጎይዖ ዔያታ ዔኪ ሙኬኔ።

21 ዬካፓ ዒዚ ዋእፃ ዓልቃ ቤዜሎ ዔኪ ዓኣዲ ሶኦጎ ዋኣዖይዳ ዋሃዖ፡- «ናንገና ናንጋ ጎዳ ሂዚ ጋዓኔ፤ ታኣኒ ሃያ ዋእፃ ጌኤሺኔ፤ ሃይካፓ ሴካ ዋዳያና ዓሲ ቡሊሳያና ማዓዓኬ» » ጌዔኔ፤

22 ዔልሳዒ ጌዔሢፕዲ ዬማፓ ዓርቃዖ ዋእፃ ጌኤሺ ማዔኔ፤

23 ዔልሳዒ ዒማና ዒያርኮፓ ቤኤቴኤሌ ዓኣዳንቴ ጎይዖይዳ ቤኤቴኤሌ ካታማፓ ሙኬ ሚርጌናይ ኬሰኪ ዑኡዞ ፔኤኮ ደገዲ፡- «ሃይ ኔ ባላሢ ሃይ፡ ሃይፓ ዴንዲ ባይቄ!» ጌይ ጌይ ዒዛይዳ ዒሳቴኔ።

24 ዔልሳዒ ዒማና ናኣቶ ባንሢ ሺሪ ዛጋዖ ናንገና ናንጋ ጎዳ ሱንዖና ዔያቶ ጋዳንቄኔ፤ ዬያሮ ዲቤ ጌይንታ ላምዖ ዒንዴ ቦዖ ካያፓ ኬሰኪ ዬያቶ ናኣቶ ባኣካፓ ዖይዲ ታሚ ላምዖ ናይ ዳይ ሚንሣኔ።

25 ዬካፓ ዔልሳዒ ቄርሜሎሴ ዲኮ ኬሰኬኔ፤ ዒኣካ ደካ ዴዓሰካፓ ሳማሪያ ካታሞ ማዒ ዒ ዴንዴኔ።

3

ዒሰራዔኤሌ ዓሶና ሞዓኣቤ ዓሶና ዋሊ ዖሌ ዖሎ

1 ዪሁዳ ካኣቲ፤ ዒዮሳፒጂ ካኣታዴንቴ ታጳ ሳላሳ ሌዖና ዓክዓቤ ናኣዚ፤ ዒዮራሜ ዒሰራዔኤሌይዳ ካኣታዴኔ፤ ዒዚ ዒማና ሳማሪያይዳ ናንጊ ታጳ ላምዖ ሌዔ ዋይሣኔ፤

2 ዬካፓ ዒዚ ጎሜ ማዲ ናንገና ናንጋ ጎዳ ዖዪሴኔ፤ ያዲ ማዔቴያ ዒዚ ዒዛኮ ዓዶና ዒንዶ፤ ዔልዛቤሎናፕዲ ፑርታ ዓሲቴዋሴ፤ ባዓኣሌ ጌይንታ ሜሌ ዖኦዞ ካኣሽካኒ ዒዛኮ ዓዴ ኮሺ ባኮ ዒ ባይዜኔ፤

3 ያዲ ዒ ማዴያታዖ ዒዛኮ ቤርታ ካኣታዲ ዒሰራዔኤሌ ዓሶ ጎሜይዳ ዔኪ ጌልዜ፤ ናባጃ ናኣዚ፤ ዒዮርቢዓሜ ካኣሽካ ባኮ ካኣሽኬኔ፤ ዬያ ባይዚባኣሴ።

4 ዒማና ሞዓኣቤ ካኣቲ፤ ሜሻዔ ማራይ ቆላያኬ፤ ዒዚ ሌዓ ሌዓ ፔቴ ጃኤታ ሺያ ዓዴ ማራናይንታ ፔቴ ጃኤታ ሺያ ማራይኮ ጋፓኔ ዒሰራዔኤሌ ካኣቲሞ ገኢራራ፤

† 2:19 ኑኩኮ ላኣሎ ቡሊሲ ባሺኔ ጋዓዞ፡- ፔቴ ፔቴ ማፃአፓ «ሃኣኮ ኑኩኮ ዔቂሲ ዓይሳያ ማዔኔ» ጋዓኔ።

5 ጋዓንቲ ዲሰራዔኤሌኮ ካአቲ፣ ዓክዓቤ ሃይቃዛ ሞዓኣቤ ካአቲ፣ ማሻዔ ዲሰራዔኤሌም ዋይዞ ዒፄ።

6 ዒማና ካአቲ፣ ዒዮራሜ ዑካዲ ሳማሪያፓ ኬሰኪ ፖኦሊሶ ቢያ ፔቲይዳ ቡኩሴኔ፤

7 ዬካፓ ዪሁዳ ካአቲ፣ ዒዮሳፒፄ ኮይላ፡- «ሞዓኣቤ ዓጮ ካአቲ ታአም ዋይዞ ዒፄ፤ ታ ያላኒ ጋዓሢሮ ኔ ታአና ዋላ ዒዛ ያላንዳ?» ጋዓ ኪኢታ ዳኬ።

ካአቲ፣ ዒዮሳፒፄ ማሃዖ፡- «ሂዮ፣ ታ ኔና ማአዳንዳ፤ ታ ኔጉዲ፣ ታአኮ ፖኦሊሳ ኔ ፖኦሊሶጉዲ፣ ታአኮ ፓራሢያ ኔ ፓራሢጉዲ ያላኒ ጊኢያኮ፤»

8 ጋዓንቲ፡- «የሎሮ ዋይና ኑ ዓአዳንዳይ?» ጌዒ ያኦጮ።

ካአቲ፣ ዒዮራሜ፡- «ዔዶአሜኮ ዓሲ ናንጉዋ ቦኦሎና ጌዒ ሺሪ ኑ ዴንዳንዳ፤» ጌዔ።

9 ዬያሮ ካአቲ፣ ዒዮራሜንታ ዪሁዳና ዔዶአሜና ዓጮ ካአቶንታ የሎሮ ኬሰኬ፤ ላንካይ ኬሊ ዔያታ ሃንቲሰካፓ ዋአፃ ዔያቶኮ ጋፔ፤ ዔያቶኮ ፖኦሊሶንታ ጫኣኖ ጫኣና ቆልሞኮዋ ፔቲታዖ ዋአሢ ባኣያ ማዔ።

10 ዬያሮ ካአቲ፣ ዒዮራሜ፡- «ኑና፣ ሃይሃ ካአቶ ናንጊና ናንጋ ጎዳ ሞዓኣቤ ካአቲም ዓአሢ ዒንጊጋፔኔ ባዴዔ ኑና!» ጌዒ ዒላቲ።

11 ዒማና ካአቲ፣ ዒዮሳፒፄ፡- «ኦኡኒ ናንጊና ናንጋ ጎዳ ያኦጫሳንዳ ያኦሲ ማሊሢ ኬኤዛ ዓሲ ሃይካ ፔቲታዖ ባኣዓዳ?» ጌዔ።

ካአቲ ዒዮራሜ ፖኦሊሶኮ ሱኡጎይዳፓ ፔቲሰኬይ፡- «ሚና ዔኤሊያሴ ማአዲ ማዳ፣ ሳፓፄ ናኣዚ፣ ዔልሳዒ ጎዖሰኬይ ሃይካ ዓኣኔ» ጌዔ።

12 ካአቲ፣ ዒዮሳፒፄ፡- «ዒዚ ጎኔ ያኦሲ ማሊሢ ኬኤዛያኬ» ጌዔ፤ ዬካፓ ሃይሃ ካአቶንሢ ዔልሳዒ ኮይላ ዴንዳ።

13 ዒማና ዔልሳዒ ዲሰራዔኤሌ ካአቲ፣ ዒዮራሜ ኮይላ፡- «ታአና ኔኤና ዓይጎና ካአማ ካራ ዓኣይ? ዴንዲ ኔ ዓዶንታ ኔ ዒንዶንታ ዠኦቻ ዠዋ ኮይላ ያኦጮ!» ጌዔ።

ካአቲ፣ ዒዮራሜ ማሃዖ፡- «ያዲቱዋሴ! ኑና ሃይሃ ካአቶ ሞዓኣቤ ዓጮ ካአቲም ዓአሢ ዒንጋኒ ዔኤሊ ዔኪ ዬዔሢ ናንጊና ናንጋ ጎዳኬ» ጌዔ።

14 ዔልሳዒ፡- «ታኣኒ ዒዛም ማዳ ናንጊና ናንጋ ያኦዛሢ ሃይቆ! ኔና ማአዳኒ ሙኬ፣ ዪሁዳ ካአቲ፣ ዒዮሳፒፄ ቦንቲ ማዓንዳኣፓዓቲም ኔኡም ዓይጎ ባኣዚያ ማዳኒ ኮይሱዋያታንቲኬ፤

15 ሃንዳ ታአም ዴንዲ ጎኦላ ዋርቃ ዓሲ ዔኪ ዬዑዋቲ» ጌዔ።

ጎኑሎ ዋርቃሢ ዋርቃዛ ናንጊና ናንጋ ጎዳኮ ዋልቂ ዔልሳዒዳ ኬዴም ዒዚ፡-

16 «ናንጊና ናንጋ ጎዳ ሂዚ ጋዓኔ፤ ሃያ ዋእፃባእ ዛርይዳ ቢያ ዔቴ ቦኡኩዋቲ፤

17 ዒርዘንታ ዠባሬንታ ጴዲባእያ ማዔቴያ ሃይ ዛራ ዋእሢ ኩማንዳኔ፤ ዒንሢንታ ዒንሢኮ ቆልሞንታ ጩኣና ጩኣና ቆልሞንታ ቢያ ዑሽካንዳ፡ ጊዳ ዋእሢ ዒንሢ ዴንቃንዳኔ፤ ጌዔኔ፡፡

18 ዬያይዲፃ ናንጊና ናንጋ ጎዳም ሹሌዔኬ፤ ዬያ ሌሊቱዋንቴ ሞዓኣቤ ዓሶዋ ያሎና ዒንሢ ዒዚ ባሺሲሳንዳኔ፡፡

19 ዙሎ ኬልቂ ዲርቆና ሚዛጶ ካታሞዋ ዔያቶኮ ያሊ ባሺ ዒንሢ ዓርቃንዳኔ፤ ዔያታ ቱኬ፡ ዓኣፖ ዓኣፓ ሚያዋ ዔያቶኮ ዒንሢ ቲቃንዳኔ፤ ዔያቶም ዋእፃ ዓልቃ ቤዘዋ ዒንሢ ሲንሢ ባይዘንዳኔ፤ ማሎ ጎዡዋ ዔያቶኮ ዒንሢ ሹቲ ኩሊ ፑርቲሳንዳኔ» ጌዔኔ፡፡

20 ዚሮ ጉቴሎ ያኡሲም ዒንጎ ባኮ ዒንጎ ዎዶ ማዓኣና ዔዶኣማ ባንፃና ዋእሢ ጎረ ሙካፃ ሳፃ ባይዘኔ፡፡

21 ዒማና ሞዓኣቤ ዓሳ ቢያ ሃይሦ ካኣታ ዔያቶ ያላኒ ሙከሢ ዋይዘፃ ጋርቻይዳፓ ዴንዲ ዴጌ ናኣቶ ሄላንዳኣና ያልዚ ዓንጋሞና ያላ ዓሲ ቢያ ዔኤሊ ኬሲ ዓጮኮ ዛጶ ካፒኔ፤

22 ዚሮ ጉቴሎ ዔያታ ጉቴ ዓማ ዔቂ ዛጋንቴ ዋእያይዳ ዓባፖዓዛ ዬይ ሱጉሢ ዔያቶም ማሌኔ፤

23 ዬያሮ ዔያታ ዑኡዘ ፔኤኮ ዴጊዲ፡- «ሃይ ዔዛታ ሱጉሢኬ! ኑ ሞርኮ ማዔ፡ ሃይሦ ካኣቶኮ ፖኦሊሳ ዋሊ ጨርኪ ጨርኪ ኩርሴኔ፤ ዬያሮ ኦኡኒ ዴንዲ ዔያቶ ባኮ ቡሮም» ዋሊ ኮይላ ጌዔኔ፡፡

24 ዬካፓ ዔያታ ጉርዶ ሙኪ ሄላዛ ዒሰራዔኤሌ ዓሳ ዔቂ ዔያቶ ያላፃ ዴዎሲ ማሂ ዳኬኔ፤ ዒሰራዔኤሌ ዓሳ ዒማና ዓጮ ጉቤ ዓርቂ ሞዓኣቤ ዓሶ ዎዲ ኩርሴኔ፤

25 ካታሞዋ ዔያቶኮ ዶይሲ ባይዘኔ፤ ዔያቶኮ ማሎ ጎዡይዴና ዓኣዳፃ ፔቴ ፔቴ ዒሰራዔኤሌ ዓሳ ሹቲ ሹቲ ዔኪ ጎዡ ጋራ ኬኤራሢሮ ጋፒንፃ ጎዡ ዔያቶኮ ቢያ ሹቲ ሌሊ ማዔኔ፤ ዓልቃ ዋእፃዋ ዔያታ ሲንሢኔ፤ ሙዋ ሚያ ዓኣፖዋ ቢያ ቲቂኔ፤ ዒማና ዓጮሎኮ ዴኤፖ ካታሞ ማዔ፡ ቂሪሄራሴ ሌሊ ዓቴኔ፤ ሹጮና ዎሪ ያላ ዓሳ ዬኖዋ ማንጊ ያሌኔ፡፡

26 ሞዓኣቤ ዓጮ ካኣቲ ያሎና ባሺንቴሢ ዔራፃ ጩንቻ ዓፓር ቱኬ ላንካይ ጭታ ዓሲ ዔኪ ሞርካ ያሎሮ ዔቂ ዛሎና ቶሊ ኬሰኪ ሶኦሪያ ካኣቲ ኮይላ ዓኣዳኒ ጌዔንቴ ፔቴታፃ ዒዛም ዳንዳዒንቴባኣሴ፡፡

27 ዬያሮ ዒዛ ቤዛ ካኣታዳኒ ዳንዳዓ፡ ዒዛኮ ቶይዶ ናዓሢ ካታሚሎኮ ኬኤሎ ዲያይዳ ሚቲ ዒንጎ ባኣዚ ማሂ ሞዓኣቤ

ያኑሲም ዋዲ ሺኢሺኔ፤ ዬያ ዒ ማዳ ባካ ዒሰራዔኤሌ ዓሶኮ ዑሰካ ጌሌሢሮ ማዒ ፔ ዓጮ ዳንዴ።

4

ዔልሳዒ ዜኤሮ ዒንዴሎ ማእዳሢ

1 ዓሲ ያኑሲ ማሊያ ኮኤዛ ዓሶ ባእካ ዓእያታዖ ሃይቁ፣ ፔቴ ዜኤሪንድሰኬና ዔልሳዒ ኮይላ ሙኪ፡- «ታ ጎዳሢያ! ታኣኮ ዓሲ ሃይቁያኬ! ኔ ዒዛ ዔራሢጉዲ ዒ ያኑሲ ዒጊጫ ዓሲኬ፤ ዒዚ ቤርታ ሚኢሺ ታልዒ ዔኬ፣ ፔቴ ዓሲሰኬይ ፔኤኮ ጋሎ ዛሎ ታኣኮ ላምዖ ዓተንቆ ናኣቶ ዔኪ ዓይሌ ማሃኒ ኮዓኔ» ጌዒ ኮኤዜ።

2 ዔልሳዒ፡- «ታ ኔኤም ዓይጎ ዋዳንዳጉዲ ኔ ኮዓይ? ኔ ማእራ ዓይጌ ዓኣቴ ሂንዳ ታኣም ኮኤዜ» ጌዒ ዒዛ ያኑጩ።

ዒዛ ማሃዖ፡- «ዳካ ያቴዳ ዓኣ ሪሚቴ ዛይቴሰኬንሢፓ ዓታዛ ማሌ ዓይጌያ ባኣሴ» ጌዔ።

3 ዔልሳዒ ዒዛም፡- «ኔ ዓሺኖ ኮይላ ዳንዲጋፓ ኔ ዳንቃኒ ዳንዳዒሢጉዳያ ያቴ ሺኢቁ ዔኬ፤

4 ኔ ዔኬሰካፓ ኔኤና ኔ ናኣቶና ጋሮ ጌላዖ ካሮ ዒንሢ ዑፃ ዋዳዋቴ፤ ዳኮ ያቶይዳ ዓኣ ዛይቶንሢ ዒንሢ ዔኪ ዬዔ ያቶይዳ ዋሁዋቴ፤ ፔቴ ፔቴ ያታ ኩማዛ ሺኢሺ ሺኢሺ ጌሁዋቴ» ጌዔ።

5 ዬያሮ ላኣሌላ ፔ ማእሪ ዳንዲ፣ ፔ ናኣቶና ዋላ ጋሮ ጌሊ ካሮ ዔያቶ ዑፃ ዋዳኔ፤ ዬካፓ ዛይታ ዓኣ ዳኮ ያቴሎ ዔካዖ ናኣታ ዒዛም ያቶ ዔኪ ዔኪ ሙካዛ ዛይቶ ዋሂ ያቶ ቢያ ኩንሢ።

6 ያታ ቢያ ኩሚሰካፓ፡- «ሜሌ ያቴ ዓኣ?» ጌዒ ዒዛ ፔኤኮ ናኣቶ ያኡጫዛ፣ ናኣቶፓ ፔቴሰኬይ፡- «ሜሌ ያቴ ባኣሴ» ጌዔ። ዬካፓ ዛይታ ያቶማፓ ሸኣቴዖ ሃሺ።

7 ዒዛ ያኑሲ ማሊያ ኮኤዛ፣ ዔልሳዒ ኮይላ ዳንዴ፤ ዒዚ ዒዛም፡- «ዓካሪ ዛይቶ ሻንቺጋፓ ጋሎ ጉቤ ጨጌ፤ ኔናጎታ ናኣቶንታም ዬያፓ ዑሣ ዓኣዳ ሚርጌ ሚኢሺ ዓታንዳኔ» ጌዔ።

ዔልሳዒና ሱኔሜ ካታማ ናንጋ ያርጎጮ ላኣሌሎና

8 ዔልሳዒ ፔቴ ኮሊ ያርጎቹ ላኣሊሰኬና ናንጋ፣ ሱኔሜ ጌይንታ ካታማ ዳንዴ፤ ዒማና ዬና ላኣሌላ ዒዛ ሙኡዚ ሙዓንዳጉዲ ፔ ማእሪ ዔኤሌ፤ ዬማ ኬላፓ ዓርቃዖ ሱኔሜ ካታም ዒ ሙካዖ ሙካዖ ቢያ ኮሊ ዒዛ ማእራ ሙዓኔ፤

9 ዬካፓ ላኣሌላ ዓሲ ኮይላ፡- «ሃኖ ካታም ሙካዖ ሙካዖ ኑ ማእሪ ሙካ ዓሢሢ ያኑሲም ዲማዴያ፣ ያኑሲ ዓሲ ማዔሢ ጎኔ ታ ዔሪ፤

10 ዬያሮ ኩቦ ጋሮይዳ ፔቴ ዳካ ቆልዓ ጌኢሺጊፓ ዒኢካ ፔቴ ዓርሳ፣ ፔቴ ዳጌ ሎኦዜ ያይታ፣ ፔቴ ዳዖ ያይታና ፖዒ ዒዚ

ፖሊሳንዳጉዲ ፔቲ ፓኖሴያ ኑኡኒ ጌሃም፤ ዲዚ ኑና ዛጋኒ ሙካ ዎደና ቢያ ዩና ዲዛም ዎይሂ ሴሲ ማፖንጎ» ጌዔ።

11 ጊንፃእ ዓቦ ሃሃ ዔልሳዒ ሱኔሜ ካታሞ ሙካፖ ዔያቶ ማእሪ ዩዒ ዲዛም ጊኢጊሾና ቆልፖ ኬኤፃሎ ጌሊ ሃውሹኔ፤

12 ዲዛም ማጆ ማጆያ፡ ጊያዜ ጎፖሰኬያ ኮይላ ዲዚ፡- «ዴንዲ ሃኖ ማእሮ ዲንዴሎ ዔኤሌ» ጌዔ፤ ዲዛ ዲማና ሙኪ ዲዛ ቤርታ ዔቆኔ፤

13 ዲዚ ጊያዜም፡- «ዲዛ ኑም ማጆ ኮዦ ባኮሮ ቢያ ኑ ዲዛም ዓይጎ ማጆንዳጉዲ ዲዛ ኮዓቲያ ሂንዳ ዲዛ ፖኤጮ፤ ጎፖንቴ ታኢ ካኢቲ ኮይላ፤ ሃንጎ ፖኡሊሶ ሱኡጋሂ ኮይላ ዴንዲ ኬኤዘም ጋዓ ባኢዚ ዲዛ ናንዳኔ» ጌዔ።

ዲዛ፡- «ታኢ ሃይካ፡ ታ ዲጊኖ ባኢካ ናንጋሂሮ ፔቲታፖ ታና ሜታ ባኢዚ ባኢሴ» ጌዔ።

14 ሃሃ ዔልሳዒ ጊያዜ ኮይላ፡- «ታ ዲዛም ዓይጎ ማጆቲ ኮሽካንዳይ?» ጌይ ፖኤጮ።

ጊያዜ፡- «ዲዘኮ ናይ ባኢዎይ፤ ዲዛ ናይ ሾውዋንቴና ዓኒ ጋርቹኔ» ጌዔ።

15 ዔልሳዒ ዲማና፡- «ዲዛ ሃኒ ሙኮም ኬኤዜ» ጌይ ጊያዜ ዓይሂም፡ ዲዛ ሙኪ ካሮ ዓጫ ዔቆኔ፤

16 ዔልሳዒ ዲዛም፡- «ሙካ ሌፖ ሃይማ ዎዴ ዓቲንቄ ናይ ኔኤኒ ጎዳንዳኔ» ጌዔ።

ዲዛ ዑኡዘ ጃጊዲ፡- «ታ ጎዳሂኖ! ኔኤኒ ፆኦሲ ዓሲኬ፤ ማዓኑዎ ዎዛ ባኢዚ ታኣም ኬኤዚፖ!» ጌዔ።

17 ጋዓንቴ ዳካ ዓጊኒኮ ጊንፃ ዲዛ ጎጳጳኔ፤ ዔልሳዒ ኬኤዜ ዎደማ፡ ሄሊሴ ሌፖማካ ዓቲንቄ ናይ ዲዛ ሾዔ።

18 ዩካፓ ናዓሂ ዑጌኔ፤ ፔቲ ኬሊ ማኢሊ ቡሪሂ ዎደና ዩይ ናዓሂ ዓደ ኮራ ጎዦ ዴንዴኔ፤ ዓዴ ዲማና ጎዦይዳ ዓሲና ዎላ ሃኢኮ ጮኦሪ።

19 ዲኢካ ዩይ ናዓሂ ዔርቲባኢንቴ፡- «ቶኦኪ ቆፃ፤ ቶኦኪ ቆፃ፤!» ጌይ ዓደ ኮይላ ዲላቴ።

ዩያሮ ዓዳሂ ዲዘኮ ዓይሎፓ ፔቲሰኬያ ዔኤላፖ፡- «ናዓሂ ኬዲ ዔኪ ዲንዶ ኮይላ ዓኣጳ» ጌይ ዓይሂ።

20 ዩያሮ ዩይ ዓይላሂ ናፖ ኬዲ ዔኪ ዴንዲ ዲንዶም ዲንጋዛ፡ ዲንዳ ዓርቂ ዴዒ ዓኢንቴና ዓባ ሳዛ ማዓኢና ናዓሂ ሃይቆኔ፤

21 ዩካፓ ዲንዴላ ናፖኮ ሌዘ ዔኪ ዔልሳዒም ጊኢጊሾና ቆልፖይዳ ጌልዚ ዲዘኮ ዓርሳ ላይሃፖ ካሮ ዎዲ ሃሺ ኬሰኬ።

4:16 ማዢ. ማፃ 18:14።

22 ይያይደሰካፓ ዒዛ ዒኒ ዔኤላዎ፡- «ፔቴ ዓይሌና ሃሪና ታአም ዳኪ፤ ታኣኒ ያኦሲ ዓሢ ኮይላ ዓኣዳንዳኔ፤ ኔጉዋዎ ታ ገንሣ ዩዓንዳኔ» ጌዒ ከኢታ ዳኪኔ።

23 ዓኒ ጋዓንቴ፡- «ሃኖ ኔኤኒ ዓይጋ ዓኣዳይ? ሃኖ ሃውሾ ከሌቱዋሴ፤ ገንሣ ሃሣ ዓገኒ ጻኤሪ ቦንቾ ከሊያቱዋሴ» ጌዔኔ።

ዒዛ ማሃዎ፡- «ሜታ ባኣሴ፤ ታ ኔኤም ጌዔማ ጎይዎ ማዳ» ጌዔኔ፤

24 ዒዛ ሃሮ ኮኦሪሰካፓ ዓይላሢ፡- «ሃሮ ሩኡሪ ሩኡሪ ዒሺ፤ ታ ዓይሣባኣንቴ ሃሮ ታሢ ዒሺፖ» ጌይ ዓይሣኔ።

25 ዒዛ ዒማና ዔልሳዒ ዓኣ፥ ቁርሜሎሴ ዲኮ ዴንዲ ኬሰኪኔ።

ዒዛ ሃገ ሃኪ ዓኣንቴ ዔልሳዒ ዒዛ ዴንቃዎ ዒዛኮ ዓይላሢ፤ ጊያዜ ኮይላ፡- «ሃኣሶ ዛጌ! ሱኔሜ ካታሞ ላኣሌላ ሃንጋ ሙካኔ!

26 ዑካዲ ዴንዲጋፓ ዒዛንታ ዓኒንታ ናዎንታ ዋዚታቴያ ያኦጩ» ጌዔኔ።

ዒዛ ጊያዜም፡- «ኑ ቢያሢ ኮሺ ዓኣኔ» ጌዔኔ።

27 ዩካፓ ዒዛ ዔልሳዒ ቤርቶ ሙካዎ ሳዎይዳ ሂርኪ ጌዒ ቶኮ ዒዛኮ ዓርቄኔ፤ ዒማና ጊያዜ ሂዒ ዒዛ ሺኢሻኒ ጋዓዛ ዔልሳዒ ጋዓንቴ፡- «ሃሺ፤ ዋዘም ዒዛ ሜታዲ ሙኬቴያ ኔኤም ዔርቱዋዓዳ? ናንገና ናንጋ ጎዳ ዒዛ ዛሎ ባኣዚ ታኣም ከኤዚ ፔጋሲ ዳውዋዎ ዓይጋ ሃሺቴ ታኣኒ ዔራኒ ዳንዳዒባኣሴ» ጌዔኔ።

28 ሱኔሜ ካታሞ ላኣሌላ፡- «ታ ጎዳሢኖ! ናይ ታኣም ኔ ዒንጋንዳጉዲ ታ ኔና ያኦጩያ? ማዓኑዋ ዋዛ ባኣዚ ታኣም ከኤዚፖ» ታ ኔኤም ጌይባኣዓዳ?» ጌዔኔ።

29 ዩካፓ ዔልሳዒ ጊያዜ ባንሢ ሺራዎ፡- «ዑኩና ዔቂ ታ ኮኣሎ ዔኪ ዴንዳ! ፔቴ ዓሲታዎ ዔኤላሢ ዔኤላኒ ጎይፃ ዔቂ ኔገፖ፤ ዓይጎ ዓሲያ ኔና ዔኤላሢ ዔኤሌቴ ማሂ ዔኤሊያ ዔካኒ ኔገፖ፤ ዘቲ ጋዓዎ ዴንዲ ታኣኮ ኮኣሎ ናዎኮ ባሊቶና ፒዜ ናዎኮ ዑፃ ጌሢ!» ጌዔኔ።

30 ናዓሢኮ ዒንዴላ ዔልሳዒ ኮይላ፡- «ታኣኒ ጉሙርቃ፥ ናንገና ናንጋ ጎዳሢ ሃይቆ! ሃሣ ኔ ሃይቆ! ማሊ ታ ኔና ሃሺ ዓኣዳዓኪ!» ጌዔኔ፤ ዩያሮ ዒዚ ዒዛ ገንዎ ዓኣዳኒ ዔቄኔ፤

31 ዒማና ጊያዜ ዔያቶኮ ቤርታ ቤርታ ዴንዳዎ ዔልሳዒኮ ኮኣሎ ናዎኮ ባሊቶና ፒዜ፥ ናዎ ዑፃ ጌሢኔ፤ ጋዓንቴ ዋይዚንቴ ዑኡሲያ ማዎም ዳቃንዳ ማላታ ጴዲባኣሴ፤ ዩያሮ ማዒ ዔልሳዒ ኮይላ ሙካዎ፡- «ናዓሢ ሶያኒ ዳንዳዒባኣሴ» ጌዔኔ።

32 ዩካፓ ዔልሳዒ ሙካዎ ቆልዎ ጋሮ ጌሊ፥ ናዓሢ ሃይቄም ዒዛኮ ዓርሶይዳ ሌዞ ላይሦናንቴ ዴንቄኔ፤

33 ዒዚ ዒማና ቆልዎ ጋሮ ጌላዎ ናዓሢኮ ሌዞና ፔኤና ዑፃ ካሮ ዋዲ ያኦሲ ሺኢቄኔ።

34 ዩካፓ ፔ ዳንጎናዊ ዳንጎና፡ ፔ ዓአፖናዊ ዓአፖና፤ ኩጮዎናዊ ኩጮናዎ ላ ካንሢናዊ ዐ-ፃ ፔና ሃሽኔ። ዔልሳዊናዊ ዐ-ፃ ፔና ሃሻዛናዊ ኩ-ፃ ያይዲሢ ዓርቁኔ።

35 ዒማና ዔልሳዊ ዔቁ ቆልዎ ጋራ ሴካ ሃንጋ ሃንታዎ ላሚ ጊንሣናዊ ዐ-ፃ ፔና ሃሽኔ፤ ዩያሮናዊ ላንካይ ማይንቲ ሂዲሽካዎ ዓአፖ ቡሌኔ።

36 ዔልሳዊ ጊያዜም፡- «ናዊሃኩ ዒንዶ ዔኤሌ» ጋዓዛ፡ ዒዛ ሙኬም ዔልሳዊ፡- «ናዎ ኔኤኮ ሃአዛጌ!» ጌዔኔ።

37 ዒዛ ዒማና ዔልሳዊኮ ቶካ ሎኦሚ፡ ሳዓ ላሄኔ፤ ዩካፓ ዒዛ ፔኤኮናዊ ዔኪ ዴንዴኔ።

ያኦሲ ዎልቁና ማዲንቲ ላምዎ ዓኪ ባአዚ

38 ፔቴና ዔልሳዊ ጌልጌላ ሙካንቲ ዓጩሎይዳ ዴኔፒ ናይዚ ዓአኔ፤ ዒኢካ ዒዚ ያኦሲ ማሊዎ ኬኤዛ፡ ቡኬ ዓሶ ዔርዚሢዳ ዓአዎ ዒዛኮ ዓይላሢ፡- «ዴኔፒ ያቲ ዴይሢ ዎፃ ዔያቶም ዎፃ» ጌይ ዓይሢኔ።

39 ዒማና ዩያቶ፡ ያኦሲ ማሊዎ ኬኤዛ ዓሶፓ ፔቴሰኬይ ሳአሚ ማንፃሪ ቡኦሎ ዴንዴኔ፤ ዒዚ ካዮይዳ ባልጊ ዓአ ጉሲ ዴንቁኔ፤ ዒዚ ኬዳኒ ዳንዳዊጉዴያ ዲቢ ጉሲ ዒላሺ ማንፃ ዔኪ ሙኬኔ፤ ዩይ ዓይጎ ሳአሚታቱያ ዔሩዎዎ ጨርኪ ያታ ዓጌኔ፤

40 ዩካፓ ያኦሲ ማሊዎ ኬኤዛ ዓሳ ሙዓንዳጉዲ ዒንጎና ዎዎ ኩኡሊ ዛጋዎ፡- «ሃያ ዎይዳ ዎዳ ዴኤሻ ዓአኔ!» ጌዒ ዔልሳዊ ኮይላ ዒላቲኔ፤ ሙዒኒያ ዳንዳዊ ባአሴ፤

41 ዔልሳዊ ዒማና ዓሳ ዒዛም ዲኢሊ ዒንጋንዳጉዲ ያኦጪ ዔኪ ያቶይዳ ዎሃዎ፡- «ዎዎ ዲይ ዲይ ዎሄ» ጌይ ዓይሢኔ፤ ዒማና ዎይዳ ፔቴታዎ ጩንቃ ባአዚ ባአያ ማዔኔ፤

42 ፔቴ ኬሊ ሃሃ ቤዓልሻሊሻ ጌይንታ ቤሰካፓ ማአሎ ቡሮ ዎዶና ቤርታዲ ሺርኪንቲ ዔልዓፓ ላአዲንቲያ ላምታሚ ሙሊሢ ላአዳና ቲሽና ዎላ ፔቴ ዓሲሰኬያ ዔኪ ዔልሳዊም ሙኬኔ፤ ዔልሳዊ ዒማና፡- «ያኦሲ ማሊዎ ኬኤዛ፡ ቡኬ ዓሶም ዒንጌ፤ ዔያታ ሙዎንጎ» ጌይ ዒዛኮ ዓይላሢ ዓይሢኔ።

43 ዓይላሢ ጋዓንቲ፡- «ሃንሢ ጃኤታ ዓሲም ጊዳንዳያ ኔኤም ማላ?» ጌዒ ያኦጩኔ።

ዔልሳዊ፡- «ዔያታ ሙዎም ዒንጌ፤ ዔያታ ሙዒ ሚሽካንዳሢ ሌሊቱዎንቲ ዶምባ ዓታንዳሢና ናንጊና ናንጋ ጎዳ ታኣም ኬኤዜኔ» ጌዔኔ።

4:35 1ካእቶ. ማ 17:21።

44 ዬያሮ ዔልሳዒኮ ዓይላሢ ዬንሢ ዳኮ ሙዖንሢ ዓላሞ ሺኢሽኔ፤ ናንጊና ናንጋ ጎዳ ጌዔ ጎይዖ ቢያሢ ሙይ ሚሽካዛ ደሞባ ዓቴኔ።

5

ኒዒማኔ ጎዖ ዓሢኮ ደርዓሰካፓ ዳቁዖ

1 ናንጊና ናንጋ ጎዳ ኒዒማኔ ዛሎና ሶኦሪያ ዓጮ ፖኦሊሳ ያሎና ባሻንዳጉዲ ማሄሢሮ ሶኦሪያ ዓጮ ካኣቲ ዒዛኮ ፖኦሊሶ ሱኡጋሢ፤ ኒዒማኔ ኮሺ ናሽኪ ደንዛ ዒዛ ማሄ ዓኣኔ፤ ኒዒማኔ ያዲ ያልዚና ዔርቲያ ማዔቴያ 0-9 ኬሰካ ደርዓሢ ዒዛ ዓርቂ ማታሳያኬ።

2 ሶኦሪያ ዓሳ ዒሰራዔኤሌ ዓሶ ያሌ ዎደና ዲዒ ዔኬ፤ ፔቲ ዳካ ወዲሮ ናይሰኬና ዓኣኔ፤ ዬና ናዔላ ኒዒማኔ ማቸሞ ማዶ ማዲቤቃ።

3 ፔቲ ኬሊ ዒዛ ዒዛኮ ዒንዶ ማዔ፤ ኒዒማኔ ማቸ ኮይላ፡- «ታ ጎዳሢ፤ ኒዒማኔ ሳማሪያይዳ ዓኣ ያኦሲ ማሊዖ ኬኤዛሢ ኮይላ ዓኣዳቲ ኮሺ ማላኔ! ዬይ ያኦሲ ማሊዖ ኬኤዛሢ 0-9 ኬሰካ ደርዓሰካፓ ዒዛ ፓሣኒ ዳንዳዓኔ!» ጌዔኔ።

4 ዬያ ኒዒማኔ ዋይዛዖ ካኣቲ ኮይላ ዴንዲ ወዲሮ ናዔላ ጌዔ ባኮ ቢያ ኬኤዜኔ፤

5 ዬያሮ ካኣቲ፡- «ሃያ ታኣኒ ያኣፔ ኪኢቶ ዔኪ ዒሰራዔኤሌ ካኣቲ ኮይላ ዴንዴ» ጌዒ ዴንዳንዳጉዲ ዓይሣኔ።

ዒማና ኒዒማኔ ሃይሣ ያኤታና ያይዲታሚ ኪሎ ጊራኣሚ ማዓ ሹቹ ቢራ፤ ላንካይታሚ ኪሎ ጊራኣሚ ማዓ ዎርቁንታ ሚርጌ ሚዛጳያ ላኣሚ ላኣሚ ማይንቶያ ታጾ ዲማ ዲማ ማኣዖ ጫኣኒ ዔኪ ዴንዴኔ፤

6 ዒዚ ዔኪ ዴንዴ ኪኢታ፡- «ሃይ ታ ኔኤሞ ያኣፔ ባካ ታኣኮ ፖኦሊሶኮ ሱኡጋሢ፤ ኒዒማኔ ዛሎ ኬኤዛያኬ፤ ዒዛኮ 0-9 ኬሰካ ዓኣ ደርዓሰካፓ ኒዒ ጌኤሺ፤ ፓሣንዳጉዲ ታ ኮዓኔ» ጋዓያኬ።

7 ዒሰራዔኤሌ ካኣቲ ዬያ ኪኢቶ ናባባዖ ዳጋና ፔኤኮ ማኣዓሢ ዳርዜኔ፤ 0-ኡዞዎ ፔኤኮ ዴጊዲ፡- «ሃያ ዓሢ ታኣኒ ፓሣንዳኔ ጌዒ ሶኦሪያ ካኣቲ ዎይቲ ማሌይ? ታኣኒ ሃያ ዓሢ ሃያ ደርዓሰካፓ ፓሣንዳያኮ ዓሲ ዎዳኒና ዳቁሻኒ ዳንዳዓ ያኦሲ ታ ዒዛሞ ማሊያ? ጎኔና ሃይ ጌኤዛ ታኣና ዎላ ዒ ፑርቲሢሮ ኮዓያታሢ ፔጌና ዔርዛኔ!» ጌዔኔ።

8 ያኦሲ ማሊዖ ኬኤዛ፤ ዔልሳዒ ዬያ ባኮ ቢያ ዋይዛዖ ካኣቲ ኮይላ ኪኢታ ዳኪ፡- «ማኣዓሢ ኔኤኮ ኔ ዓይጋ ዳርዜይ? ዓሢ ታ ኮይላ ዴኬ፤ ታኣኒ ዒሰራዔኤሌይዳ ያኦሲ ማሊሢ ኬኤዛ ዓሲ ዓኣያታሢ ዒዛ ዔርዛንዳኔ!» ጌዔኔ።

9 ዬያር ኒዲማኔ ፓራሢ ጎቻ፣ ሳርጌሎ የይቶ ቶጊ ዔልሳዲ ማኦሪ ጌላ ካር ሄላዎ ዔቄኔ።

10 ዔልሳዲ ዲማና ፔኤኮ ዓይላሢ ዔኤላዎ፡- «ጄንዲ ዮርዳኖሴ ዋርይዳ ለንካይ ማይንቲ ጌሊ ጌሊ ማሰቲ፤ ዶርዓሰካፓ ጋፒ ኔኤኒ ጌኤሽካንዳኔ» ጌይ ዲዛም ኬኤዜ» ጌዔ።

11 ኒዲማኔ ጋዓንቲ ዳጋዲ ፔ ዓጮ ገንሣ ማዒ ዴንዳኒ ዔቄኔ፤ ዲዚ ሂዚ ጌዒ ጉንዳማኔ፡- «ታኣኒ ማላሢ ያኦሲ ማሊያ ኬኤዛ ዓሢ ታ ኮይላ ሙኪ ያኦሲ ታኣም ሸኢቁ፤ ሃሣ ታኣኮ ዑፃ ኬሰኬ ዶርዓሢ ዓኣ ቤዛ ኩጮ ጌሢ ፓሣንዳኔ ጌይኬ!

12 ዋኣሢና ማማሰቶያታቲ ዒሰራዔኤሌ ዓጮይዳ ዓኣ ዋርይዳፓ ባሽ ታ ዓጮ፣ ዴማሰቆይዳ ዓኣ ዓባኣና ፓርፓሬና ባሽቱዋዓዳ? ያዲታቲ ዋንዴ ዬያቶይዳ ማሰቲ ታኣኒ ጌኤሽኩዋይ!»

13 ዲማና ኒዲማኔኮ ዓይላ ዲዛ ኮይላ ሙካዎ፡- «ኑ ጎዳሢዮ! ያኦሲ ማሊያ ኬኤዛ ዓሢ ማሊያ ዴኤፒ ባኣዚ ኔ ማዳንዳጉዲ ዓይሣቲ ኔ ማዳዓዳ? ሂዳዎ ሃሢ ያኦሲ ማሊያ ኬኤዛሢ ዓይሣ ጎይያ ማሰቲ ዶርዓሰካፓ ጌኤሽኪ ዳቂፃ ዋይቲ ኔኤም ዴኤፃይ?» ጌዔ።

14 ዬያር ኒዲማኔ ያኦሲ ዓሢ ዓይሣ ጎይያ ዮርዳኖሴ ዋር ኬዲ ለንካይ ማይንቲ ጌሊ ኬሰኪ ኬሰኪ ማሰቲ፤ ዶርዓሢፓኣ ጌኤሽኪ ዳቄኔ፤ ዑፃ ዲዛኮ ዳካ ናይ ዑሢጉዲ ጌኤሽኪ ዳቄኔ፤

15 ዬካፓ ዲዚ ዲዛና ዋላ ዓኣ ዓሰንታ ዋላ ያኦሲ ዓሢ ኮይላ ሙካዎ፡- «ዒሰራዔኤሌ ያኦሲፓ ዓታዛ ማሊያ ያኦሲ ባኣሢ ዓካሪ ታ ዔሬኔ፤ ዬያር ታ ጎዳሢዮ! ሃዳራ ሃያ ታ ኔኤም ዒንጋ ባኮ ዔኬ» ጌዔ።

16 ዔልሳዲ፡- «ታ ዲዛም ማዳ፣ ናንጊና ናንጋ ጎዳ ሃይቆ! ዓይጎ ባኣዚያ ታኣኒ ዔካዓኬ» ጌዔ።

ኒዲማኔ ጋዓንቲ ዲዚ ዒንጋ ባኮ ዔካንዳጉዲ ሃሾ ዒዲ ሸኢቁንቲያ ዔልሳዲ ዔኤዒባኣሴ፤

17 ኒዲማኔ ዲማና፡- «ታ ዒንጋ ባኮ ኔ ዔኮ ዲፃቲ ላምዎ ባቁሎና ዓጪ ታኣኒ ሃይፓ ጫኣኒ ዔኪ ዓኣዶም፤ ዓይጎር ጌዔቲ ሃይማፓ ዓርቃዎ ናንጊና ናንጋ ጎዳም ሌሊ ማዓንዳኣፓዓቲም ማሊያ ያኦዞም ሚቶ ዒንጎ ዒንጊሢና ማሊያ ዒንጊሢያ ፔቲታዎ ታኣኒ ዒንጋዓኬ፤ *

5:14 ሉቃ. 4:27። * 5:17 ሚናኣ ዋዶና፡- «ፔቲ ዓጪኮ ያኦሲ ዲዛ ዓጪኦፎፓ ዔከንቲ ዓጪና ማኸና ዒንጎ ቤሲዳ ካኣሽኪንታኒ ኮይሳኔ» ጌዒ ዓሳ ጉሙርቃሢር ኒዲማኔ ዓጮ ዒሰራዔኤሌይዳፓ ጫኣኒ ዓኣዳኒ ማሊያ።

18 ዬዖር ታኣኒ ታ ዓጮ ካኣቲና ዋላ ሪሞኔ ጌይንታ፡ ሶኦሪያ ዓጮ ያኦዛህ ካኣሽኪንታ ማኣር ጌሊ ዒዛም ዚጌያ ማዕቲያ ናንጊና ናንጋ ጎዳ ታኣም ዓቶም ጋዓንዳህ ታ ጉሙርቃኔ፤ ጎኔ ዒ ታኣም ዓቶም ጋዓንዳኔ» ጌዔኔ።

19 ዔልሳዒ ዒዛ፡- «ኮሺ ዴንዴ!» ጌዔም ዒዚያ ሳራህ ዴንዴኔ። ዒዚ ዒማና ዳካ ሃኪ ዴንዳዛ፡

20 ዔልሳዒኮ ዓይላህ፡ ጊያዜ፡- «ታ ጎዳህ ዔኤቢ ፔቲታዎ ጩጊሱዋ? ኒዒማኔ ጉሪ ዳዳኪባይ! ዬይ ሶኦሪያ ዓህህ ዒዛም ዒንጌ ባኮ ዒዚ ዔዔካንዳዎ ዓቲኔ፤ ናንጊና ናንጋ ጎዳ ሃይቆ! ታ ዬያ ዓህ ጊንዎ ዑኩ ሩኡሪ ዴንዳ ፔቲ ባኣዚታዎ ዔኩዋ ሃሻዓ» ጌዒ ዒኖና ማሌኔ።

21 ዬዖር ዒዚ ኒዒማኔ ጊንዎ ጳሽኪ ዴንዴኔ፤ ዒማና ኒዒማኔ ሺሪ ዛጋንቴ ፔቲ ዓሲ ጳሽኪ ሙካያ ጋዓዛ ዒዚ ሳርጌሎ ያይታፓ ኩዲ፡- «ዋይቲይ? ኮሽቲዋይ?» ጌዒ ያኦጩኔ።

22 ጊያዜ ማሃዎ፡- «ሙኮ ታኣኒ ኮሺ ዓኣዎ ሙኬኔ፤ ታ ጎዳህ ኮይላ ጌማራ ማርጌ ዓኣ ዔፕሬኤማ ዓጮይዳ ናንጋ፡ ያኦሲ ማሊያ ኬኤዛ ዓሶ ባኣካፓ ላምዎ ዓሲ ዒ ዔሪባኣንቴ ሽኦቹዋ ሙኬም ላኣሚ ላኣሚ ማይንቶ ላምዎ ዲማ ዲማ ማኣዎና ሃይህታሚ ያይዶ ኪሎ ማዓ ሹቹ ቢራና ኔ ዒንጋንዳጉዲ ኬኤዛም ጌዒ ኔ ኮራ ታና ዳኬኔ» ጌዔኔ።

23 ዬዖር ኒዒማኔ፡- «ሂዴቶ ሃዳራ ታ ኔኤም ላሆ ሺያ ማዓ ሹቹ ቢራ ዒንጋንዳኔ» ጌዔኔ፤ ዒዚ ጌዔ ጎይዎማ ዬያ ቢሮ ላምዎ ቃርዒቲና ከንህ፤ ሃህ ላኣሚ ላኣሚ ማይንቶ ላምዎ ዲማ ዲማ ማኣዎዋ ዒዛኮ ላምዎ ዓይሌና ኬዲሲ ጊያዜኮ ቤርታ ቤርታ ዴንዳንዳጉዲ ዳኬኔ።

24 ዒማና ዔልሳዒ ናንጋ ጌማሮ ዔያታ ሙኪ ሄላዛ፡ ጊያዜ ላምዎ ቃርዒቶህህ ዔኪ ፔ ማኣሪ ጌልዛዎ ኒዒማኔኮ ዓይሎ ሳራህ ማሂ ዳኬኔ።

25 ዬካፓ ዒዚ ጋር ጌላዛ፡ ዔልሳዒ፡- «ኔ ዋካፓ ሙኬይ?» ጌይ ዒዛ ያኦጩኔ።

ጊያዜ፡- «ዓህ! ታ ጎዳህዮ! ዓንኮዋ ታ ዴንዳባኣዋይ» ጌዔኔ።

26 ዔልሳዒ፡- «ዓህ ኔኤና ጌሰታኒ ሳርጌሎ ያይታፓ ኩዳኣና ታኣኒ ዓያናና ኔ ኮይላቲዋዳዳ? ማኢሽ፡ ማኣዓ፡ ዛይቶ ሪማቶ ማይንታ ዋይኖ ቱኮንዶ ጎሽንታ፡ ማራይያ ማዎም ባይ፤ ሃህ ማዶ ማዳ ዓሲያ ዔኪያ ኮይላያቲዋሴ! ኔ ሃህ ዓህዳፓ ዔኬ ባካ ኔኤኮ ዳቢንቲኬ፤

27 ዬዖር ኒዒማኔ ዓርቄ ዶርዓህ ኔና ዓርቃንዳኔ፤ ኔናንታ ኔ ዜርዎንታይዳፓ ናንጊና ዬይ ዶርዓህ ሺኢኩዋያ ማዓንዳኔ!» ጌዔኔ።

ጊያዜ ዒኢካፓ ከሰኪ ዳንዳንቴ ዬይ ዑፃ ከሰካ ደርዓሢ ዒዛ ዓርቄም ዒዛኮ ዑፃ ሻቺጉዲ ቦኦሬኔ።

6

ከሪ ዋእፃ ጌሌ ሄርጎ ዔልሳዒ ከሴ ጎይፃ

1 ዔልሳዒ ሱኡጌ ማዔም ማዳ፣ ፆኦሲ ማሊፆ ከኤዛ ዲቦ ዓሳ ዔልሳዒ ከይላ፡- «ኮ ዋላ ቡኪንቶ ዳዓ ከኤፃ ኦኡም ዳኮኔ፤

2 ዬያር ዮርዳኖሴ ዋር ዳንዲ ዒኢካፓ ሚሢ ተቁዔ ካፆ ኦ ዳዓንዳ ከኤሢሢ ዒኢካ ኦ ማዦም!» ጌዔኔ።

ዔልሳዒ ዔያቶም፡- «ቃራኮ!» ጌዔኔ።

3 ዓሚና ዬያቶ ፆኦሲ ማሊፆ ከኤዛዘንሢሢ ፔቴ ዓሲ ዔልሳዒ ዔያቶና ዋላ ዓኣዳንዳጉዲ ፆኦሪም ዒዚ ዓኣዳኒ ዔኤዒ።

4 ዋላ ዳንዳኔ፤ ዬካፓ ዮርዳኖሴ ዋር ሄላፆ ሚፆ ተቁፆ ዓርቄኔ፤

5 ዬያቶይዳፓ ፔቴሰኮይ ሚፆ ተቃኔ፤ ዓሚና ዒ ዔራዋንቴ ሄርጎ ከሪ ዳኤፖ ዋእፆይዳ ጌሌኔ፤ ዬይ ዓሢ ዒላታፆ፡- «ታ ጎዳሢፆ! ታ ዋይታንዳይ? ሄርጎ ታኣኒ ዔርጊ ዔኮይኮ!» ጌይ ዔልሳዒም ከኤዜኔ።

6 ዔልሳዒ ዒዛ ኮይላ፡- «ዋማ ዛላ ኮዳይ?» ጌይ ፆኦሪ።

ዓሢ ሄርጎ ኮዳ ቤዞ ዳዋዛ ዔልሳዒ ፔቴ ሚሢ ተቁ ዔኪ ዋእፆይዳ ዓጋፆ ሄርጎ ዋእፆ ዑፃ ከሰኪ ዳዓንዳጉዲ ማሄኔ፤

7 ዬካፓ ዔልሳዒ፡- «ሄርጎ ዔኮ» ጋዓዛ፡ ዓሢ ሂርኪ ጌይ ዔኮኔ።

ሶኦሪያ ዓጮ ፖኦሊሳ ፆሎና ባሺንቴሢ

8 ዬኖ ዋደና ሶኦሪያ ካኣቲ ዒሰራዔኤሌና ዋላ ፆልቲ ፆልቲ ዓኣፆ ፔኤኮ ፖኦሊሶ ሱኡጎና ዋላ ዘርቲ ዲንኪ ዳፆንዶ ቤሲ ደኦሬኔ፤

9 ዔልሳዒ ጋዓንቴ፡- «ሶኦሪያ ዓሳ ካቲ ዳዒ ኔና ካፒ ዓኣሢሮ ዬኖ ቤዜሎ ባንሢ ዳንዲፖ» ጌዒ ዒሰራዔኤሌ ካኣቲም ከኢታ ዳኮኔ።

10 ዒሰራዔኤሌ ካኣቲ ዒኢካ ናንጎ ፖኦሊሶም ላቲ ከኤዜሢሢ ፖኦሊሳ ዔሪ ካፒሢ ዓርቄኔ፤ ዬኖጉዲ ሚርጌ ማይንቴ ዔያታ ማዳኔ።

11 ፆዲ ማዲንቴሢሮ ሶኦሪያ ካኣቲ ሚርጌና ዳጋዲ ፖኦሊሶ ሱኡጎ ዔኤላፆ፡- «ኮ ባኣካፓ ዒሰራዔኤሌ ካኣቲና ዋላ ዳሚና ዒገንቴ ዓሲ ዓኣቲ ታኣም ከኤዙዋቴራ?» ጌዔኔ።

12 ዬያቶ ባኣካፓ ፔቴሰኮይ፡- «ካኣቲዮ፡ ኦ ባኣካፓ ዬያይዳንዳ ዓሲ ፔቴታፆ ባኣሴ፤ ኔ ላሃ ቆልፆ ጋራ ጌሰታ ባኮ ቢያ ዓይሱዋፆ ዒሰራዔኤሌ ካኣቲም ፔጋሲ ከኤዛያ፡ ዔልሳዒ ጌይንታ፡ ፆኦሲ ማሊሢ ከኤዛ ዓሲሰኮይ ዓኣኔ» ጌዔኔ።

13 ሶኦሪያ ካኣቲ ዲማና፡- «ዲዚ ዓኣ ቤዛ ኮዑቀቲ፤ ታኣኒ ዓሲ ደኪ ዲዛ ዓርቁሳንዳኔ» ጌዔኔ።

ዔልሳዒ ደኣታኔይዳ ናንጋሢ ዓሲ ዲዛም ከኤዜኔ፤

14 ዬያር ፓርንታ ፓራሢ ጎቻ ያይቶንታ ገኢሊሺ ዔኬ፥ ፖኦሊሴ ካኣቲ ዲኢካ ደኬኔ፤ ዔያታ ደማ ደንዲ ካታሜሎ ማንጌኔ።

15 ዚር ጉቴሎ ጉቴ ዓማ ዔልሳዒኮ ማዶ ማዳሰኬይ ገንዓፓ ዔቂ ማኣር ጋሮ ከሰካንቴ ፓርንታ ሳርጌላ ያይታንታ ዔኪ ዓኣ ደቢ ፖኦሊሴ ካታሜሎ ማንገሊ ዓኣሢ ደንቄኔ፤ ዬካፓ ዬይ ዓሢ ዔልሳዒ ኮይላ ማዒ ሙካፆ ዑኡዞ ፔኤኮ ደገዲ፡- «ታ ጎዳ! ኑ ኩዳኔ! ኑ ዋዎይታንዳይ?» ጌዔኔ።

16 ዔልሳዒ ዲማና፡- «ኔ ዋይታይ ዒገጨፖ፤ ዔያቶና ዋላ ሙኩ ያሎ ዓሶፓ ባሼ ኑኡና ዋላ ያላኒ ገኢገሊ ዓኣ ፖኦሊሳ ባሼኬ» ጌዔኔ።

17 ያዲ ጋዓፆ ዔልሳዒ፡- «ናንገና ናንጋ ጎዳሢዮ! ሃይ ዓሢ ደንቃንዳጉዲ ዓኣፖ ዒዛኮ ቡሌ!» ጌዒ ሺኢቄኔ፤ ዲዚ ሺኢቄ ጎይፆ ዲዛም ማዶ ማዳሢኮ ዓኣፖ ናንገና ናንጋ ጎዳ ቡሌም ጌሜር ጎኣባ፥ ዔልሳዒ ኮይሎይዳ ሚርጌ ታሚ ፓርና ሳርጌላ ያይታና ዔቂ ዓኣሢ ዒ ደንቄኔ።

18 ዲማና ሶኦሪያ ዓሳ ያሎር ሎኣፓ ኬዲ ሙካዛ ዔልሳዒ፡- «ናንገና ናንጋ ጎዳሢዮ! ሃያ ዓሶኮ ዓኣፖ ባይዘ!» ጌዒ ሺኢቃዛ፥ ናንገና ናንጋ ጎዳ ዔልሳዒኮ ሺኢጲፆ ዋይዚ ዓኣፖ ዓሶኮ ባይዜኔ።

19 ዬካፓ ዔልሳዒ ዔያቶ ባንሢ ሙካፆ፡- «ጎይፆ ዒንሢ ዣኣሌኔ፤ ዒንሢ ኮዓ ካታሜላ ሃኖቱዋሴ፤ ዒንሢ ኮዓ ዓሢ ኮይላ ታ ዒንሢ ዔኪ ዓኣዳንዳኔ፥ ሃኒ ዬዑቀቲ» ጋዓፆ ዔኪ ዔያቶ ሳማሪያ ካታሞ ደንዳኔ።

20 ዔያታ ካታሞ ጌጌላዛ ዔልሳዒ፡- «ናንገና ናንጋ ጎዳሢዮ! ዔያታ ዛጋንዳጉዲ ዓኣፖ ዔያቶኮ ቡሌ!» ጌዒ ሺኢቄኔ፤ ናንገና ናንጋ ጎዳ ዒዛኮ ሺኢጲፆ ዋይዚ ዔያቶኮ ዓኣፖ ቡላዛ ዔያታ ሳማሪያ ካታሞይዳታሢ ዔሬኔ።

21 ዲማና ዒሰራዔኤሌ ካኣቲ ሶኦሪዮ ዓሶ ደንቃፆ፡- «ታ ጎዳ! ታ ዔያቶ ዋዶም? ዋዶም ታ ዔያቶ?» ጌዒ ዔልሳዒ ኮይላ ያኑጨኔ።

22 ዔልሳዒ ማሃዮ፡- «ዔይዔ! ሃኣታ ዓታዛ ጨንቾ ዓፓርና፤ ሃሃ ሂኢኸና ኔኤኒ ዲዒ ዔኬ ፖኦሊሶታዎ ዋዳንዳያ ኮይሱዋሴ፤ ዬያይዳፓ ዔያታ ሙዓንዳ ባኣዚና ዑሽካንዳ ባኣዚና ዒንገጋፓ ዔያቶኮ ካኣቲ ባንሢ ማሂ ዳኬ» ጌዔኔ።

23 ዬያር ዒሰራዔኤሌ ካኣቲ ዔያቶም ሚርጌ ሙኡዚ ገኢገሺኔ፤ ዔያታ ሙዒ ሚሽኬሰካፓ ሶኦሪያ ካኣቲ ባንሢ ማሂ ዔያቶ ዳኬኔ፤ ዬማፓ ዓርቃፆ ሶኦሪያ ዓሳ ዒሰራዔኤሌ ዓሶ ያሊፆ ሃሽኔ።

ሳማሪያ ካታሞኮ ማንገንቶ

24 ዳካ ዎዴ ዴዔሰካፓ ሶኑሪያ ካኣቲ፣ ቤንሃዳዴ ፖኦሊሶ ጉቤ ዒሰራዔኤሌ ያላንዳጉዲ ዔቁሲ፣ ሳማሪያ ካታሞ ዴንዲ ማንገኔ፤

25 ዔያታ ዬኖ ካታሞ ማንገህረ ሙዖ ባኣዚ ባይቄም ዴኤፒ ናይዚ ከሰካዛ ፔቲሃሬ ቶኦኪ ሳሊታሚ ማዓ ሹቸ ቢራ፤ ላምዖ ዔኤታ ገራኣሜ ማዓ ደኣሌ ሺኢዢ ደንጎ ማዓ ሹቸ ቢራ ዔኪህሂ ዓርቄ።

26 ፔቲ ከሊ ዒሰራዔኤሌ ካኣቲ ካታሜሎኮ ከኤሎ ዲሮ ዑፃ ሃንታንጉቴ ፔቲ ላኣሊሰከና ዑኡዞ ዴጊዲ፡- «ካኣቲዮ፣ ሃዳራ ታና ማኣዴ!» ጌይ ዒላቴ።

27 ካኣቲ ዒዞ ኮይላ፡- «ናንገና ናንጋ ጎዳ ኔና ማኣዳኒ ጌይባኣንቴ ታኣኒ ኔና ዓይጎ ማኣዳኒ ዳንዳዓይ? ዛርጌ ታኣኮ ዓኣ ጌዔምሞ? ጨኡጳና ዎይኔ ዓኣኔ ጌይዳይ ኔ ጋዓሂ?»

28 ሂንዳ ከኤዜ፣ ሜታ ኔኤኮ ዓይጎዳይ?» ጌዔ። ዒዞ ማሃዖ፡- «ቤርታኣ ዓቦ ሃና ላኣሌላ ሃኖ ኔ ናዖ ኑ ሙዓንዳኔ፤ ዚሮ ታ ናዖ ኑ ዎላ ሙዓንዳኔ» ጌዔ።

29 ዬያሮ ታ ናዖ ካሂ ኑ ሙዔ፤ ዚሬሎ፡- «ኔ ናዖ ዔኪ ሙኬ ኑ ሙዖም» ጌይ ታ ዒዞ ያኡጫዛ፣ ዒዞ ጋዓንጉቴ ናዖ ዓኣቸኔ» ጌዔ።

30 ካኣቲ ዬያ ዎይዞዖ ያዩ ፔኤኮ ማኣዓሂ ዳርዘኔ፤ ዒዚ ዬኖ ዓቦ ከኤሎ ዲያ ዑፃ ከሰኪ ዓኣሂሮ ዒዞኮ ኮይላ ዓኣ ዓሳ ማኣሂኮ ዴማ ሲዬ ማኣዖ ካኣቲ ማይንጉቴ ዓኣሂ ዴንቄ።

31 ካኣቲ ዒማና ዑኡዞ ፔኤኮ ዴጊዲ፡- «ሃኖ ዓባ ጌላንዳሂኮ ቤርታ ሳፓዔ ናኣዚ፣ ዔልሳዒኮ ቶኦኮ ታ ቲቁሲባኣቴ ያኦሲ ታና ባይዞም!» ጌዔ።

32 ዒማና ዒዚ ኔጉሞዖ ዔልሳዒ ዔኪ ሙካንዳ ከኢታ ዓሲ ዳከኔ።

ዔልሳዒ ዒዞ ዛጋጊ ሙኬ ጋርቸ ዓሲና ዎላ ፔ ማኣራ ዓኣኔ፤ ካኣቲ ዳከ፣ ከኢቶ ዓሂ ሙካንዳሂኮ ቤርታ ዔልሳዒ ጋርቸንሂ ኮይላ፡- «ዬይ፣ ዓሶ ዎዳሂ ታና ዎዳሻጊ ፔቲ ዓሲ ዳከኔ! ዒዚ ሃይካ ሙካማና ካሮ ዎዎዳፎቴ፤ ጋሮ ጌልዚፖቴ፤ ካኣቲ ዒዞ ገንፖ ሙኪ ሙኪኬ» ጌዔ።

33 ዬያ ጌዒ ዒ ከኤዚ ጋፑዎንጉቴ ካኣቲ ዔርቲባኣ ጎይሂና ሙካዖ፡- «ሃያ ሚታሂ ኑ ገዳ ዔኪ ዬዔሂ ናንገና ናንጋ ጎዳከ፤ ሂዳዖ ማይ ኑና ዒ ማኣዳንዳኔ ጌዒ ታ ዓይጎ ካፓይ?» ጌዔ።

6:29 ላሚ. ዎማ 28:57፤ ዓ.ቃ. ማ 4:10።

7

1 ዔልሳዒ፡- «ናንገና ናንጋ ጎዳ ጋዓ ባኮ ዋይዜ! ዚሮ ሃይማ ዋዴ ሳማሪያይዳ ሃይሃ ኪሎ ማዓ ቃራ ዛርጌ ዲኢሊ፤ ሃሃ ጊንሣ ላሆ ኪሎ ማዓ ዔልሳ ታጾ ፔቴ ጊራኣሜ ማዓ ሹቹ ቢራም ሻንቹጎታጎዳኔ» ጌዔኔ።

2 ዒማና ካኣቲኮ ዔርቲያ ማዔ ደንዛሰኬይ ዔልሳዒ ኮይላ፡- «ናንገና ናንጋ ጎዳ ፔኤሮ ጫሪጎጮ ቡሊ፣ ሃኣኮ ዒርዚጉዲ ዋርቁሴቴያ ዬይ ፔቴታዎ ማዓኒ ዳንዳዑዋያኬ!» ጌዒ ቦሃ ጌሰቴኔ።

ዔልሳዒ ዬያ ዓሢም፡- «ዬያ ሃኣኮ ዓኣፖና ኔኤኒ ዛጋንዳኔ፤ ጋዓንቴ ዬያ ፔቴታዎ ኔ ሙዓዓኬ!» ጌዔኔ።

ሶኦሪያ ፖኦሊሶኮ ጳዠ

3 ዑፃ ኬሰካ ደርዓሢና ዓርቁንቴ፣ ያይዶ ዓሲሰኬንሢ ሳማሪያ ካታም ጌሎ ካራ ዓኣኔ፤ ዬንሢሢ ዓሲሰካ ዋሊ ኮይላ፡- «ኑ ሃይቃንዳያ ሄላጎዳኣና ሃይካ ዓይጋ ዴዓይ?»

4 ኑኤኒ ካታም ጌሎቴያ ኑና ማኣዳንዳ ባኣዚ ባኣሴ፤ ሃይካ ኑ ዴዔቴያ ካታም ኑ ጌሎቴያ ናዮና ሃይቢፓ ኑ ዓታዓኬ፤ ዬያሮ ዔቁ ኑኤኒ ሶኦሪያ ዓሳ ዴንኪ ዴዔ ቤዞ ዓኣዶም፤ ዔያታ ዋዲዋዎ ሃሹቴ ኑ ዓታጎዳኔ፤ ዔያታ ኑና ዋዳቴ ዋንዴያ ኑ ዓታኑዋኣሢሮ ሃይቁኬ» ጌዔኔ።

5 ዬካፓ ሳዓ ሃባርቲ ዓማዛ ሶኦሪያ ፖኦሊሳ ዴንኪ ዴዔ ቤዞ ዔያታ ዴጎዴኔ፤ ጋዓንቴ ዒኣካ ዔያታ ሙካኣና ፔቴታዎ ዓሲ ባኣሴ፤

6 ዒማና ሶኦሪያ ዓሲም ፓርና ሳርጌላ ያይታና ዔኪ ሙካ ዲቢ ፖኦሊሴ ካኣኒ ማላ ዑኡሲ ናንገና ናንጋ ጎዳ ዋይዚሴሢሮ ሶኦሪያ ዓሲም ዒሰራዔኤሌ ካኣቲ ሂኢታ ዓጮ ካኣቲንታ ጊብፄ ዓጮ ካኣቲንታ ዔያቶኮ ፖኦሊሶማኣ ሚኢሹ ጨጋኒ ጌሰቴ ዔኪ ያላሳኒ ሙኬያ ማሌኔ።

7 ዬያሮ ዬና ዋንቶ ሶኦሪያ ዓሳ ዔያቶኮ ማኣርንታ ፓራሢንታ ሃርንታ፤ ጌይፃ ጉርዶ ቢያ ሃሺ ሹምፖ ሌሊ ዓይሳኒ ጳሽኪ ዴጎዴኔ።

8 ዑፃ ኬሰካ ደርዓሢና ዓርቁንቴ፣ ያይዶ ዓሲንሢ ሶኦሪያ ዓሳ ዴንኪ ዴዔ ቤዞ ሙኪ ሄላፃ ፔቴ ማኣሪሰኬና ጌሌኔ፤ ዒኣካ ዔያታ ዴንቁ ባኮ ቢያ ሙዒ ዑሽኬኔ፤ ዔያታ ዴንቁ ቢርንታ ዋርቆንታ ማኣዓሢንታ ዔኪ ዴጎዲ ዓኣቼኔ፤ ጊንሣ ሃሃ ማዒ ሙኪ ማሌ ማኣሪሰኬና ጌሊ ዒማይዴኔ፤

9 ዬካፓ ዋሊ ኮይላ፡- «ኑ ቃራ ማዶ ማዲባኣሴ! ሃያ ኮዠ ሃይሶ ዓኣቹ ዓይሳጎዳያ ኮይሱዋሴ! ሃያ ኮዠ ሃይሶ ኑኤኒ ዴንዲ ኬኤዙዋዎ ሳዎ ካርዜቴ ኑኤኮ ዳቢንቲ ማዓንዳኔ፤ ዬያሮ ኑ ሃሢ ዴንዲ ካኣቲኮ ፖኦሊሶ ሱኡጎም ኬኤዛንዳኔ!» ጌዔኔ።

10 ዬያ ጌዔስካፓ ሶኦሪያ ዓሳ ዲንኪ ዴዔ ቤዛፓ ሳማሪያ ካታሞ ማዒ ዴንዴኔ፤ ዒኢካ ዔያታ ሄሄለፖ ካታሞ ጌሎ ካሮ ካፓ ዓሶ ዔኤሊ፡- «ሶኦሪያ ዓሳ ዲንኪ ዴዔ ቤዛ ኑ ዴንዴኔ፤ ጋዓንቲ ዒኢካ ኑኡኒ ዴንቄ ዓሲ ባኣሴ፤ ዋይዚንቲ ዑኡሲያ ባኣሴ፤ ፓራሂንታ ሃሮንታ ቱኡቲ ዓኣኔ፤ ዓፒሎና ማዢንቲ ማኣራኣ ዶቂንቲ ቤዛ ዓኣኔ፤ ሶኦሪያ ዓሳ ሃሺ ዴንዲናኣኮኬ» ጌዒ ኬኤዜኔ።

11 ካታሞ ጌሎ ካሮ ካፓ ዓሳ ዬያ ሃይሶ ዓሶሞ ኬኤዜሢሃሮ ሃይሳ ካኣቲ ማኣሮይዳ ዋይዚንቲኔ።

12 ዒማና ሳዓ ዲሚኬ፤ ካኣቲ ላሄ ቤዛፓ ዔቁ ዒዛኮ ዶንዘ ማዔ፥ ቢታንታ ዓኣ ዓሶሞ፡- «ሶኦሪያ ዓሳ ማሌ ማሊፆ ታ ዒንሢሃሞ ኬኤዘሞ! ዔያታ ኑኡኒ ሃይካ ናይዲንቲ ዓኣሢ ዔራሬ፤ ዬያሮ ዔያታ ፕሮዶ ፔኤኮ ሃሺ ካያ ዴንዲ ፑኒ ካታኒ ዓኣዴኔ፤ ኑኡኒ ሙፖ ባኮ ኮይ ኬሰካኣና ሹምፔና ዓኣንቲ ኑና ዔያታ ዓርቂ ኑኡኮ ካታሞዋ ዔካንዳኔ» ጌዔኔ።

13 ዒዛኮ ዶንዘይዳፓ ፔቴሰኬይ፡- «ሃይካ ካታሞይዳ ሃይቁዋፖ ዓቲ ዓኣ ዓሳ ቤርታ ሃይቁ ዓሶጉዲ ሃይቢ ዓታዓኬ፤ ዬያሮ ሶኦሪያ ዓሳ ዋዋይቲቲያ ዔራሬኒ ዳካ ዓሲ ዶኦሪ ኑኡኒ ዳኮሞ፤ ሃይቁዋፖ ቶሊ ዓቲ ፓራሂፓ ዶንጎ ፓሮ ዔያታ ዔኪ ዴንዶንጎ» ጌዔኔ።

14 ዬካፓ ዔያታ ዳካ ዓሲ ዶኦሪኔ፤ ዒማና ካኣቲ ዬንሢ ዓሶንሢ ላሞፖ ሳርጌላ ያይታ ቶጊሲ ሶኦሪያ ዓሶ ፖኡሊሳ ዋዋይቲቲያ ሙሪ ማዓንዳጉዲ ዓይሢ ዳኬኔ።

15 ዬያሮ ዓሳ ዮርዳኖሴ ዋሮ ሄላንዳኣና ዓኣዴኔ፤ ጎይፆይዳ ዔያታ ሶኦሪያ ዓሳ ጳሽካፖ ኬኤሪ ኬኤሪ ዓኣዴ ማኣዓሢና ዓንጋሞና ቢያ ዴንቄኔ፤ ዬካፓ ማዒ ሙኪ ዬያ ቢያ ካኣቲሞ ኬኤዜኔ።

16 ዴዔ ዒማና ዑኬና ጳሽኪ ዴንዳፖ ሶኦሪያ ዓሶ ጉርዶ ቡሬኔ፤ ናንጊና ናንጋ ጎዳ ቤርታዲ ኬኤዜ ጎይፆ ሃይሃ ኪሎ ማዓ ቃራ ዛርጌ ዲኢሊ፤ ሃሃ ጊንሣ ላሆ ኪሎ ማዓ ዔልዓ ታጳ ፔቴ ጊራኣሜ ማዓ ሹቺ ቢራሞ ሻንቺንቲኔ።

17 ዒሰራዔኤሌ ካኣቲ ዒማና ካታሞ ጌሎ ካሮ ካፒሳንዳጉዲ ፔቴ ዒዛኮ ዶንዘሰኬያ ዓይሢሞ ዒ ሱኡጋቶና ካፒሲሳኔ፤ ዬይ ዶንዘሢ ዒኢካ ዓኣንቲ ዴራ ዲርጋፖ ዒዛ ሃርቁሞ ዒዚ ሃይቄኔ፤ ዬይ ያዲ ማዔሢ ካኣቲ ዔልሳዒና ጌሰታኒ ዴንዴያና ዔልሳዒ ዬያ ዓሢሞ ኬኤዜ፥ ያኦሲ ማሊፆ ኩሜሢሮኬ።

18 ዔልሳዒ ካኣቲሞ፡- «ዚሮ ሳማሪያ ካታሞይዳ ሃይሃ ኪሎ ማዓ ቃራ ዛርጌ ዲኢሊ፤ ሃሃ ጊንሣ ላሆ ኪሎ ማዓ ዔልዓ ታጳ ፔቴ ጊራኣሜ ማዓ ሹቺ ቢራሞ ሻንቺንታንዳኔ» ጌይ ቤርታ ኬኤዘናኣኮኬ፤

19 ዬያ ዒ ጋዓኣና ካኣቲኮ ደንዛሢ፡- «ናንገና ናንጋ ጎዳ ፔኤሮ ጫሪንጮ ቡሊ ሃኣኮ ዒርዚጉዲ ዋርቁሴቲታዎ ዬይ ፔቲታዎ ማዓኒ ደንዳዑብ!» ጌዔኔ። ዬያሮ ዔልሳዒ ዒዛም፡- «ዬያ ሃኣኮ ዓኣፒና ሌሊ ኔ ዛጋንዳኔ፤ ጋዓንቲ ዬያ ፔቲታዎ ኔ ሙዓዓኩ» ጌዔኔ።

20 ዬያ ካኣቲኮ ደንዛሢ ሳማሪያ ካታም ጌሎ ካራ ዳራ ሄርቁ ዋደሢ ያኦሲ ማሊያና ኬኤዚንቲ ባካ ኩሜሢሮኩ።

8

ሱኔሜ ካታማ ናንጋ ላኣሌላ ቤቲ ቤዛፓ ማዔሢ

1 ናዎ ዒዛኮ ዒ ሃይባፓ ዔቁሴ፣ ሱኔሜ ካታማ ናንጋ ላኣሌሎም ዔልሳዒ ሃያኮ ቤርታ፡- «ላንካይ ሌዔ ጉቤ ሃይ ዓጫ ሉማዳንዳጉዲ ናንገና ናንጋ ጎዳ ዓይሢኔ፤ ዬያሮ ኔ ማኣሮ ዓሶና ዋላ ሃይቢፓ ዓታኒ ሜሌ ቤሲ ቤቲ ዳንዴ» ጌዒ ኬኤዜያኩ።

2 ላኣሌላ ዒማና ዔልሳዒ ዘሮ ዋይዚ፣ ፔ ማኣሮ ዓሶና ዋላ ፒሊሰጻኤሜ ዓጮ ቤቲ ዳንዲ ላንካይ ሌዔ ዳዔኔ።

3 ላንካዎ ሉማሢ ሌዓ ጋፓዛ ገንሣ ዒሰራዔኤሌ ዓጮ ዒዛ ማዒ ሙካዎ ዒዛኮ ማኣሮና ጎዦና ዒዛም ማሂ ዒንገንታንዳጉዲ ካኣቲ ኮይላ ያኦጫኒ ዳንዳኔ።

4 ዒማና ዔልሳዒኮ ዓይላሢ ገያዜና ዋላ ካኣቲ ጌሰታንቲ ዒዛ ዳንቁኔ፤ ካኣቲ ገያዜና ዋላ ጌሰታሢ ዔልሳዒ ያኦሲ ዋልቆና ማዳ፣ ዲቃሢ ሄርሺሳ ባኮ ዛሎ ዋይዚ ዔራኒኩ፤

5 ዔልሳዒ ሃይቁ ዓሲ ዔቁሴሢ ገያዜ ካኣቲም ኬኤዛኣና ላኣሌላ ሙኪ ዒዛ ያኦጫ ባኮ ካኣቲ ኮይላ ያኦጫኔ፤ ገያዜ ዒማና፡- «ካኣቲዮ! ላኣሌላ ሃናኩ፤ ዔልሳዒ ሃይባፓ ዔቁሴ ናዓሢ ዒዛኮ ሃያኩ!» ጌይ ኬኤዜኔ።

6 ገያዜ ካኣቲም ኬኤዜ ባካ ጎኔታሢ ላኣሌላ ካኣቲም ኬኤዜኔ፤ ዬያሮ ካኣቲ ፔቲ ቢታንቶ ዓኣ ዓሲሰኬያ ዔኤሊ፣ ዒዘሮ ማዔ ባኮ ቢያ፤ ጎዦንታ ዒዛኮ ላንካይ ሌዔ ካፃ ሃኣኮንታ ቢያ ዒዛም ዒንገንታንዳጉዲ ዓይሢኔ።

ዔልሳዒና ሶኦሪያ ካኣቲ ቤንሃዳዴና

7 ሶኦሪያ ካኣቲ፣ ቤንሃዳዴ ሃርገንቲ ዓኣንቲ ዔልሳዒ ዴማሰቆ ሙኩኔ፤ ካኣቲ ዒማና ዔልሳዒ ሙኩሢ ዋይዚ፣

8 ዒዛኮ ደንዘ ባኣካፓ ፔቲ፣ ዓዛሄሌ ጎዎሢ ዔኤላዎ፡- «ያኦሲ ማሊያ ኬኤዛሢም ዒንጎ ባኣዚ ዔኪ ዳንዲጋፓ ታኣኒ ሃያ ደርዓሰካፓ ዳቃንዳቲያ ሃይቃንዳቲያ ናንገና ናንጋ ጎዳ ታኣም ዒዚ ያኦጫም ዒዛ ሺኣቁ» ጌዒ ዓይሢኔ።

8:1 2ካኦቶ. ማ 4:8-37::

9 ይደር ዓዛሄሌ ደማሰቆይዳ ዓአ፡ ኮዡ ኮዡ ባኮ ቢያ ምድታሚ ጋአሎና ጫኣኒ ዔልሳሳሚ ዔኪ ደንዳኔ፤ ዓዛሄሌ ደንዳኒ ዔልሳሳሚ ደንቃ፡- «ኔኤኮ ናዖ ማዔ፡ ካኣቲ ቤንሃዳዳ ሃርጋጋ ጳቃንዳቲያ ሃይቃንዳቲያ ዒዛም ኔ ከኤዛንዳጉዲ ታና ምጭም ዒ ዳኮኔ» ጌዔኔ።

10 ዔልሳሳሚ ማሃ፡- «ቤንሃዳዳ ሃይቃንዳሚ ናንገና ናንጋ ጎዳ ፔጋሲ ታኣም ከኤዘኔ፤ ኔኤኒ ጋዓንቴ ዒዛም፡- «ኔ ጳቃንዳኔ» ጌዔ ከኤዘ» ጌዔኔ፤

11 ዩካፓ ዔልሳሳሚ ዓአፖ ካር ቱኪ ዒጊቻ ጎይሢ ዓዛሄሌ ዛኮኔ፤ ይደር ዓዛሄሌ ማሊ ሜታዳኔ፤ ዒማና ዔልሳሳሚ ኔጉዋዖ ዩኤፒ ዓርቄኔ።

12 ዓዛሄሌ ዒዛ ኮይላ፡- «ታ ጎዳ፡ ዓይጋ ኔ ዩኤካይ?» ጌዔ ምጭኔ።

ዔልሳሳሚ ማሃ፡- «ዒሰራዔኤሌ ዳርይዳ ኔ ማዳንዳ ባኮ ታ ዔሬሢረከ፤ ኔ ዔያቶኮ ዋርዲዮ ቤዘ ታሚና ሚቻንዳኔ፤ ደዲ ደዲ ማዔ ጳጌሢ ኔ ዔያቶኮ ቲቃንዳኔ፤ ናኣቶ ዔያቶኮ ኔኤኒ ሹቲዳ ጳዲሲ ዲኡሳንዳኔ፤ ጎጳይንዶ ማዔ ላኣሎኮዋ ኔኤኒ ጎጳ ዳርዛንዳኔ» ጌዔኔ።

13 ዓዛሄሌ ዒማና፡- «ታኣኒ ፔቲታዖ ማኣዳ ባኣዚ ባኣ፡ ላኣፓ ዓሲከ! ታኣኒ ዩያ ዓይጎ ዋልቄና ማዳይ?» ጌይ ምጭኔ።

ዔልሳሳሚ ዒዛም ማሃ፡- «ኔኤኒ ሰኣሪያ ካኣቲ ማዓንዳሚ ናንገና ናንጋ ጎዳ ታኣም ፔጋሲ ዳዌኔ» ጌዔኔ።

14 ዩካፓ ዓዛሄሌ ካኣቲ፡ ቤንሃዳዳ ኮይላ ሙካዛ፡- «ዔልሳሳሚ ዋዚ ጌዔይ?» ጌይ ካኣቲ ምጭኔ።

ዓዛሄሌ ዒዛም፡- « ኔኤኒ ጎኔ ጳቃንዳኔ» ጌዔ ታኣም ዒዚ ከኤዘኔ» ጌዔኔ።

15 ጋዓንቴ ዚር ጉቴሎ ዓዛሄሌ ሜጲ ዓፒላ ዔኪ ዋኣሢዳ ዓጋዖ ዩያና ካኣቲ ሹኡሚ ዋዳኔ።

ዩካፓ ዓዛሄሌ ቤንሃዳዳ ቤዘ ጌሊ ሰኣሪያ ዓጫ ካኣታዳኔ።

ዪሁዳ ካኣቲ ዒዮሆራሚ
(2ዖኦሲ. ዓሃኬ 21:1-20)

16 ዒሰራዔኤሌ ካኣቲ፡ ዓክዓቤ ናኣዚ፡ ዒዮራሚ ካኣታዳንቴ ደንጋሳ ሌዖና ዒዮሳፒቄ ናኣዚ ዒዮሆራሚ ዪሁዳይዳ ካኣታዳኔ፤

17 ዒዚ ካኣታዳያና ሌዓ ዒዛኮ ሃይሢታሚ ላምዖኮ፤ ዒዚ ዩሩሳላሚይዳ ናንገ ሳሊ ሌዔ ዋይሣኔ።

18 ማቻ ዲዛኮ ዓክዓቤ ናይ ማዕሚር ዲዚያ ዓክዓቤ ማእር ዓሰጉዲ ዲሰራዔኤሌ ካኣታ ማዳ፣ ፑርቶ ማዶ ማዳ፤ ዳቢንቲ ማዶ ማዲ ናንጊና ናንጋ ጎዳ ያዩሴኔ፤

19 ናንጊና ናንጋ ጎዳ ጋዓንቲ ፔ ዓይላሢ፣ ዳውቲ ዜርፃፓ ካኣቲሞ ዔኪንዲሞኣያታሢ ጫኣቄሢር ዩሁዳ ባይዛኒ ኮዒባኣሴ።

20 ዒዮሆራሜ ካኣታዲ ዓኣንቲ ዔዶኦሜ ዓሳ ዩሁዳሞ ዋይዞ ዒፃኔ፤ ፔና ዳንዳዒ ካኣቲያ ካኣታሢኔ፤

21 ዬያር ዒዮሆራሜ ሳርጌሎ ያይቶ ቢያ ዔኪ ያላኒ ፃዓራ ዴንዴኔ፤ ዒማና ዔዶኦሜ ፖኦሊሳ ዔያቶ ማንጌሢር ዲሞና ዒዛንታ ሳርጌሎ ያይቶና ያሊሳ ሱኡጎንታ ዬያ ማንጌ ዓሰኮ ጊዴና ዳርዚ ዴንዲ ቶላዛ፣ ፖኦሊሳ ፔኤኮ ማኣሪ ማኣሪ ዴንዴኔ፤

22 ዬማፓ ዓርቃዖ ዔዶኦሜ ዩሁዳ ዴማ ዋርቃ ዋይፃፓ ኬሰኬኔ፤ ዒማና ሃሣ ሊቢና ካታማኣ ዩሁዳሞ ዋይዞ ዒፃኔ።

23 ዒዮሆራሜ ማዶ ሜሌ ባካ ቢያ ዩሁዳ ካኣቶ ሃይሳ ፃኣፒንታ ማፃእፖይዳ ፃኣፒንቲ ዓኣኔ፤

24 ዬካፓ ዒዮሆራሜ ሃይቁ፣ ዳውቲ ካታሞይዳ ካኣታ ዴኡታ ቤዛ ዴኡቲኔ፤ ዒዛ ቤዛ ዒዛኮ ናኣዚ፣ ዓካዚያሴ ካኣታዴኔ።

**ዩሁዳ ካኣቲ ዓካዚያሴ
(2ያኦሲ. ዓሃኬ 22:1-6)**

25 ዒሰራዔኤሌ ካኣቲ ዓክዓቤ ናኣዚ፣ ዒዮራሜ ካኣታዴንቲ ታጾ ለምዓሳ ሌዖና ዒዮሆራሜ ናኣዚ ዓካዚያሴ ዩሁዳይዳ ካኣታዴኔ፤

26 ዒዚ ካኣታዴያና ሌዓ ዒዛኮ ለማታሚ ለምዖ ሌዔ ማዕያ ናይኬ፤ ዒዚ ዬሩሳላሜይዳ ናንጊ ፔቲ ሌዔ ዋይሢኔ፤ ዒዛኮ ዒንዳ ዓታሊያ ጌይንታያ ዓክዓቤ ናኣዚ፣ ዒሰራዔኤሌ ካኣቲ ያምሪኮ ናኣዚ ናይኬ።

27 ካኣቲ፣ ዓክዓቤኮ ዓካዚያሴ ባይሲታሢር ዓዳ ዓክዓቤ ማእር ዓሰጉዲ ጎሜ ማዲ ናንጊና ናንጋ ጎዳ ያዩሴኔ።

28 ሶኦሪያ ካኣቲ፣ ዓዛሄሌ ዓሳ ያላኒ ዴንዴያና ካኣቲ ዓካዚያሴ ዒሰራዔኤሌ ካኣቲ ዒዮራሜና ዋላ ማዒ ያላኒ ዴንዴኔ፤ ዬያቶ ለምዖ ካኣቶኮ ፖኦሊሳ ሶኦሪያ ፖኦሊሶና ዋላ ጌሌዓዴ ዓጫ ራሞቲይዳ ያሎ ዓርቃዞ ዒዮራሜ ያሎይዳ ሂኢሺና ዴኡቲ ማኣሳኔ፤

29 ዒዮራሜ ካኣቲ ዓዛሄሌና ዋላ ራሞቲይዳ ያልቲያና ዴኡቲ ኪዖዳ ኪዖር ማይሢንታኒ ዒይዚራዔኤሌ ካታሞ ማዒ ዴንዴኔ፤ ዬያር ካኣቲ፣ ዓካዚያሴ ዒዛ ያኦጫኒ ዒኢካ ዴንዴኔ።

8:19 1ካእቶ. ማ 11:36።

9

ዒዩ ዒሰራዔኤሌይዳ ደኦሚንቲ ካኣታዳሢ

1 የኦሲ ማሊያ ኬኤዛ፡ ዔልሳዒ የኦሲ ማሊያ ኬኤዛ ዓሶ ባኣካፓ ፔቴሰኬያ ዔኤላዎ፡- «ጌሌዓዴይዳ ዓኣ ራሞቲ ዴንዳኒ ጊኢጊንቲ፤ ሃኖ ዛይታ ዓኣ የቴሎ ዔኪጋፓ፡

2 ዒኢካ ዴንዲ ሃለዎ ዒዮሳፒዌ ናኣዚ፡ ኒሚሺኮ ናኣዚ ናዎ ማዔሢ፡ ዒዩ ኮዔ፤ ዒዛ ዴንቃዎ ዒዛኮ ላጎ ባኣካፓ ዴማሲ ቆልዓ ጌልዜ፤

3 ዩካፓ ሪሚቶ ዛይቶ ዒዛኮ ቶኦካ ዋሄ፤ ናንጊና ናንጋ ጎዳ ኔና ደኦሚ ዒሰራዔይዳ ካኣታሄኔ» ጌዒ ኬኤዜ፤ ዩያይዴሰካፓ ካር ቡሊ ኔጉዋዎ ጳሽኪ ኬሰኪ ዴንዴ» ጌዔኔ፡፡

4 ዩያር የኦሲ ማሊያ ኬኤዛ፡ ዴጌሢ ራሞቲ ዴንዴኔ፤

5 ዒኢካ ዒ ሃለዎ ፖኦሊሶ ሱኡጋ ዋላ ዴዒ ጌሰታንቲ ዴንቁ፡- «ታ ጎዳ፡ ታ ኔኤም ኬኤዛንዳ ከኢታ ዓኣኔ» ጌዔኔ፡፡

ዒዩ ዒዛ ኮይላ፡- «ኔ የኦም ኬኤዛኒ ጋዓዎ?» ጌዔኔ፡፡

የኦሲ ማሊያ ኬኤዛሢ፡- «ኔኤም ታ ኬኤዛንዳኔ» ጌዔኔ፡፡

6 ዩካፓ ላሞዎንሢ ዋላ ፔቴ ኬኤሢ ጌላዛ የኦሲ ማሊያ ኬኤዛ፡ ዴጌሢ ሪሚቶ ዛይቶ ዒዩ ቶኦካ ዋሃዎ፡- «ናንጊና ናንጋ ጎዳ ማዔ ዒሰራዔኤሌ የኦዛሢ ሂዚ ጋዓኔ፤ ታ ዴር፡ ዒሰራዔኤሌ ዓሶ ዑፃ ታ ኔና ደኦሚ ካኣታሄኔ፤

7 ዩያር ኔኤኒ ዓክዓቤ ናኣዚ፡ ኔ ጎዳ ማዔ ካኣታሢ ዋዳንዳያ ኮይሳኔ፤ ዩያይዲ ታ ማሊያ ኬኤዛ ዓሶንታ ሜሌ ታኣም ማዳ ዓሶ ዔልዛቤላ ዋዳሢኮ ኮሞ ታ ማሃንዳኔ፤

8 ዓክዓቤ ማኣር ዓሶንታ ዒዛኮ ዜርፃ ቢያ ሃይቃንዳያ ኮይሳኔ፤ ታኣኒ ዒዛ ማኣራፓ ዓቲንቁ ማዔያ ቢያ፤ ዓይሌያ ማዎም ጉሪ ማዳ ዓቲንቁ ቢያ ባይዛንዳኔ፤

9 ዒሰራዔኤሌይዳ ካኣታዳ ናባፃ ናኣዚ፡ ዒዮርቢዓሜና ዓኪያሌ ናኣዚ፡ ባዕሻና ማኣር ታ ማዳ ጎይዎ ዓክዓቤ ማኣር ዓሶም ታ ዒማይዳንዳኔ፡፡

10 ዔልዛቤላ ዴኡኪንቲያ ዴኡኪንታዓኬ፤ ዒዛኮ ሌዛ ዒይዚራዔኤሌ ዓጮይዳ ካኒ ሙዓንዳኔ» ጌዔኔ፤ ዩያ ጌይ ጋፔሰካፓ የኦሲ ማሊያ ኬኤዛ፡ ዴጌሢ ካር ቡሊ ኬኤፃፓ ኬሰኪ ጳሽኪ ዴንዴኔ፡፡

11 ዒዩ ፔኤኮ ላጎ ማዔ፡ ፖኦሊሶ ሱኡጎንሢ ኮይላ ሙካዛ ዔያታ፡- «ዋይቲይ ኮሺቱዋይ? ዩይ ኔ ኮይላ ሙኬ ዣኣዣሢ ዓይጎ ኮዓ ዓሲዳይ?» ጌዒ የኦጮኔ፡፡

ዲዩ ማሃያ፡- «ሳህንታ ዲዚ ገሰታ ባኮንታ ዲንህህ ዔራያኬ» ገዔኔ።

12 ዔያታ፡- «ሳህ! ኑ ዔራዋሴ፤ ዲ ኔኤሞ ዓይጎ ገዔቲያ ሂንዳ ኑሞ ከኤዜ» ገዔኔ።

ዲዩ ዲማና፡- «ናንገና ናንጋ ጎዳ ለዲሰራዔኤሌይዳ ኔ ካአቲ ማዓንዳጉዲ ታ ኔና ዶኦሜኔ» ጋዓኔ፣ ታአሞ ገዔኔ» ገይ ዔያቶም ከኤዜኔ።

13 ኔጉሞዎ ዲዩኮ ላጎ ማዔ፣ ፖኦሊሶ ሱኡጎንህሂ ማአዓህ ፔኤኮ ከሲ ከሲ ዲዩ ሄርቂ ከሰካ ቤዘይዳ ሂኢሄኔ፤ ዬኖ ዲዚ ገዒ ከሰካ ቤዘይዳ ዲዛ ዔያታ ከሲ ዔቂሳዎ ዛዬ ዋርቄኔ፤ ዑኡዘዋ ፔኤኮ ደገዲ፡- «ዲዩ ካአታዳኔ!» ገይ ዲላቲኔ።

ዲሰራዔኤሌ ካአቲ ዲዮራሜ ዎደናህ

14-15 ዬካፓ ኒሞሺ ናአዚ ዲዮሳፒጻኮዋ ናአዚ ማዔህ፣ ዲዩ ካአቲ ዲዮራሜም ገኔ ማዶ ማዲህህ ዓርቄኔ፤ ዲዮራሜ ዬያኮ ቤርታ ሶኦሪያ ካአቲ፣ ዓዛሄሌና ዎላ ራሞቲይዳ ያልቲያና ዶኡቲ ዓአህረ ዲማና ዲይዚራዔኤሌይዳ ማይህንቲ ማይህንቲ ዓአኔ፤ ዬያሮ ዲዩ ዲዛኮ ላጎ ማዔ፣ ፖኦሊሶ ሱኡጎንህሂም፡- «ጎኔ ዲንህህ ታአና ዎላታቲ ዲይዚራዔኤሌይዳ ናንጋ ዴሮም ዴንዲ ሃይሴ ከኤዜም ዓሳ ቶላንዲህረ ፔቲ ዓሲታዎ ራሞቲይዳፓ ከሰከ ዴንዲዎጉዲ ቃዙዎቲ» ገዔኔ።

16 ዬካፓ ዲዩ ሳርጌሎ ያይቶ ቶገ ዲይዚራዔኤሌ ዴንዴኔ፤ ዲማና ዲዮራሜ ሃገ ማይህንቲ ዳቂባአሴ፤ ዪሁዳ ካአቲ፣ ዓካዚያሴያ ዲዛ ያኦጫኒ ሙኪ ዲኢካ ዓአኔ።

17 ዲይዚራዔኤሌ ካታሞ ዴዒ ካፖ፣ ከኤሎ ዲያ ዑፃ ዴዒ ካፓ ዓሲሰከይ ዲዩንታ ዲዛና ዎላ ዓአ ዓሶንታ ሙኪ ዑካህ ዴንቃዎ፡- «ፖኦሊሶ ያልዘሮ ሙካኔ!» ገዒ ዲላቲ ከኤዜኔ።

ዬያሮ ዲዮራሜ፡- «ፔቲ ዓሲ ፓሮና ዳኪጋፓ ሙካ ዓሳ ኮሺ ዓአዎ ሙካቲ ያኦጫሴ» ገዔኔ።

18 ዬይ ኪኢቶ ዓህ ፓራህ ቶገ ዴንዳዎ ዲዩ ኮይላ፡- «ኮሺ ዓአዎ ኔ ሙካቲያ ካአቲ ዔራኒ ኮዔኔ» ገዒ ያኦጫኔ።

ዲዩ ማሃያ፡- «ኮሹሞ ዛላ ኔና ያኦጫሳ ባአዚ ዓይጎዳይ? ኔኤሮ ዬያ ሃሺጋፓ ታ ገንዖ ሙኬ!» ገዔኔ።

ካታሜሎ ካፖ፣ ከኤሎ ዲያ ዑፃ ዓአ ዓህ፡- «ኪኢቶ ዓህ ዴንዲ ሙካ ዓሶና ዎላ ካአሜኔ፤ ጋዓንቲ ዲ ማዒ ሙኪባአሴ» ገይ ከኤዜኔ።

19 ሃህ ሜሌ ኪኢታ ዓሲ ዳካዛ ዲማ ጎይዎ ዲዩ ያኦጫኔ፤ ዲዩ ዬያ ኮይላ፡- «ኮሹሞ ዛላ ኔና ያኦጫሳ ባአዚ ዓይጎዳይ? ኔኤሮ ዬያ ሃሺጋፓ ታ ገንዖ ሙኬ!» ገዔኔ።

20 ካታሞ ካፓ ዓሢ:- «ለሚ ዳኪንቴ ዓሢ ሙካ ዓሶና ዎላ ዴንዲ ካኦሜኔ፤ ጋዓንቴ ዒ ማዒ ሙኪባኦሴ» ጋዓዖ:- «ፖኦሊሶ ሱኡጋሢ ሳርጌሎ ያይቶ ዣዣኦሽካ ዓሲጉዲ ዒሻኔ! ዒዚ ዓዳ ዒዩ ማላኔ!» ጌዔኔ።

21 ዩካፓ ካኦቲ፣ ዒዮራሜ:- «ታኦኮ ሳርጌሎ ያይቶ ጌኢጊሹዎቴ» ጌይ ዓሶ ዓይሣኔ፤ ሳርጌሎ ያይታ ጌኢጊሹንታዛ ዒዛንታ ካኦቲ ዓካዚያሴንታ ፔኤኮ ሳርጌሎ ያይቶ ቶጊ ዒዩና ካኦማኒ ዴንዴኔ፤ ዔያታ ዒማና ናኦቡቴር ማዔ ጎዡ ጋራ ዒዩና ካኦሜኔ።

22 ዒዮራሜ ዒዩ ኮይላ:- «ዒዩ፣ ኮሺ ዓኦ፣ ኔ ሙኪያ?» ጌይ ያኦጩኔ።

ዒዩ ማሃዖ:- «ኔ ዒንዶ ዔልዛቤሎኮ ማሌ ያኦዞ ካኦዣና ማርሾ ማዳና ሃያይዲ ሳዖ ባይዚ ዓኦንቴ ዓይጎ ኮሹሞ ዓኦይ?» ጌዔኔ።

23 ዩያር ዒዮራሜ ዑኡዞ ዳጊዲ:- «ዓካዚያሴ! ሃይ ፑርቴሞ ማላሢኬ!» ጌይ ጌይ ሳርጌሎ ያይቶ ጊንሢሞ ማሃ ጳሽኬኔ።

24 ዒማና ዒዩ ሂኢሺና ዒዮራሜኮ ካኦሎ ዴማ ዲኬኔ፤ ዩይ ሂኢዣ ዴንዲ ሳዞ ሂላሢር ዒዮራሜ ሳርጌሎ ያይቶይዳ ዓኦ፣ ዒኢካ ሎኦሚ ሃይቄኔ።

25 ዩካፓ ዒዩ ቤዲቃሬ ጌይንታ፣ ዒዛና ዎላ ማዳሢ:- «ሌዞ ዔኪ ዴንዲ ናኦቡቴ ጎዡይዳ ኬኤሬ፤ ታኦና ኔኤና ካኦቲ ዒዮራሜኮ ዓዶ፣ ዓክዓቤ ጊንዖ ኦኡኮ ሳርጌሎ ያይቶ ቶጊ ዓኦኦንቴ ናንጊና ናንጋ ጎዳ ዓክዓቤይዳ ማዳኒ ኬኤዜ ባኮ ማሊ ጳቂሢ፤

26 ናንጊና ናንጋ ጎዳ ጌዔ ባካ:- «ዚጊኖ ናኦቡቴንታ ዒዛኮ ናኦቶዎ ዎዳናሢ ታኦኒ ዛጌኔ፤ ዒዞ ሃኖ ጎዡሎይዳ ዩያ ኮሞ ታኦኒ ማሃንዳኔ» ጋዓያኬ» ጌዔኔ። ዩያር ዒዩ:- «ናንጊና ናንጋ ጎዳ ጌዔ ባካ ኩማንዳጉዲ ዒዮራሜኮ ሌዞ ዔኪ ናኦቡቴ ጎዡ ኬኤሬ» ጌይ ዒዛና ዎላ ማዳሢ ዓይሣኔ።

ዩሁዳ ካኦቲ ዓካዚያሴ ዎዳናሢ

27 ዒማና ካኦቲ፣ ዓካዚያሴ ዩያ ባኮ ቢያ ዛጋዖ ሳርጌሎ ያይቶ ቶጊ ቤትሃጋኔ ካታሞ ጳሽኪ ዴንዴኔ፤ ዒዩዎ ዒዛ ጊንዖ ዳውሲ ዳውሲ:- «ዒዞ ዎዎዳዎቴ!» ጌዒ ፖኦሊሶ ዓይሣኔ፤ ዩያር ፖኦሊሳ ዓካዚያሴ ዳውሲ ዩብሌዓማ ካታሞ ኮይላ ዓኦ ጉኡሬ ሴኤርይዴና ጳሽካንቴ ዲኬኔ፤ ዒዚ ጋዓንቴ ባሺንቴዖ ሜታዲ ማጊዶ ካታሞ ዴንዲ ሂሊ፣ ዒኢካ ሃይቄኔ፤

28 ዒዛኮ ደንዛ ማዔ፣ ቢታንታ ዓኦ ዓሳ ሌዞ ዒዛኮ ሳርጌሎ ያይቶና ዔኪ ዩሩሳላሜ ዴንዳዖ ዳውቴ ካታማ ካኦታ ዲኡታ ቤዛ ዲኡኬኔ።

9:26 1ካኦቶ. ማ 21:19።

29 ባክዲያሴ ዪሁዳይዳ ካኣታዳሢ ዲሰራዔኤሌ ካኣቲ፣ ባክዲያሴ ናኣዚ፣ ዲዮራሜ ካኣታዳንቴ ታጾ ፔታሳ ሌዖናኬ።

ዔልዛቤሎኮ ሃይቦ

30 ዬካፓ ዲዩ ዲይዚራዔኤሌ ዳንዴኔ፤ ዔልዛቤላ ዲማና ዬያ ባኮ ዋይዛዖ ዓኣፖ ኮይሎ ቲሽኪ ሚዛጳኔ፤ ቶኦኮዋ ፔኤኮ ማዢ ካኣቲዋ ማኣሮኮ ዑፃ ዓኣ ደጌ ቤዛ ዔቂ ፑልቶ ካሮና ሊካ ጎይዖ ዛጋኔ።

31 ዲዩ ካታዋ ጌሎ ካሮና ጌላኣና ዲዛ፡- «ዔኤዛይ፣ ዚምሪ! * ሃይ ኔኤኒ ኔ ጎዳ ዎዳሢ ሃይ! ሃይካ ኔና ዓይጌ ዔኪ ዬዔይ?» ጌይ ዲላቲኔ።

32 ዲማና ዲዩ ሌካ ዳግ ጌይ ዛጋዖ ዑኡዞ ዳጊዲ፡- «ታኣና ዎላ ማዓኒ ኮላሢ ዖናዳይ?» ጌዔኔ፤ ዬያሮ ፓይዲና ላምዖ፤ ጊንሣ ሃሣ ሃይሣ ማዓንዳ ዓሲ ፑልቶ ካሮና ሞኦኪ ዲዛ ዛጌኔ፤ ዬና ዓሳ ካኣቲዋ ማኣሮይዳ ቢታንቶ ዓኣ ዓሲኬ፤

33 ዲዩ ዔያቶም፡- «ዔልዛቤሎ ሊካ ሃዒ ኬኤሩዋቲ!» ጌዔኔ፤ ዔያታ ዲማና ዲዛ ዔኪ ሊካ ኬኤሬኔ፤ ፓራሢና ሳርጌሎ ዖይቶና ዲዛ ሄርቆሢሮ ዲዛኮ ሱጉፃ ኮጮና ፓራሢናይዳ ፓሽኪንቴኔ።

34 ዬካፓ ዲዩ ካኣቲዋ ማኣሪ ጌሊ ሙኡዚ ሙዔኔ፤ ዲማና ዲዚ፡- «ዎይቲቲያ ዲዛ ካኣቲ ናይታሢሮ ዲዛ፣ ጋዳንቂንቴ ላኣሌሎ ዔኪ ዲኡኩዋቲ» ጌዔኔ።

35 ዲዛ ዲኡካኒ ዳንዴ ዓሳ ጋዓንቴ ቶኦኮ ማጌይማና ቶኮንታ ከጮንታ ማጌይፓ ዓታዛ ማሌ ባኣዚ ዳንቂባኣሴ፤

36 ዬያ ቢያ ዲዩም ዔያታ ኬኤዛዛ፣ ዲዩ፡- «ዬይ ቢያ ማዲንቴሢ ናንጊና ናንጋ ጎዳ ፔ ዓይላሢ፣ ቲሲቢ ዓጮ ዓሢ፣ ዔኤሊያሴ ዛሎና ቤርታ ኬኤዜ ጎይዖኬ፤ ዬይያ፡- «ዔልዛቤሎኮ ሌዞ ዲይዚራዔኤሌ ዓጮይዳ ካኒ ሙዓንዳኔ፤

37 ካናታ ሙዔንቴ ዓቲ ባካ ፒዒ ላኣሎና ቡኡራጉዲ ማዓንዳኔ፤ ዬያሮ ዖኣኒያ ዲዛ ዲማሲ ዔሪ፣ ሃና ዔልዛቤሎኬ ጋዓኒ ዳንዳዑዋሴ» ጌይንቴሢኬ» ጌዔኔ።

10

ባክዲያሴ ዜርዖ ጉቤ ዎዳሩሢ

1 ፓይዳ ላንካይታሚ ማዓያ፣ ባክዲያሴ ዜርሢ ሳምሪያ ካታማ ናንጋኔ፤ ዬያሮ ዲዩ ዋርቃታ ፃኣፒ ፔቲ ፔቲ ፃኣፖና ኪኢቶ ዋርቃቶ

* **9:31** ዚምሪ ጌይንታ ዓሢ፡- ፖኦሊሴ ሱኡጌታዖ ዔኤላ ጌይንታ ካኣታሢ ዎዳኦኬ፤ 1ካእቶ. ማ 16:8-12ይዳ ዛጌ። **9:36** 1ካእቶ. ማ 21:23።

ካታሞ ወይህ ዓሶንታ ዔርቲ ዓጮ ጨሞንታ ዓክዓቤ ዜርዖ ዲቻ ዓሶንታሞ ቢያ ዳኬኔ፤ ፃኣፒንቴ ኪኢታ፡-

2 «ካእቲ ዜርዖ ማዔ ዓሳ ዒንህ ዴማ ዋርቃያኬ፤ ፓሮንታ ሳርጌሎ ያይቶንታ ያሎ ዓንጋሞንታ ዙሎ ኬልቂ ዲርቆና ካታማእ ዒንህረኬ፤ ዬያሮ ሃና ኪኢቶ ዋርቃታ ዒንህ ሄሄላዛ ኔጉዋዖ፡

3 ካእቲ ዜርዖፓ ፔቴ፡ ኮሺ ማዔያ ዶኦሚ ካእታሁዋቴ፤ ዬያ ካእታህ ሃላ ማዔ ዒዛሞ ያልቱዋቴ!» ጋዓያኬ።

4 ዬያሮ ሳማሪያ ወይህ ዓሳ ካራ ባይዚ ዒጊጨ፡- «ካእቲ ዒዮራሜንታ ካእቲ ዓካዚያሴንታ ቃዛኒ ዳንዳዒባእ፡ ዒዩ ኦኡኒ ዎዲ ባሻኒ ዳንዳዒ?» ጌዔኔ።

5 ዬካፓ ካእቲ ማእሮ ዓሶኮ ሱኡጌሰኬያንታ ካታሞ ወይህህንታ ዔርቲ ዓጮ ጨሞንታ ዓክዓቤ ዜርዖ ዲቻ ዓሶንታ ዒዩም፡- «ኦኡኒ ኔ ዓይሎኬ፤ ኔ ኦና ዓይሄ ባኮ ቢያ ማዲ ኦ ኩንሃንዳኔ፡ ያና ኦ ካእታህ ዓኬ፤ ኔኤም ኮሺ ማዔ ባኣዚ ማማዴ» ጌዒ ኪኢታ ዳኬኔ።

6 ዒዩ ዔያቶም ጊንህ፡- «ዒንህ ታእና ዎላ ማዔ ታእኒ ዓይህ ባኮ ኩንሃንዳያታቴ ዚሮ ሃይማ ዎዴ ካእቲ፡ ዓክዓቤ ዜርዖ ቢያህኮ ቶኦኮ ቲቂ ዔኪ ታእም ዬዑዋቴ» ጌዒ ዋርቃታ ፃኣፔኔ።

ላንካይታሞ ዓክዓቤ ዜርዖንህ ዒማና ሳማሪያይዳ ዔያቶ ዲቻያ፡ ዓጮይዳ ዔርቲ ጨሞ ኮይላ ናንጋኔ፤

7 ዒዩ ፃኣፔ ዋርቃታ ዔያቶ ሄላዛ ሳማሪያ ካታሞ ሱኡጋ ላንካይታሞ ዓክዓቤ ዜርዖ ቢያ ዎዲ፡ ቶኦኮዎ ዔያቶኮ ቲቂ፡ ኮታና ኩንህ፡ ዒይዚራዔኤሌይዳ ዓእ ዒዩም ዳኬኔ።

8 ዓክዓቤ ዜርዖኮ ቶኦካ ቲቂንቲ ሙኬህ ዒዩ ወይዛዖ ካታሞ ጌሎ ካራ ላምዖ ቤሰካ ዎሊ ቤኤዚ ዚሮ ሄላንዳእና ኩሊንቲ ዴዓንዳጉዲ ዓይሄኔ፤

9 ዚሬሎ ጉቲ ዓማ ካታሞ ጌሎ ካሮ ዒዩ ዴንዲ ዒኢካ ቡኪ ዓኣ ዓሶም፡- «ካእቲ ዒዮራሜም ጌኔ ማዲ ዎዴህ ታናኬ፤ ዬያሮ ዒንህ ዬያ ዛሎ ያኦጨንታዓኬ፤ ጋዓንቴ ሃያ ዓሶ ቢያ ዎዴህ ዒንህ ኮራ ያና ማላይ?»

10 ሃይ ቢያ ዓክዓቤ ዜርዖይዳ ሄላንዳኔ ጌዒ ናንጊና ናንጋ ጎዳ ኬኤዜ ባካ ጎኔ ማዔህ ዔርዛኔ፤ ናንጊና ናንጋ ጎዳ ፔ ዓይላህ፡ ዔኤሊያሴ ዛሎና ኬኤዜ ባኮ ማዲ ኩንህኔ» ጌዔኔ።

11 ዬካፓ ዒዩ ዒይዚራዔኤሌይዳ ናንጋ፡ ሃንጎ ዓክዓቤ ዜርዖንታ ደንዞ ማዔ ቢታንታ ዓኣ ዓሶንታ ዒዚ ናሽካ ዒዛኮ ላጎንታ ቄኤሶዎ ዓይሱዋዖ ቢያ ዎዴኔ።

ካእቲ ዓካዚያሴ ዜርዖ ቢያ ዎዴናህ

10:11 ሆሴ. 1:4።

12 ዲማና ዲዩ ዲይዚራዔኤሌይዳፓ ዔቂ ሳማሪያ ዴንዴኔ፤ ዲዚ ዴንዲቤቃ «ቆልሞ ሄንቃ ዓሶ ጉርዶ» ጌይንታ ቤሲ ሄላዖ፤

13 ሃይቂ ካአቲ፥ ዓካዚያሴ ዲጊኖ ባአካፓ ዳካ ዓሲ ዴንቁ፥ «ዲንሢ ምናንሢ ዳይ?» ጌዒ ምጎጩኔ።

ዔያታ ማሃዖ፥ «ኵኡኒ ዓካዚያሴ ዲጊኒኬ፤ ሃሢ ኵኡኒ ጌኤሾ፥ ዔልዘቤሎኮ ናአቶንታ ሃንጎ ካአቲ ማአሮ ዓሶንታ ዛጋኒ ዲይዚራዔኤሌ ዴንዳኔ» ጌዔኔ።

14 ዲዩ ዲማና፥ «ሃንሢ ዓሶንሢ ዓርቁዋቴ!» ጌዒ ፔኤኮ ፖኦሊሶ ዓይሢኔ፤ ዩያሮ ፖኦሊሳ ዓርቃዛ ዲኢካ ዋአሢ ዔቲ ዓአንቲ ዩያ ዔቶ ኮይላ ዲዩ ዔያቶ ዋዳኔ። ዔያቶኮ ሚርጉማ ስይዲታሚ ላምዖ ማዓያታንቲ ፔቲ ዓሲታዎ ዓይሱዎዎ ዲዚ ዋዳኔ።

ዓክዓቤኮ ዲጊኖ ሃሃ ዎደናሢ

15 ዩካፓ ዲዩ ጎይዖ ዴንደ ዓርቄኔ፤ ዲዚ ዴንዲቤቃ ሬካቤ ናአዚ፥ ዲዮናአዳአቤና ካአሜኔ፤ ዲዩ ዲዛ «ኮሺዳ?» ጌዒ ዔኤሌሰካፓ፥ «ታአና ኔኤናኮ ማሊዖ ፔቲኬ፤ ዩያሮ ኔኤኒ ታአና ዎላ ታ ማዳ ባኮ ማዳንዳ?» ጌይ ምጎጩኔ።

ዲዮናአዳአቤ፥ «ሂዮ፥ ታ ኔኤና ዎላ ኔ ማዳ ባኮ ማዳንዳኔ» ጌዔኔ።

ዲዩ ዲዛ ኮራ፥ «ታ ኩጮ ዓርቄ» ጋዓዛ፥ ዲዮናአዳአቤ ዓርቄኔ፤ ዩካፓ ዲዩ ዲዛ ጎቺ ዔኪ ሳርጌሎ ስይታ ዔኪ ኬሲ ዴይሃዖ፥

16 «ታአና ዎላ ዴንዲጋፓ ምኦሲሮ ጌዒ ታ ማዳንዳ ባኮ ዛጌ» ጌዔኔ፤ ዲማና ዔያታ ሳርጌሎ ቶጊ ሳማሪያ ዴንዴኔ።

17 ዲኢካ ዔያታ ሄላዛ ዓክዓቤ ዜርዖ ፔቲታዖ ዓይሱዎዎ ዲዩ ጋፒሲ ዋዳኔ፤ ዩይ ያዲ ማዔሢ ናንጊና ናንጋ ጎዳ ፔ ዓይላሢ ዔኤሊያሴ ዛሎና ኬኤዜ ጎይዖናኬ።

ባዓአሌ ጌይንታ ምኦክ ካአሽካ ዓሶኮ ሃይባ

18 ዩካፓ ዲዩ ሳማሪያ ዴር ፔቲይዳ ዔኤላዖ፥ «ካአቲ፥ ዓክዓቤ ባዓአሌ ጌይንታ ምኦክ ካአሽኬሢ ዳካኬ፤ ታአኒ ጋዓንቲ ዲዛፓ ባሾ ካአሽካኒ ኮዓኔ፤

19 ዩያሮ ባዓአሌ ማሊዖ ኬኤዛ ዓሶ ቢያ፤ ዩያጉዲ ባዓአሌ ካአሽካ ዓሶንታ ዔያቶኮ ቁኤሶዎ ቢያ ዔኤሊ ታአም ቡኩሱዎቲ፤ ዎይቲቲያ ዔያቶፓ ዓሲ ዓቲዎጉዲ፤ ታአኒ ባዓአሌም ዴኤፒ ዲንጎ ባአዚ ዲንጋንዳሢሮ ዲኢካ ሙኪባአ ዓይጎ ዓሲያ ማዖም ዎዳንታንዳኔ» ጌዔኔ። ዲዩ ዩያይዴሢ ባዓአሌ ካአሽካ ዓሶ ቢያ ዎዳኒ ጌኔ ማላሢናኬ።

20 ዩካፓ ዒዩ፡- «ባዓኣሌ ቦንቻኒ ዴሮ ዔኤሉዋቴ!» ጌዒ ዓይሣዛ፤ ዴሮ ዔኤሊንቴኔ።

21 ዒዩ ዒማና ዩያ ኪኢቶ ዒሰራዔኤሌ ዓጮ ቢያ ዳካዛ፤ ባዓኣሌ ካእሽካ ዓሳ ቢያ ቡኬኔ፤ ፔቴ ዓሲታዎ ዓቱዋዎ ቢያሣ ባዓኣሌኮ ጌኤዢ ማኣሮ ጌሊ ኩሚ ዴዔኔ፤

22 ባዓኣሌ ያኦዞም ዴማዴ ማኣዓሣ ዓርቃ፥ ቄኤሳሣ ባዓኣሌ ካእሽካ ዓሳም ማኣዓሣ ኬሲ ዒንጋንዳጉዲ ዒዩ ዓይሣኔ።

23 ዩካፓ ዒዩ ሬካቤ ናኣዚ፥ ዒዮናኣዳኣቤና ዎላ ባዓኣሌኮ ጌኤዢ ማኣሮ ጌሌኔ፤ ዒኢካ ጌላዎ ዴሮ ኮይላ፡- «ዓካሪ ዒንሣ ሃይካ ዓኣ ዓሳ ባዓኣሌ ሌሊ ካእሽካያታሣ፤ ናንጊና ናንጋ ጎዳ ካእሽካ ዓሲ ፔቴታዎ ባኣያ ማዔሣ ዴማሲ ዔሪ ታኣም ኬኤዙዋቴ» ጌዔኔ።

24 ዩካፓ ዒዚ ዒዮናኣዳኣቤና ዎላ ባዓኣሌም ሚቺ ዒንጎ ዒንገሣና ሜሌ ዒንጎ ባኣዚያ ሸኢሸሣ ዓርቄኔ፤ ዩያኮ ቤርታ ዒዩ ሳሊታሚ ፖኦሊሴ ባዓኣሌኮ ጌኤዢ ማኣሮ ዓጮ ማንጊሲ ዒቁሳዎ፡- «ሃይካ ጋራ ዓኣ ዓሳ ቢያ ዎዲዋቴ፤ ፔቴ ዓሲታዎ ቶሊሲ ዳኬ ዓሲ ዩያ ዓሣ ዛሎ ዎዲንታንዳኔ!» ጌዒ ዓይሣናኣኮኔ።

25 ዒዩ ዒንጎ ባኮ ዒንጌሰካፓ ኔጉዋዎ ዙላ ካፒ ዓኣ ፖኦሊሶና ፖኦሊሶ ሱኡጎ፡- «ጌሊ ሃይካ ጋራ ዓኣ ዓሳ ጉቤ ዎዲዋቴ፤ ፔቴ ዓሲታዎ ቶሎዋጉዲ!» ጌዒ ዓይሣኔ፤ ዩያሮ ፖኦሊሳ ፔኤኮ ጨንቾ ዓፓሮ ቱጊ ቱጊ ጌላዎ ጋራ ዓኣ ዓሳ ቢያ ዎዴኔ፤ ሌዞዎ ቢያ ጎቺ ጎቺ ዙሎ ኬሴኔ፤ ዩካፓ ባዓኣሌ ጌኤዢ ማኣሮኮ ጋራ ዓኣ ቆልዎ ጌሊ፡

26 ዒኢካ ዔያታ ካእሽካ ሹጮ ዳኣቦ ዙሎ ኬሲ ታሚና ሚቺኔ።

27 ዩያይዲ ባዓኣሌ ካእሽካ ዓሳ «ዴማዴያ ጌኤሸኬ» ጌዒ ጉሙርቃ ሹጮ ዳኣቦንታ ማኣሮንታ ሻሃኔ፤ ዩያ ባዓኣሌኮ ጌኤዢ ማኣሮ ዔያታ ሸኤሽ ማኣሮ ማሄኔ፤ ዩይ ማኣራ ሃና ሄላንዳኣና ዒማዲ ማዒ ዓኣኔ።

28 ዒዩ ዒይዚራዔኤሌይዳ ዓኣ፥ ባዓኣሌ ካእሽኮ ካኣዢ ባይዘሣ ዩያይዲኬ፤

29 ያዲ ማዔቴያ ዒዩ ዒሰራዔኤሌ ዓሳ ጎሞይዳ ዔኪ ጌልዜ፥ ካኣቲ፥ ዒዮርቢዓሜ ማዴ ጎሞ ማዲያ ሃሽባኣኪ፤ ዒዚ ዓይጎ ማዴይ ጌዔቴ፡- ናባጼ ናኣዚ፥ ዒዮርቢዓሜ ቤኤቴኤሌና ዳኣኔናይዳ ማዢ ዔቄሴ ናኣሪ ማላ ባኮ ካእሽኪያ ሃሾ ዒጼኔ።

30 ጋዓንቴ ናንጊና ናንጋ ጎዳ ዒዩም፡- «ዓክዓቤ ዜርዎይዳ ቢያ ለማዴ» ታ ኔና ጌዔ ጎይዎ ማዲ ኔኤኒ ኩንሣኔ፤ ዩያሮ ኔኤኮ ዜርዓ

10:29 1ካእቶ. ማ 12:28-30።

ዴንዲ ያይዶ ሾይንቲ ሄለንዳኣና ዒሰራዔኤሌይዳ ካኣታዳንዳሢ ታ ኔኤም ጩኣቃይ» ጌዔኔ።

31 ዒዩ ጋዓንቲ ናንገና ናንጋ ጎዳ ማዔ ዒሰራዔኤሌ ያኣዛሢ ሞጎም ጉቤ ዒናፓ ዓይሢንታያ ማዒባኣሴ፤ ዩያይዶንደሢ ሃሺ ዒሰራዔኤሌ ዓሶ ጎማ ዔኪ ጌልዜ፣ ዒዮርቢዓማ ማዴ ፑርቶ ማዶ ማዶኔ።

ዒዩኮ ሃይቦ

32 ናንገና ናንጋ ጎዳ ዒማና ዒሰራዔኤሌ ዓሶኮ ዓጮ ዳኪሲሢ ዓርቄኔ፤ ዩያር ሶኦሪያ ካኣቲ፣ ዓዛሄሌ ዒሰራዔኤሌ ያሊ ባሺ ዒሰራዔኤሌ ዓጮ ቢያ ዓርቄኔ።

33 ዒዚ ዓርቄ ዓጩ፡- ዮርዳኖሴ ሞሮኮ ዓባ ኬሰካ ዛሎንታ ደኣሎ ዛሎና ዴንዲ ዓርኖኦኔ ሞሮኮ ኬዴ ዓኣ ዓርዔኤሬ ካታሞ ሄለንዳኣናኬ፤ ዩይ ቤዛ ጋኣዴንታ ሮኦቤኤሌንታ ዓባ ኬሰካ ዛላ ዓኣ ሚናኣሴ ፃፀኮ ሄካሢ ናንጋ፣ ጌሌዓዴንታ ባኣሳኣኔንታ ዓጮ ጋራ ማሂ ዔካያኬ።

34 ዒዩ ማዶ ሜሌ ባኮና ጩርሹሞና ዒ ያሊ ባሺ ባሺፃ ቢያ ዒሰራዔኤሌ ካኣቶ ሃይሳ ፃኣፒንታ ማፃኣፓ ፃኣፒንቲ ዓኣኔ፤

35 ዩካፓ ዒዩ ሃይቄ ሰማሪያይዳ ዴኡቴኔ፤ ዒዛ ቤዛ ዒዛኮ ናኣዚ፣ ዒዮዓካኣዜ ካኣታዴኔ፤

36 ዒዩ ሰማሪያይዳ ናንገ ዒሰራዔኤሌ ዓጮ ላማታሚ ሳሊ ሌዔ ካኣታዲ ሞይሢ።

11

**ዪሁዳ ካኣቴሎ ዓታሊያ
(2ያኦሲ. ዓሃኬ 22:10—23:15)**

1 ካኣቲ ዓካዚያሴኮ ዒንዳ፣ ዓታሊያ * ዒዛኮ ናያ ሞዶናሢ ሞሞዛያ ዪሁዳ ካኣቲ ማኣር ዓሶ ቢያ ሞዶንዳጉዲ ዓሶ ዓይሢ ሞዲሼኔ።

2 ዒዛ ሞዲሹሞንቲ ዓቴሢ፣ ዓካዚያሴ ናኣዚ፣ ዒዮዓሴ ሌሊኬ፤ ዒዚያ ሃንጎ ዓሶና ሞላ «ሞዲንቶም» ጌይንቲያታያ ዓቴኔ፤ ዒማና ዒዛኮ ዓዶ ጌራ፣ ካኣቲ ዒዮራሜ ናኣ፣ ዪሆሻባዓ ዒዛ ዓኣቺ ዓይሴኔ፤ ዩና ዒዛኮ ዓዶ ጌሬላ ዒዛንታ ዒንደ ማዒ ዒዛ ዲቻዘንታ ዔኪ ጌኤዢ ማኣርኮ ጋራ ዓኣ ቆልዖይዳ ዓኣቺሢር ዓታሊያ ዒዛ ሞዲሻኒ ዳንዳዒባኣሴ።

* 11:1 ዓታሊያ ፔቴ ፔቴ ማፃኣፓ ዩኖ ዓሴሎኮ ሱንዖ «ጎቶሊያ» ጋዓኔ።

3 ዓታሊያ ዪሁዳይዳ ላሆ ሌዔ ካአታዲ ዴዔ፤ ዲማና ዪሆሻባዓ ዲዮዳሴ ጌኤዡ ማኣሮይዳ ጌሢ ዛጊ ዲቼ፤።

4 ጋዓንቴ ቁኤሳሢ፤ ዮዳሄ ላንካሳ ሌዖና ካአቶ ካፓ ፖኦሊሶንታ ካአቱሞ ማኣሮ ካፓ ፖኦሊሶኮ ሱኡጎንታ ቢያ ዔኤሊሲ ጌኤዡ ማኣሪ ዔኪ ዩዔ፤ ዲኢካ ዲዚ ማዳኒ ማሌ ባኮ ዔያታ ዲዛና ዎላ ማዳንዳጉዲ ጫኣቂሴ፤ ዩካፓ ዓካዚያሴኮ ናኣዚ፤ ዲዮዳሴ ዔያቶሞ ዲዚ ዳዎ።

5 ሂዚ ጌዒ ዓይሄ፡- «ሃውሾ ኬሎና ካፖ ዲንሢ ካፓኣና ሃይሃ ቤሲ ፓቂንቴጋፓ ፔቴ ቤሰካ ፓቂንቴ ዓሳ ካአቱሞ ማኣሮ ካፖንጎ፤

6 ማሌ ቤዛ ማሃ ፓቆና ዓሳ ሃሃ ሱኡሬ ባንሢ ጌሎ ካሮ ካፖንጎ፤ ሃይሃሶ ፓቆና ዓሳ ሃንጎ ፖኦሊሶኮ ዙላ፡ ጊንሢና ዓኣ ጌሎ ካሮ ካፖንጎ።

7 ሃውሾ ኬሎና ካፑዎ፡ ላምፖ ቤዛ ፓቂንቴ ፖኦሊሳ ጋዓንቴ ካአቲ ዔኤቢ ሙኪ ሄሉዎጉዲ ጌኤዡ ማኣሮ ካፖንጎ፤

8 ካአቲ፡ ዲዮዳሴ ዲንሢ ካፓኣና ጨንቾ ዓፓሮ ዲንሢኮ ቱጊ ዓርቂ ዲ ዴንዳ ቤዙ ቢያ ዲዛና ዎላ ዴንዳዎቴ፤ ዲንሢ ባንሢ ሙካ ዓይጎ ዓሲያ ቢያ ዎዎዲዎቴ።»

9 ፆሎ ፖኦሊሶኮ ሱኡጎ ዮዳሄ ዓይሢ ዓይሢያ ዔኪ ሃውሾ ኬሎና ካፓ ፖኦሊሶንታ ካፑዎፖ ዓታ ፖኦሊሶዎ ዎላ ዔኪ ዮዳሄ ኮይላ ሙኬ።

10 ዮዳሄ ዲማና ጌኤዡ ማኣሮይዳ ጌሢ ካፒንቴ ናንጋ፡ ዎርፆንታ ጊቲሞንታ ዔኪ ፆሎ ፖኦሊሶኮ ሱኡጎም ዲንጌ፤ ዩይ ዓንጋማ ካአቲ ዳውቴሲኬ።

11 ፖኦሊሶ ጨንቾ ዓፓሮ ቱጊ ዓርቂሲ ካአቲ ካፓንዳጉዲ ፆኢም ዲንጎ ባኮ ሺኢሾ ቤዙ ዛሎና ጌኤዡ ማኣሮኮ ቤርቶ ዛላ ዲ ዔቂሴ።

12 ዩያይዴሰካፓ ዲዮዳሴ ዓኣቾና ቤዛፓ ኬሲ፡ ቶኦካ ቦንቾሮ ዓሳ ባኮ ዓጌ፤ ዲዚ ካአታዳፖ ዎይሃንዳ ዎጎ ፃኣፖናያ ዲዛም ዲንጌ፤ ዩያይዲ ዲዮዳሴ ካአቱሞም ዶኦሚንቲ ካአታዴ፤ ዴራ ዲማና ኩቹ ባዒ ባዒ ዑኡዞዎ ዴጊዲ፡- «ካአቲ ናንጊና ካአታዳንጎ!» ጌዔ።

13 ካአቲላ፡ ዓታሊያ ካአቶ ካፓ ፖኦሊሶንታ ዴርንታኮ ዲላቶ ዑኡዞ ዎይዛፖ ዴራ ቡኪንቲ ዓኣ ጌኤዡ ማኣሮኮ ዑኡኮና ዴንዴ።

14 ዲኢካ ዲዛ ሙካፖ ዓኪ ካአታሃና ካአታሢ ካአቶ ካአታሃ ዳምቦ ጎይያ ጌኤዡ ማኣሮኮ ጌሎ ካራ ዓኣ ቱርቱር ኮይላ ዔቂ ዓኣንቴ ዴንቁ፤ ዩይ ካአታሢ ዲማና ፆሎ ፖኦሊሶ ዓይሢ ሱኡጎንታ ዛያሢ ዎርቃ ዓሳኣ ዲዛ ኮይላ ዔቂ ዓኣንቴ ዲዛ ዴንቁ፤ ዴራኣ ቢያ ሚርጌና ዎዛዲ ዲላሺሢና ዛዬ ዎርቃ፤ ዩያሮ ዓታሊያ ዲቃቲ

ማእዓሢ ፔኤኮ ዳርዚ፡- «ሃይ ታና ዒዲ ማደና ጌኔ ማደኬ! ጌኔ! ጌኔ!» ጌዒ ዒላቴኔ።

15 ጌኤዡ ማእሮኮ ዲሮ ጋራ ዓሳ ዓታሊያ ዋዳንዳጉዲ ዮዳሄ ኮይባኣሴ፤ ዬያሮ ያሎ ፖኦሊሶ ሱኡጎ፡- «ሻውሎና ሚዛቆ ዛሎናይዳ ዒቆ ካፓ ፖኦሊሶኮ ባኣኪና ዔኪ ዒዞ ኬሱዋቴ፤ ዒዞ ጊንፆ ዴንዳኒ ጋዓ ዓሲ ዓኣቲ ዋዋዲዋቴ» ጌይ ዓይሣኔ።

16 ዒማና ዒዞ ዔያታ ዓርቂ ዔኪ ካኣቲዋ ማእሪ ዴንዴኔ፤ ዒኣካ «ፓራሢ ጌላ ካሮ» ጌይንታ ቤዘይዳ ዔያታ ዋዳኔ።

ዒሰራዔኤሌ ዓሳ ሃሼ ጫኣቁሞ ዮዳሄ ጊንሣ ዓካሴሢ
(2ፆኦሲ. ዓሃኬ 23:16-21)

17 ቁኤሳሢ፡ ዮዳሄ ዒዛንታ ካኣቲንታ ዴሮንታ ያኦሲ ዴሬ ማዓንዳጉዲ ናንጊና ናንጋ ጎዳና ዋላ ዓሶ ጫኣቁሴኔ፤ ሃሣ ጊንሣ ካኣቲንታ ዴሮንታ ዋሊ ጉሙርቃያ ማዓንዳጉዲ ዒዚ ጫኣቁሴኔ።

18 ዬካፓ ዴራ ባዓኣሌኮ ጌኤዡ ማእሪ ዴንዲ ካኣዡ ማእሮ ሻሄኔ፤ ባዓኣሌም ዒንጎ ባኮ ዒንጊ ካኣሽኮ ቤዘና ዒዛ ማሊሲ ማዡና ባኮዋ ቢያ ሜንሣኔ፤ ማኣታኣኔ ጌይንታ፡ ባዓኣሌም ማዳ፡ ቁኤሴሰኬያ ዒንጎ ባኮ ዒንጎ ቤዘኮ ቤርታ ዔያታ ዋዳኔ።

ዮዳሄ ዒማና ያኦሲ ካኣሽኪንታ፡ ጌኤዡ ማእሮ ዋሊ ዓኣሢ ዓኣሢ ካፓንዳ ዓሲ ኬሲ ካፓንዳጉዲ ዓይሣኔ፤

19 ዬያይዴሰካፓ ዒዛንታ ፖኦሊሶ ሱኡጎንታ ካኣቲ ካፓ ፖኦሊሳሢንታ ካኣቲዋ ማእሮ ካፓ ፖኦሊሶንታ ካኣቲና ዋላ ጌኤዡ ማእራፓ ዴንዲ ካኣቲዋ ማእሮ ሄላንዳኣና ዴንዳንዳጉዲ፤ ሃሣ ዴራኣ ቢያ ጊንፆ ሙካንዳጉዲ ዓይሣኔ፤ ዒማና ዒዮዓሴ ካኣቲዋ ማእሮ ካፓ ዓሳ ጌላ ዲሮ ካሮና ጌሊ ካኣቲዋ ያይቶይዳ ዴዔኔ።

20 ዓታሊያ ዋዳንቲሢሮ ዓሳ ቢያ ዋዛዳኔ፤ ካታዋ ዓሳኣ ሂርጋ ባኣዚ ባኣያ ማዔኔ።

21 ዒዮዓሴ ካኣታዳኣና ሌዓ ዒዛኮ ላንካይ ሌዔኬ።

12

ዪሁዳ ካኣቲ ዒዮዓሴ
(2ፆኦሲ. ዓሃኬ 24:1-16)

1 ዒዩ ዒሰራዔኤሌይዳ ካኣታዳንቲ ላንካሳ ሌያና ዒዮዓሴ ዪሁዳይዳ ካኣታዳኔ፤ ዒዚ ዬሩሳላሜይዳ ናንጊ ያይዲታሚ ሌዔ ዋይሣኔ፤ ዒንዳ ዒዛኮ ዪቢያ ጌይንታያ ቤርሳሴ ካታማ ሾይንቲያኬ።

11:14 2ካእቶ. ማ 23:3።

2 ቁኤሳሣ፡ ዮዳሄ ዒዛ ዘራያ፤ ሃሣ ዔርዛያ ማዔሣረ ዒዚ ናንጌ ዎዶ ቢያይዳ ናንገና ናንጋ ጎዳ ዎዛሳ ማዶ ማዶኔ፤

3 ጋዓንቴ ጌሜራ ጌሜራ ማሌ ያኦዞ ካኣሽኮ ካኣዡ ማኣራ ሻሂንቴባኣሣረ ዴራ ዒኢካ ዑንጄ ጩቢሲ ጩቢሲ ዒንጎ ባኮዎ ዒንገ ዒንገ ካኣሽኪያ ሃሺባኣሴ።

4 ዒማና ዒዮዓሴ ቁኤሶ ዔኤሊ ጌኤዡ ማኣረይዳ ዒንገንጎ ባኮና ዎላ ዒንጎያ ማሂ ሸኢሾ ማኢሾ ቢያ ዛገ ዔያታ ዓርቃንዳጉዲ ዓይሄኔ፤ ዩይ ማኢሻ ዒንጎ ባኮ ዒንጎዎና ዒንገንጎ ዔርቴ ማኢሾንጎ ዴራ ፔ ሸኔና ናሽኪ ዒንጋ ማኢሾ ቢያ ጌይሂኩ።

5 ፔቴ ፔቴ ቁኤሳ ዔያታ ማዳ ፔ ዓሶፓ ዓሶፓ ዒንገንጎ ማኢሾ ቢያ ዛገ ዓርቃንዳጉዲ ቢታንቶ ዔያቶም ዒንገንቴኔ፤ ዔያታ ዩያ ማኢሾና ኮይሳ ጎይያ ጌኤዡ ማኣረኮ ፑርቴሣ ገኢኢሻንዳጉዲ ዒዚ ዔያቶም ከኤዘኔ።

6 ጋዓንቴ ዒዮዓሴ ካኣታዳማፓ ዴንዲ ላማታሚ ሃይሣሳ ሌዖ ሄላንዳኣና ቁኤሳ ጌኤዡ ማኣረኮ ፑርቴ ቤዞ ፔቴታዖ ኮሼ ባኣዚ ባኣሴ፤

7 ዩያር ዒዮዓሴ ዮዳሄና ቁኤሶ ሃንጎዎቶና ፔ ባንሣ ዔኤሊ፡- «ጌኤዡ ማኣረኮ ፑርቴ ቤዞ ዒንሣ ኮሺባኣሣረ ዓይጎርዳይ? ሃይማፓ ዓርቃዖ ዒንሣ ዔካ ማኢሾ ዒንሣ ዓርቃንዳፓ ኮይሱዎሴ፤ ጌኤዡ ማኣረኮ ፑርቴ ቤዞ ኮሺንጎንዳጉዲ ማኢሾ ዔኪ ሃኒ ሸኢሹዎቴ» ጌዔኔ።

8 ቁኤሳ ዩያ ማሊያ «ቃራኩ» ጌዒ ጌኤዡ ማኣረኮ ፑርቴ ቤዞ ዔያታ ኮሻኒ ጋዓዞ ሃሽኔ።

9 ዩካፓ ቁኤሳሣ፡ ዮዳሄ ፔቴ ሳኣዲና ዔኪ ሳኣዲኮ ጉኡፖይዴና ዲኣና ዑሬኔ፤ ዩያ ሳኣዲኖ ጌኤዡ ማኣረ ጌሎሣኮ ማዛቆ ዛላ ዓኣ፡ ዒንጎ ባኮ ዒንጎ ቤዞ ኮይላ ጌሄኔ፤ ቢያ ከሊ ፔ ከሎና ከሎና ጌሊ ካፓ ቁኤሳ ናንገና ናንጋ ጎዳ ዘገ ካኣሽካኒ ሙካ ዴራ ዔኪ ሙኪ ዒንጋ ማኢሾ ዔኪ ሳኣዲኖ ጋራ ዓጋኔ፤

10 ዩይ ሳኣዲና ኩማዛ ካኣቱም ማኣረይዳ ፃኣፖ ባኮ ፃኣፓ ዓሣና ቁኤሶ ሱኡጋሣና ሙኪ ሙኪ ማኢሾ ፓይዳዖ ቃርዒቴና ቱኪ ቱኪ ጌሣኔ።

11 ማኢሻ ዎኣዲ ማዔቴያ ኮሺ ዛገ ዔሪ ፃኣፒ ዓርቁሰካፓ ጌኤዡ ማኣረኮ ፑርቴ ቤዞ ማዲሻ ሱኡጎም ዒንጋዛ ዔያታ ማኢሾ ዔኪ ማኣረ ጰርቂ ኮሻ ዓሶም፡ ሹጮና ማዡ ዓሶም፡

12 ሹጮ ዓርሳ ዓሶም፡ ፑርቴ ቤዞ ኮሾንዶ ሚያና ሹጮና ሻንቃ ዓሶንጎ፤ ዩያጉዲ ዲማ ዲማ ኮይሳ ማዶም ቢያ ጨገንጎኔ።

12:4 ከሲ. ማፃ 30:11-16።

13 ጋዓንቴ ቢሮ ዓንጎና ኮሺንታ ዔቶ ሳኣኖ፥ ዲቢንያ ዋሆ ባኮ፥ ዔቶ ሺልዖንታ ዲንካሢንታ፤ ዩያጉዲ ሃሣ ቢራ ዓንገና ዋርቄና ማዢንታ ጌኤዡ ማኣራ ካኣዡር ማዲንቶ ባኮ ኮሺጎኒ ዩያ ሚኢሾፓ ዔኪ ጨገንቱዋሴ።

14 ዩይ ሚኢሻ ጉቤ ጌኤዡ ማኣሮኮ ፑርቴ ቤዞ ኮሻ ዓሶና ኮሺያም ኮይሳ ባኮኮ ሌሊ ጨገንታ።

15 ማዶ ማዲሻንዳጉዲ ቢታንታ ዒንገንቴ ዓሳ ጎኔ ጉሙርቁንታ ዓሲ ማዔሢሮ ሚኢሾ ዒንጌ ዓሳ ዔያቶ ዓልቲ ዖኦጨ ዖኦጨ ዛጉዋሴ።

16 ዳቢንቲ ዛላና ጎሜ ዛላናሮ ጌዒ ጨገንታ ሚኢሻ ጋዓንቴ ቄኤሶም ዒንገንታያኬ፤ ጌኤዡ ማኣራ ጌሦና ሳኣዲኖ ጋራ ዓገንቱዋሴ።

ካኣቲ ዓዛሄሌ ዩሩሳላሜ ካታሞ ዖላኒ ዚርቄሢ

17 ዒማና ሶኦሪያ ዓጮ ካኣቲ፥ ዓዛሄሌ ጋኣቲ ካታሞ ዖሊ ዓርቄ፤ ዩካፓ ዩሩሳላሜ ካታሞ ዖላኒ ማሌ።

18 ዪሁዳ ዓጮ ካኣቲ ዒዮዓሴያ ዒዛኮ ቤርታ ካኣታዴ ካኣቶ ጌይፃ፡- ዒዮሳፒጭንታ ዒዮራሜንታ ዓካዚያሴንታ ናንገና ናንጋ ጎዶም ዲማሲ ጌሢ ዒንጎና ባኮና ፔኤሲያ ቃሲ ጌኤዡ ማኣሮና ካኣቱሞ ማኣሮናኮ ሚሆ ጌሦ ኬኤፃ ዓኣ ዋርቆ ቢያ ቡኩሲ ካኣቲ ዓዛሄሌም ዒንጋኒ ዳኬ፤ ዓዛሄሌያ ዩያ ዔካዖ ፔኤኮ ፖኦሊሶ ዩሩሳላሜፓ ማሄ።

ካኣቲ ዒዮዓሴኮ ሃይቦ

19 ካኣቲ፥ ዒዮዓሴ ማዶ ሜሌ ባካ ቢያ ዪሁዳ ካኣቶ ሃይሳ ፃኣፒንቲ ዓኣ ማፃአፓ ፃኣፒንቲ።

20-21 ዩካፓ ካኣቲ፥ ዒዮዓሴኮ ዶንዞ ማዔያ ቢታንታ ዓኣ ዓሳ ዒዛ ዒዳ ጌኔ ማዶ ማዳኒ ዘርቴ፤ ዩያቶ ዓሶፓ ላምዖንሢ ሺምዓቲ ናኣዚ ዮዛካሬና ሾሜሬ ናኣዚ ዪሆዛባዴና ሲሳ ጌይንታ ቤዞ ዔኪ ዴንዳ፥ ዩሩሳላሜኮ ዓባ ኬሰካ ዛሎይዳ ባኣሲ ማዡና ማኣሮይዳ ዒዛ ዎዴ፤ ዒማና ዒዮዓሴ ዳውቲ ካታሞይዳ ካኣታ ዲኡታ ቤዞ ዲኡቲ፤ ዒዛ ቤዞይዳ ዒዛኮ ናኣዚ፥ ዓሜሲያሴ ካኣታዴ።

13

ዒሰራዔኤሌ ካኣቲ ዒዮዓካኣዜ

1 ባካዚያሴ ናአዚ፣ ዲዮባሴ ዪሁዳይዳ ካአታዳንቴ ለማታሚ ሃይሣሳ ሌዖና ዲዩ ናአዚ ዲዮባካአዜ ዲሰራዔኤሌይዳ ካአታዳንቴ፤ ዲዚ ዲማና ሳማሪያይዳ ናንጊ ታጾ ለንካይ ሌዔ ዎይሄን፤

2 ዲዚያ ሃሣ ዲዛኮ ቤርታ ካአታዳ፣ ካአቲ ዲዮርቢዓሜጉዲ ጎሜ ማዲ ናንጊና ናንጋ ጎዳ ያዩሴን፤ ዲሰራዔኤሌ ዓሶዎ ዔኪ ጎሜይዳ ጌልዜን፤ ዲዮርቢዓሜ ማዲ ፑርቶ ማዶዎ ማዲያ ሃሺባአሴ።

3 ዬያሮ ናንጊና ናንጋ ጎዳ ዲሰራዔኤሌ ዓሶይዳ ዳጋዲ ሶኦሪያ ካአቲ ዓዛሃሌንታ ዲዛኮ ናአዚ ቤንሃዳዴንታ ዔያቶ ያሊ ባሻንዳጉዲ ሚርጌ ዎዴ ዓአሣ ዓአሣ ዲንጌን።

4 ዬካፓ ዲዮባካአዜ ናንጊና ናንጋ ጎዳ ሺኢቄን፤ ናንጊና ናንጋ ጎዳአ ሶኦሪያ ካአቲ ዲሰራዔኤሌ ዓሶይዳ ማዴ ፑርቶ ባካ ዑሣ ዓአዳ ዴሄሣ ማዔሣ ዛጊ ዲዮባካአዜኮ ሺኢጶ ዎይዜን።

5 ዬያሮ ናንጊና ናንጋ ጎዳ ዲሰራዔኤሌ ዓሶ ሶኦሪያ ዓሶ ኩጫፓ ቶሊሲ ኬሳንዳ ሱኡጌ ዔያቶም ጊኢጊሼን፤ ዬካፓ ዔያታ ቤርታ ናንጋ ጎይያ ኮሺ ናንጌን።

6 ዬይ ቢያ ያዲ ማዔቴያ ካአቲ፣ ዲዮርቢዓሜ ዲሰራዔኤሌ ዓሶ ዔኪ ጎሞይዳ ጌልዜ ዳቢንቶ ማዶ ዔያታ ሃሺባአሴ፤ ዳቢንታፓ ማዎ ዲፃ ዬያ ጎሞ ማዲ ማዲ ዓሼራ ጌይንታ ላኦኦ ያኦዜሎ ማሊሲ ኮሻና ባኮ ሳማሪያይዳ ካአሺኪያ ሃሺባአሴ።

7 ካአቲ ዲዮባካአዜኮ ደንጊታሚ ፓሮና ያላ ዓሴ፣ ታጾ ሳርጌላ ያይታና ታጾ ሺያ ፖኦሊሴሰኬንሣፓ ዓታዛ ሜሌ ያልዚ ያላኒ ጊኢጊንቴ ዎልቄ ባአሴ፤ ዬይ ያዲ ማዔሣ ዲዛኮ ሃንጎ ፖኦሊሶ ሶኦሪያ ካአቲ ሲላሊ ማሃ ዎዲ ባይዜሣሮኩ።

8 ካአቲ፣ ዲዮባካአዜ ማዴ ባኮና ጫርቂ ዲዚ ያሊ ባሼ ባሺፃ ቢያ ዲሰራዔኤሌኮ ካአቶ ሃይሳ ፃአፒንታ ማፃአፖይዳ ፃአፒንቲ ዓአን።

9 ዬካፓ ዲዮባካአዜ ሃይቂ ሳማሪያይዳ ደኡቴን፤ ዲዛ ቤዘይዳ ዲዛኮ ናአዚ፣ ዮባሴ ካአታዳን።

ዲሰራዔኤሌኮ ካአቲ ዮባሴ

10 ዪሁዳ ካአቲ፣ ዲዮባሴ ካአታዳንቴ ሃይሣታሚ ለንካሳ ሌዖና ዲዮባካአዜ ናአዚ ዮባሴ ዲሰራዔኤሌይዳ ካአታዳንቴ፤ ዲዚ ሳማሪያይዳ ናንጊ ታጾ ለሆ ሌዔ ዎይሄን።

11 ዲዚያ ዲሰራዔኤሌ ዓሶ ጎሜይዳ ዔኪ ጌልዜ፣ ካአቲ ዲዮርቢዓሜ ማዴ ፑርቶ ማዶ ማዲያና ጎሜ ማዲ ናንጊና ናንጋ ጎዳ ያዩሴን።

12 ዮዳሴ ማዳጃ ማሌ ማዳ ቢያ፤ ሃሃ ዪሁዳ ካኣቲ፣ ዓሜሲያሴ ዒዚ ያሊ ባሽ ባሽፃኣ ዓቱዋፃ ዒሰራዔኤሌኮ ካኣቶ ሃይሳ ፃኣፒንገታ ማፃእፓ ፃኣፒንቲ ዓኣኔ።

13 ዬካፓ ዮዳሴ ሃይቁ፣ ሳማሪያይዳ ዓኣ ዱኡፖ ቤዛ ዱኡቴኔ፤ ዒዛ ቤዛ ዒዛኮ ናኣዚ፣ ላምዓሳ ዒዮርቢዓሜ ካኣታዳኔ።

ዔልሳዒኮ ሃይቦ

14 ያኦሲ ማሊያ ከኤዛ፣ ዔልሳዒ ሃርጊንቴም ዶርዓሢ ያይዲ ዋዳኒ ዑኪ ዓኣንቴ ዒሰራዔኤሌ ካኣቲ ዮዳሴ ዒዛ ያኦሚኒ ሙካፃ ዑኡዘ ዴጊዲ፡- «ዓዴ! ዓዴ! ኔኤኒ ዒሰራዔኤሌ ዴርኮ ዋልቃሢና ጊቲማሢናቱዋይ!» ጌዒ ቃዬኔ።

15 ዒማና ዔልሳዒ፡- «ፔቴ ቆኦሲ ሂኢሺና ዋላ ዔኬ» ጌዒ ካኣቲ ዓይሃዛ፣ ዮዳሴ ዓይሢንቴሢ ጎይፃ ማዳኔ፤

16 ዔልሳዒ፡- «ሂኢዥ ዱካኒ ጊኢጊንቴ» ጋዓዛ፣ ካኣቲ ዒዚ ዓይሢ ጎይፃ ማዳኔ፤ ዬካፓ ዔልሳዒ ፔ ኩጮ ካኣቲ ኩጮ ዑፃ ጊሃሃ፡-

17 «ዓባ ኬሰካ ዛሎና ዓኣ ፑልቶ ካር ቡሌ» ጌዔኔ፤ ዬያር ካኣቲ ቡሌኔ፤ ሃሃ ዔልሳዒ፡- «ሂኢዥ ዱኬ!» ጌዔም ካኣቲ ዱዱካማና ዔልሳዒ፡- «ኔኤኒ ያኦሲ ሂኢሺኬ፤ ኔኤና ማዒ ናንጊና ናንጋ ጎዳ ሶኦሪያ ዓሶ ያሊ ባሻንዳኔ፤ ሶኦሪያ ዓሶ ያሊ ኔ ባሻንዳያ ሄላንዳኣና ዓፔቁ ካታማ ኔ ዔያቶ ያላንዳኔ» ጌዔኔ።

18 ዬካፓ ዔልሳዒ ካኣቲም፡- «ዓቴ ሂኢዥ ዔኪ ዬያቶና ሳፃ ዱኬ!» ጌዔኔ፤ ዬያር ካኣቲ ሳፃ ሃይሢ ማይንቲ ዱካፃ ሃሽኔ፤

19 ዬይ ዔልሳዒ ዳጋሴሢር ካኣቲ ኮይላ፡- «ዶንጎ፤ ሃንጎ ላሆ ማይንቲ ኔ ዱኬቴ ሶኦሪያ ዓሶ ጋፒ ኔ ባሻንዳያታፃ ሃሢ ጋዓንቴ ኔ ዔያቶ ሃይሢ ማይንቲ ሌሊ ባሻንዳኔ» ጌዔኔ።

20 ዬካፓ ዔልሳዒ ሃይቁ ዱኡቴኔ።
ዬና ዋዶና ሞዓኣቤ ዓጫፓ ሙኪ ያላ ዓሳ ሌዓ ሌዓ ዒሰራዔኤሌ ዓጮ ያላኒ ሙኪ ጌላኔ።

21 ፔቴ ዓቢ ዓሲ ሃይቁም ዒሰራዔኤሌ ዓሳ ዱኡካንቴ ዬኖ ያሎ ያላ ዓሶፓ ዛላ ዓሲ ዔያቶ ያላኒ ሙካያ ዔያታ ዴንቁ ዔያታ ዱኡካ ዓሃሢ ዔልሳዒ ዱኡፖ ዔቶ ጋራ ኬኤሪ ሃሺ ጳሽኬኔ፤ ዬያ ዓሢኮ ሌዛ ዔልሳዒኮ ሜጌያና ካካኣማፃ ቤዘና ሃይባፓ ዳቁ ዔቁኔ።

ዒሰራዔኤሌ ዓሶና ሶኦሪያ ዓሶና ዋሊ ያሌሢ

22 ዒዮዓካኣኬ ካኣታዲ ዓኣ ዋዶና ቢያ ሶኦሪያ ካኣቲ፣ ዓዛሄሌ ዒሰራዔኤሌ ዓሶ ያሊ ሜታሲሢና ካራ ባይዜኔ፤

23 ናንጊና ናንጋ ጎዳ ጋዓንቴ ፔ ኮሹሞና ሚጨንቲ ዔያቶ ማአዳኔ፤ ዔያቶ ዋዲሺ ባይዚባአሴ፤ ዔያ ዒ ማዳሢ ዓብራሃሜንታ ዪሳአቁንታ ያይቆኦቤንታ ዋላ ዒ ጫአቄ ጫአቁሞ ጳቂሢ ዴሮ ዋሊባአሢሮኩ።

24 ዔካፓ ሶኦሪያ ካአቲ፡ ዓዛሄሌ ሃይቃዛ ዒዛ ቤዛ ዒዛኮ ናአዚ ቤንሃዳዴ ካአታዳኔ።

25 ዒማና ዒሰራዔኤሌ ካአቲ፡ ዮዓሴ ቤንሃዳዴ ሃይሢ ማይንቲ ያሊ ባሺ ዒዛኮ ዓዴ ዒዮዓካአዜ ካአታዲ ዋይሢ ዋዶና ቤንሃዳዴ ያሊ ዔኬ ካታሞ ማሢ ዔኬኔ።

14

ዪሁዳ ካአቲ ዓሜሲያሴ (2ፆኦሲ. ዓሃኬ 25:1-24)

1 ዒዮዓካአዜ ናአዚ፡ ዮዓሴ ዒሰራዔኤሌይዳ ካአታዳንቴ ለምዓሳ ለዎና ዒዮዓሴ ናአዚ፡ ዓሜሲያሴ ዪሁዳይዳ ካአታዳኔ፤

2 ዒዚ ካአታዳአና ሌዓ ዒዛኮ ለማታሚ ዶንጎኬ፤ ዒዚ ዩሩሳሌሜይዳ ናንጊ ለማታሚ ታዘጳ ሌዔ ዋይሢ፤ ዒንዳ ዒዛኮ ዪሆዳዲኖ ጌይንታ፡ ዩሩሳሌሜይዳ ሾይንቴ ላአሊኩ።

3 ዓሜሲያሴ ናንጊና ናንጋ ጎዳ ዋዛሳ ማዳ ማዳኔ፤ ያዲ ማዔቴያ ዒዛኮ ማፆ፡ ካአቲ ዳውቴጉዲ ዒ ማዒባአሴ፤ ዒዚ ዳውቴጉዲ ማፆንደሢ ሃሺ ፔኤኮ ዓዴ፡ ዒዮዓሴ ማዳ ጎይፆማ ማዳኔ።

4 ዒ ዋዋዳይ ጌዔቴ፡- ጌሜራ ጌሜራ ማኸንቲ ዓአ ማሌ ዓሶኮ ካአዠ ማአሮ ሻሂባአሴ፤ ዩያሮ ዴራ ጌሜሮይዳ ፔ ያኦዞሞ ዒንጎ ባኮ ዒንጊፆና ዑንጅ ጨቤሾና ሃሺባአሴ።

5 ዓሜሲያሴ ካአታቶ ቤዞ ጌሊ ጊአጊሺ ዓዓርቃፆ ዒዛኮ ቤርታ ካአታዳ፡ ዒዛኮ ዓዶ ዋዳ ቢታንታ ዓአ ዓሶ ዋዲሹኔ፤

6 ጋዓንቴ ዔያቶኮ ናአቶ ዒዚ ዋዲሹባአሴ፤ ሙሴ ዔርዜ ዋጎ ማፃአፖይዳ ናንጊና ናንጋ ጎዳ፡- «ናአታ ማዳ ጎሞሮ ሾዔ ዓሳ ዋዲንቶፓ፤ ፔቴ ፔቴ ዓሲ ፔ ማዳ ዳቢንቶ ማዶማና ሌሊ ዋዲንቶም» ጌዒ ዓይሢ ዓይሢፆ ካፒ ኩንሣኔ።

7 ዓሜሲያሴ ዒማና «ሶኦጌ ዶኦቺ» ጌይንታ ቤሲዳ ታጾ ሺያ ማዓ ዔዶኦሜ ዓጮ ፖኦሊሶ ዋዲ ኩርሴኔ፤ ሃሢ ሴላዒ ጌይንታ ካታማሰኬና ያሊ ዓርቃፆ «ዮቅቲዔሌ» ጌይ ሱንሢ ጌሣኔ፤ ሃኖ ሄላንዳአና ዩና ካታሜላ ዒማ ሱንፆና ዔኤሊንታኔ።

14:6 ለሚ. ዋማ 24:16።

8 ዩካፓ ዒሰራዔኤሌ ካአቲ፡ ዒዩ ናአዚ፡ ዮዓሴ ኮይላ ዓሚሲያሴ፡- «ሂንዳ ሃኒ ዩዔ ኑ ዎሊ ዛጎም!» ጌዒ ሜኤሢ ዓሲ ደኪ ያላንዳጉዲ ዔቁሴኔ፤

9 ካአቲ፡ ዮዓሴ ጋዓንቴ፡- «ለባኖኦሴ ዲኮይዳ ዓአ ፔቲ ጋውዲ ዓንገሢሰኩና ለባኖኦሴ ዚቢቆ ኮይላ ታ ናዓሢም ኔኤኮ ዉዲር ናዔሎ ዒንጌ» ጌዒ ከኢታ ዳኬኔ፤ ጋዓንቴ ለባኖኦሴ ዲኮይዳ ዓአ ፔቲ ቦዖ ዒኢና ዴንዲቤቃ ቶኮና ሄርቃዛ ዩና ጋውዴላ ሃይቄኔ» ጋዓኔ።

10 «ዔኤዛይ ዓሚሲያሴ! ኔኤኒ ዔዶኦሚ ዓሶ ያሎና ባሼሢር ያቶርቂ ሹራ? ኔ ባሼ ባሼያማና ኔ ማኣራ ኔ ዴዒ ዚቲ ጌዔቲ ቃራኬ፤ ኔናንታ ኔ ዴርንታ ባይዛንዳ ባአዚ ዓይጋ ኔ ዓገሢ ሹራይ?» ጌዔኔ።

11 ዓሚሲያሴ ጋዓንቴ ዮዓሴ ዩያ ጌዔሢ ዔኤቢኬ ጌይባኣሴ፤ ዩያር ካአቲ ዮዓሴ ፔኤኮ ፖኦሊሶ ዔኪ ዓሚሲያሴ ያላኒ ዴንዳዖ ዪሁዳይዳ ዓአ ቤትሹሜሽ ጌይንታ ቤዛ ያሎ ዓርቄኔ፤

12 ዒማና ዪሁዳ ዓሳ ባሺንቴኔ፤ ፖኦሊሳኣ ቢያ ጳሽኪ ፔ ማኣሪ ማኣሪ ዴንዳኔ።

13 ዮዓሴ ዒማና ዓካዚያሴኮ ናአዚ ናዖ፡ ዓሚሲያሴ ሹምፔና ዓአንቴ ዓርቂ ዔኪ ዩሩሳላሚ ሄላኒ ዴንዴኔ፤ ዒኢካ ሄሄላዖ ዔፕራኤሜ ኬኤሎ ዲያ ካራፓ ዓርቃዖ ዴንዲ «ዎላ ካኣማ ኬኤሎ ዲያ ካር» ጌይንታ ቤዛ ሄላንዳኣና ያይዶ ጻኤታ ዎዳ ማዓ ኬኤሎ ዲያ ደይሴኔ።

14 ዒኢካፓ ዒ ዴንቄ ዎርቆና ቢርና ቢያ፤ ጌኤዦ ማኣርይዳ ካአዦ ካአሽኮ ባኮ ቢያሢና ካአቱሞ ማኣርይዳ ዓአ ባኮ ቢያ ጫኣኒ ሳማሪያ ማዒ ዴንዴኔ፤ ዓይሢ ማሃ ዒዚ ዲዔ ዓሶዎ ዔኪ ዴንዴኔ።

15 ካአቲ፡ ዮዓሴ ማዳ ሜሌ ባካ ቢያ፤ ዩያጉዲ ሃሃ ዪሁዳ ካአቲ፡ ዓሚሲያሴ ዒዚ ያሊ ባሼ ባሼፃኣ ዓቱዎዖ ዒሰራዔኤሌ ካአቶኮ ሃይሳ ፃኣፒንታ ማፃኣፓ ፃኣፒንቲ ዓኣኔ።

16 ዩካፓ ዮዓሴ ሃይቄ፡ ሳማሪያይዳ ካኣታ ዲኤታ ቤዛ ዲኡቴኔ፤ ዒዛ ቤዛ ላምዓሳ ዒዮርቢዓሚ ካኣታዳኔ።

**ዪሁዳ ካአቲ ዓሚሲያሴኮ ሃይቦ
(2ዖኦሲ. ዓሃኬ 25:25-28)**

17 ዒሰራዔኤሌ ካአቲ፡ ዒዮዓካኣዜ ናአዚ ዮዓሴ ሃይቄሰካፓ ዪሁዳ ካአቲ ዮዓሴ ናአዚ ዓሚሲያሴ ታጳ ደንጎ ለዔ ዴዔኔ፤

18 ዓሚሲያሴ ማዳ ሜሌ ባካ ቢያ ዪሁዳ ካአቶ ሃይሳ ፃኣፒንታ ማፃኣፓ ፃኣፒንቲ ዓኣኔ።

19 ዲማና ዲሚሲያሴ ዋዳኒ ዬሩሳሌምይዳ ዓሲ ዋላ ዘርቴሢር ዲዚ ፑኒ ላኪሽ ካታሞ ዴንዴኔ፤ ዲዛኮ ሞርካ ጋዓንቴ ጊንፆ ዓሲ ዳኪ ዲኢካ ዲዛ ዋዳሽኔ።

20 ዬካፓ ሌዛ ዲዛኮ ፓርና ጫኢኒንቲ ዬሩሳሌም ሙኬኔ፤ ዳውቴ ካታማ ካእታ ዲኡታ ቤዛ ዲዚ ዲኡቴኔ።

21 ዪሁዳ ዴራ ዲዛኮ ናኣዚ ያኣዚያ ካእታሢኔ፤ ዬያ ናዓሢኮ ዲማና ሌዓ ታጾ ላሆኬ።

22 ቤርታ ያሎና ዔውቴ፥ ዔላቴ ካታሞ ዓዴ ሃይቄሰካፓ ያኣዚያ ዋልቄና ያሊ ባሺ ማሂ ዔካፆ ጊንሣ ማሂ ጊኢጊሺ ማኹኔ።

ዲሰራዔኤሌ ካኣቲ ላምዓሳ ዲዮርቢዓመ

23 ዲዮዓሴ ናኣዚ፥ ዓሚሲያሴ ዪሁዳይዳ ካእታዴንቴ ታጾ ደንጋሳ ሌያና ዮዓሴ ናኣዚ ዲዮርቢዓመ ዲሰራዔኤሌይዳ ካእታዴኔ፤ ዲዚ ሳማሪያይዳ ናንጊ ያይዲታሚ ፔቴ ሌዔ ዋይሢኔ።

24 ላምዓሳ ዲዮርቢዓመ ዲሰራዔኤሌ ዓሶ ጎሞይዳ ዔኪ ጌልዚ፥ ዲዛኮ ቤርታ ካእታዴ፥ ናባፄ ናኣዚ ዲዮርቢዓመ ማዴ ፑርቶ ማዴ ማዲያና ጎሚ ማዲ ናንጊና ናንጋ ጎዳ ያዪሴኔ።

25 ቤርታ ዲሰራዔኤሌ ዓጪ ማዔያ ጌይፆ፡- ኬዶ ዘሎና ሃማቴ ባንሢ ዴንዳ ዓሬባ ባዘ ሄላንዳኣና ዓኣ ዓጮ ቢያ ያሎና ባሺ ጊንሣ ማሂ ዔኬኔ፤ ዬይ ቢያ ያዲ ማዲንቴሢ ጋትሂፔሬይዳ ሸይንቴ፥ ናንጊና ናንጋ ጎዳሞ ማዴ፥ ዓሚታዬ ናኣዚ፥ ያኣሲ ማሊያ ኬኤዛ ዮናኣሴ ዘሎና ናንጊና ናንጋ ጎዳ ማዔ ዲሰራዔኤሌ ያኣዛሢ ኬኤዜ ሃጊ ማዓንዳ ዋዘ ቃኣሎ ጎይፆናኬ።

26 ናንጊና ናንጋ ጎዳ ዲሰራዔኤሌ ዓሶኮ ዴኤፆ ማታሢ ዛጌኔ፤ ዲማና ዲሰራዔኤሌይዳ ዓይሎ ማዔቴያ ዓይሌቴዋ ዓሶ ማኣዳ ዓሲ ባኣሴ።

27 ያዲ ማዔቴያ ዔያታ ናንጊና ጋፒ ባይቃንዳፑዲ ናንጊና ናንጋ ጎዳኮ ማላሢቴዋሴ፤ ዬያር ላምዓሳ ዲዮርቢዓመ ዘሎና ዔያቶ ዲዚ ማኣዴኔ።

28 ላምዓሳ ዲዮርቢዓመ ማዴ ሜሌ ባካ ቢያ ያሎና ዲ ባሺ ባሺፆ፤ ዬያፑዲ ሃሣ ዪሁዳ ዓጪ ማዔ፥ ዴማሰቆንታ ሃማቴንታ ዲሰራዔኤሌ ዓሶሞ ማዓንዳፑዲ ዲ ማዴ ሃይሳ ቢያ ዲሰራዔኤሌ ዓሶኮ ካኣቶ ሃይሳ ፆኣፒንታ ማፃኣፓ ፆኣፒንቲ ዓኣኔ።

29 ዬካፓ ላምዓሳ ዲዮርቢዓመ ሃይቄ፥ ካእታ ዲኡታ ቤዛ ዲኡቴም ዲዛ ቤዘይዳ ዲዛኮ ናኣዚ ዛካሪያሴ ካእታዴኔ።

15

ጴሁዳ ካኦቲ የኦዚያ (2ዎኦሲ. ዓሃኬ 26:1-23)

1 ለምዓሳ ዲዮርቢዓሜ ዲሰራዔኤሌይዳ ካኦታዳንቴ ለማታሚ ለንካሳ ሌዖና ዓሜሲያሴ ናኦዚ፣ የኦዚያ ጴሁዳይዳ ካኦታዳ፤

2 ዒዚ ካኦታዳኦና ለዓ ዒዛኮ ታጾ ላሆኑ፤ ዒዚ ዬሩሳላሜይዳ ናንጊ ደንጊታሚ ለምዖ ሌዔ ዋይሄኔ፤ ዒንዳ ዒዛኮ ዪኮሊያ ጌይንታ ዬሩሳላሜይዳ ሾይንቴያኑ።

3 ዒዚ ዓዴ ማዴ ኮዦ ማዴ ጎይዖ ናንጊና ናንጋ ጎዳ ዋዛሳ ባኦዚ ማዴኔ፤

4 ጋዓንቴ ጌሜራ ጌሜራ ዓኦ ዓሳ ሜሌ ያኦዞ ካኦሽካ ማኦር ሻሃባኦሣሮ ዴራ ጌሜሮይዳ ዒንጎ ባኮ ዒንጊዖና ዑንጆ ጩቢሺዖ ሃሽባኦሴ፤

5 ዬካፓ ዑፁ ኬሰካ ዶርዓሢ ናንጊና ናንጋ ጎዳ የኦዚያይዳ ዓጌኔ፤ ዒዚ ሃይቃንዳያ ሄላንዳኦና ዬይ ዶርዓሢ ዒዛ ሃሽባኦሣሮ ዒዚ ማዴ ቢያ ሃሺ ዱሚ ኬኤሢዳ ፔኤሮ ናንጋኔ፤ ዒማና ካኦቲ ማዒ ዓጮ ዋይሄሢ ዒዛኮ ናኦዚ ዒዮዓታሜኑ።

6 ካኦቲ፣ የኦዚያ ማዴ ሜሌ ባካ ቢያ ጴሁዳኮ ካኦቶ ሃይሳ ፃኦፒንታ ማፃኦፓ ፃኦፒንቲ ዓኦኔ።

7 ዬካፓ የኦዚያ ሃይቁ፣ ዳውቴ ካታሞይዳ ዓኦ ቤርታ ዒዛኮ ዓደንሢ ዱኡፖ ቤዛ ዱኡቴኔ፤ ዒዛ ቤዘይዳ ዒዛኮ ናኦዚ፣ ዒዮዓታሜ ካኦታዳ።

ዒሰራዔኤሌ ካኦቲ ዛካሪያሴ

8 የኦዚያ ጴሁዳይዳ ካኦታዳንቴ ሃይሢታሚ ሳላሳ ሌዖና ለምዓሳ ዲዮርቢዓሜኮ ናኦዚ፣ ዛካሪያሴ ዒሰራዔኤሌይዳ ካኦታዳ፤ ዒዚ ሳማሪያይዳ ናንጊ ላሆ ሳንጊ ዋይሄኔ፤

9 ዒዚያ ዒዛኮ ቤርታ ካኦታዳ ካኦታ ቢያ ማዴ ጎሞ ማዲ ናንጊና ናንጋ ጎዳ ያዩሴኔ፤ ዒሰራዔኤሌ ዓሶ ዔኪ ጎማ ጌልዜ፣ ናባፄ ናኦዚ፣ ካኦቲ ዲዮርቢዓሜ ማዴ ባኮ ዒ ማዴኔ፤

10 ሻሉሜ ጌይንታ፣ ያቤሽ ናኦዚ ጌኔ ማሊሢና ዪብለዓሜ ጌይንታ ቤሰካ ካኦቲ ዛካሪያሴ ዋዲ ዒዛ ቤዛ ካኦታዳ።

11 ካኦቲ፣ ዛካሪያሴ ማዴ ሜሌ ባካ ቢያ ዒሰራዔኤሌኮ ካኦቶ ሃይሳ ፃኦፒንታ ማፃኦፓ ፃኦፒንቲ ዓኦኔ።

15:7 ዒሲ. 6:1።

12 ያዲ ማዕደና ካኣቲ ዒዩም ናንገና ናንጋ ጎዳ፡- «ዜርፃ ኔኤኮ ዴንዲ ያይዶ ሾይንቲ ሄላንዳኣና ዒሰራዔኤሌይዳ ካኣታዳንዳኔ» ጌይ ከኤዜ ሃጊ ማዓ ዋዞ ቃኣላ ኩሜኔ።

ዒሰራዔኤሌ ካኣቲ ሻሉሚ

13 ያኣዚያ ዩሁዳይዳ ካኣታዳንቲ ሃይሢታሚ ታዘጳሳ ሌዖና ያቤሼ ናኣዚ፣ ሻሉሚ ዒሰራዔኤሌይዳ ካኣታዳኔ፤ ዒዚ ሳማሪያይዳ ናንገ ፔቲ ዓገሊ ሌሊ ዋይሢ።

14 ዒማና ሚናሃሚ ጌይንታ ጋዲ ናኣዚ ቲርፃይዳፓ ሳማሪያ ዴንዳዖ ሻሉሚ ዋዲ ዒዛ ቤዛ ካኣታዳኔ።

15 ሻሉሚ ማዳ ሜሌ ባካ ቢያ፤ ሃሃ ዒዚ ማዳ ጌና ማዳ ሃይሳ ጉቤ ዒሰራዔኤሌ ካኣቶ ሃይሳ ፃኣፒንታ ማፃኣፓ ፃኣፒንቲ ዓኣኔ።

16 ሚናሃሚ ቲርፃፓ ዴንዶ ዴንዲቤቃ ቲፕሳሄ ካታሞና ዒኢካ ናንጋ ዓሰና ሃሃ ኮይሎይዳ ዓኣ ዓጮ ጉቤ ባይዜኔ፤ ዬያ ዒ ማዳሢ ዬና ካታሞይዳ ናንጋ ዓሳ ዒዛም ኩቹ ዒንገኒ ኮዒባኣሢርኬ፤ ዬያር ዒዚ ጎጳይንዶዋ ዓይሱዋዖ ጎጳ ዳርዚ ዳርዚ ዋዴኔ።

ዒሰራዔኤሌ ካኣቲ ሚናሃሚ

17 ያኣዚያ ዩሁዳይዳ ካኣታዳንቲ ሃይሢታሚ ታዘጳሳ ሌዖና ጋኣዴ ናኣዚ፣ ሚናሃሚ ዒሰራዔኤሌይዳ ካኣታዳኔ፤ ዒዚ ሳማሪያይዳ ናንገ ታጳ ለዔ ዋይሢ።

18 ዒዚ ዴንዲ ሃይቃንዳያ ሄላንዳኣና ዒሰራዔኤሌ ዓሶ ጎሞይዳ ዔኪ ጌልዜ፣ ናባፄ ናኣዚ፣ ዒዮርቢዓሚ ማዳ ፑርቶ ማዳ ማዲያና ጎሚ ማዲ ናንገና ናንጋ ጎዳ ያዩሲ ናንጌኔ።

19 ዒማና ዓሶኦ ካኣቲ፣ ፖሃ * ዒሰራዔኤሌ ያላኒ ሙኪ ዓጮ ጌሌኔ፤ ዬያር ሚናሃሚ ዒዛኮ ካኣቲማ ደዲ ዴዓንዳጉዲና ዒዛ ዒ ማማኣዳንዳጉዲ ሺኢቃኒ ሃይሢታሚ ያይዶ ሺያ ከሎ ማዓ ሹቹ ቢራ ዒንጎ ባኣዚ ማሂ ቲግላት ፔሌሴሬም ሺኢሺኔ።

20 ሚናሃሚ ዬያ ሚኢሾ ቡኩሴሢ ዒሰራዔኤሌ ዓሶኮ ያርጎጫ ፔቲ ፔቲሢ ደንገታሚ ሹቹ ቢራ ከሲ ዒንጋንዳጉዲ ዋልቃዲ ዔኪከ። ዬያር ፖሃ ያሉዋዖ ሃሺ ፔ ዓጮ ማዒ ዴንዴኔ።

21 ሚናሃሚ ማዳ ሜሌ ባካ ቢያ ዒሰራዔኤሌ ካኣቶ ሃይሳ ፃኣፒንታ ማፃኣፓ ፃኣፒንቲ ዓኣኔ።

22 ሚናሃሚ ሃይቁ፣ ዴኡቲም ዒዛ ቤዛ ዒዛኮ ናኣዚ ፔቃህያ ካኣታዳኔ።

15:12 2ካላቶ. ማ 10:30። * 15:19 ፖሃ ጌይንታ ዓሢኮ ሱንፃ ዓሶኦ ዓሶ ሙኡጮና፡- «ቲግላት ፔሌሴሬ» ጌይንታ።

ዲብራዔኤሌ ካኦቲ ፔቃህያ

23 ያኦዚያ ዪሁዳይዳ ካኦታዳንቴ ዶንጊታማሳ ሌዖና ሚናህሚ ናኦዚ፣ ፔቃህያ ዲብራዔኤሌይዳ ካኦታዳኔ፤ ዲዚ ሳማሪያይዳ ዴዒ ላምዖ ለዔ ዎይህኔ፤

24 ዲብራዔኤሌ ዓሶ ዔኪ ጎሜይዳ ጌልዜ፣ ናባፄ ናኦዚ፣ ዒዮርቢዓሜ ማዴ ፑርቶ ማዴ ማዴያና ጎሜ ማዴ ናንጊና ናንጋ ጎዳ ዒ ያዩሴኔ።

25 ፔቃህያኮ ፖኦሊሶ ባኦካፓ ፓቁሄ ጌይንታ፣ ሬማሊያ ናይ ማዔያ ፖኦሊሶ ሱኩጌሰኬይ ዶንጊታሚ ጌሌዓዴ ዓሲና ዎላ ጌኔ ማዴ ማዴኒ ዘርቲ፣ ሳማሪያይዳ ዓኦ ካኦቱሞ ማኦር ጋራ ዓኦ ዎርዲዮ ጊዴና ጌሊ ፔቃህያንታ ዓርጎቤንታ ሃሪዬ ጎዖሰኬያንታ ዎላ ዎዲ ቤዛ ካኦታዳኔ።

26 ፔቃህያ ማዴ ሜሌ ባካ ቢያ ዲብራዔኤሌ ካኦቶ ሃይሳ ፃኦፐንታ ማፃኣፓ ፃኦፐንቲ ዓኦኔ።

ዲብራዔኤሌ ካኦቲ ፓቁሄ

27 ያኦዚያ ዪሁዳይዳ ካኦታዳንቴ ዶንጊታሚ ላምዓሳ ሌዖና ሬማሊያ ናኦዚ፣ ፓቁሄ ዲብራዔኤሌይዳ ካኦታዳኔ፤ ዲዚ ሳማሪያይዳ ናንጊ ላማታሚ ለዔ ዎይህኔ።

28 ዲዚያ ዲብራዔኤሌ ዓሶ ጎሞይዳ ዔኪ ጌልዜ፣ ናባፄ ናኦዚ፣ ካኦቲ ዒዮርቢዓሜ ማዴህ ጎይዖ ጎሜ ማዴ ናንጊና ናንጋ ጎዳ ያዩሴኔ።

29 ዓሶኦሬ ካኦቲ፣ ፖሃ፡- ዒዮኔ፣ ዓቤልቤትማዕካ፣ ያኖሃ፣ ቁዴሾንታ ሃዖሬ ጌይንታ ካታማሰከንህ፤ ዬያጉዲ ጌሌዓዴንታ ጌሊላንታ ኒፕታኦሌኤሜንታኮ ዓጮ ጌሊ ዓርቁ ዴር ዔቢ ዓሶኦሬ ዴንዴህ ዬይ ፓቁሄ ጎዖህ ካኦታዲ ዓኦ ዎደናኮ።

30 ያኦዚያ ናኦዚ፣ ዒዮዓታሚ ዪሁዳይዳ ካኦታዳ ላማታማሳ ሌዖና ዔኤላ ናኦዚ ሆሴዔ ካኦቲ፣ ፓቁሄይዳ ጌኔ ማሊህና ዔቁ ዎዲያ ቤዛ ዲብራዔኤሌይዳ ካኦታዳኔ።

31 ፓቁሄ ማዴ ሜሌ ባካ ቢያ ዲብራዔኤሌ ካኦቶ ሃይሳ ፃኦፐንቲ ዓኦ ማፃኣፓ ፃኦፐንቲ ዓኦኔ።

**ዪሁዳ ካኦቲ ዒዮዓታሚ
(2ያኦሲ. ዓሃኬ 27:1-9)**

32 ሬማሊያ ናኦዚ፣ ፓቁሄ ዲብራዔኤሌይዳ ካኦታዳ ላምዓሳ ሌዖና ያኦዚያ ናኦዚ ዒዮዓታሚ ዪሁዳይዳ ካኦታዳኔ፤

33 ዲዚ ካኦታዳኦና ለዓ ዒዛኮ ላማታሚ ዶንጎከ፤ ዲዚ ዬሩሳላሜይዳ ናንጊ ታጳ ላሆ ለዔ ዎይህኔ፤ ዲንዳ ዒዛኮ ዪሩሻ ጌይንታያ ፃድቁ ናዎኮ።

34 ዒዚ ዓድ፡ ያኑዚያጉዲ ኮሺ ማዶ ማዲ ናንጊና ናንጋ ጎዳ ዋዛሴኔ፤

35 ጋዓንቴ ጌሜራ ጌሜራ ዓኣ ሜሌ ያኑዞ ካእሸኮ ማኣሮ ዒዚ ባይዚባኣሴ፤ ዴራ ዒኢካ ዒንጎ ባኮ ዒንጊያና ዑንጆ ጩቢሶዋ ሃሺባኣሴ። ዒዮዓታሜ ዒማና ጌኤዦ ማኣሮኮ ኬዶ ዛላ ዓኣ ኬኤሎ ዲያ ካሮ ኮሺሴኔ።

36 ዒዮዓታሜ ማዴ ሜሌ ባካ ቢያ ዪሁዳ ካኣቶ ሃይሳ ፃኣፒንታ ማፃአፓ ፃኣፒንቲ ዓኣኔ።

37 ናንጊና ናንጋ ጎዳ ቤርታዲ ሶኦሪያ ካኣቲ ሬዲኔና ዒሰራዔኤሌ ካኣቲ ፓቁሄና ዪሁዳ ያላንዳጉዲ ዳኬህሂ ዩይ፡ ዒዮዓታሜ ዪሁዳይዳ ካኣታዲ ዓኣንቴኬ፤

38 ዩካፓ ዒዮዓታሜ ሃይቁ፡ ዳውቴ ካታማ ካኣታ ዱኡታ ቤዛ ዱኡቴም ዒዛ ቤዛ ዒዛኮ ናኣዚ ዓካኣዜ ካኣታዳኔ።

16

ዪሁዳ ካኣቲ ዓካኣዜ

(2ያኦሲ. ዓሃኬ 28:1-27)

1 ሬማሊያ ናኣዚ፡ ፓቁሄ ዒሰራዔኤሌይዳ ካኣታዳንቴ ታጳ ለንካሳ ሌያና ዒዮዓታሜ ናኣዚ ዓካኣዜ ዪሁዳይዳ ካኣታዳኔ፤

2 ዒዚ ካኣታዳኣና ሌዓ ዒዛኮ ለማታሚኬ፤ ዒዚ ዩሩሳላሜይዳ ናንጊ ታጳ ላሆ ሌዔ ዋይህኔ፤ ዒዚያ ዒዛኮ ቤርታ ዓዴ፡ ዳውቴ ማዴ ኮዦ ማዶ ጎይያ ማዲባኣሴ፤ ዩያይዶንዶህሂ ሃሺ ናንጊና ናንጋ ጎዳ ማዔ ዒዛኮ ያኑዛህሂ ዋዛሱዋ ማዶ ማዳኔ፤

3 ዒሰራዔኤሌ ካኣታ ማዳ ጎይያ ፑርታ ማዶ ማዳኔ፤ ዒዚ ዒማና ፔኤኮ ናያ ሜሌ ያኑዞም ሚቹ ዒንጎ ባኣዚ ማሂ ሹኪ ሺኢሺኔ፤ ዩያ ዒ ማዴህሂ ዒሰራዔኤሌ ዴራ ናንጊና ናንጋ ጎዳ ዔያቶም «ዒንጋንዳኔ» ጌዔ ዓጩሎ ጌላኒ ቤርቲም ዴንዳኣና ናንጊና ናንጋ ጎዳ ዩኖ ዓጩፓ ዳውሲ ባይዜ፡ ዴራ ማዳ ሻኣካ ማዶ ማዳኒ ጌዒኬ።

4 ጌሜራ ጌሜራ ማዦንቴያ፡ ሜሌ ዴራ ካኣዦ ካኣሸካ ማኣሮንታ ዴኤፒ ዴኤፒ ማዔ ሚያ ሺቦንታይዳ ዒንጎ ባኣዚ ዓካኣዜ ሺኢሺ፡ ዑንጆያኣ ጩቢሺኔ።

5 ዒማና ሶኦሪያ ካኣቲ፡ ሬዲኔና ዒሰራዔኤሌ ካኣቲ፡ ፓቁሄና ዩሩሳላሜ ያላኒ ማንጌኔ፤ ጋዓንቴ ዔያታ ዓካኣዜ ባሻኒ ዳንዳዒባኣሴ።

16:3 ላሚ. ዋማ 12:31። 16:5 ዒሲ. 7:1።

6 ስራሪያ ካአቲ፣ ሬዊኔ ዔላቲ ካታሞ ያሊ ባሺ ማሃ ዔኪ ፔ ደማ ማሃዮ ዒኢካ ናንጋ ዓይሁዶ ዓሶ ኬሴኔ፤ ዬኖ ዋዶና ዔላቲይዳ ማዠ ደዔ ዔይዳሚ ዓሳ ሃኖ ሄላንዳኣና ዒኢካ ዓኣኔ።

7 ዬያሮ ካአቲ፣ ዓካኣዜ ዓሶኦሬ ካአቲ ፖሃም፡- «ታኣኒ ኔኤም ጉሙርቁንቲ ማዳ ዓይሌኬ፤ ኔኤኒ ታ ኮይላ ሙኪ ታና ያላኒ ዬዔ ሶኦሪያና ዒሰራዔኤሌ ካአቶናይዳፓ ዓውሴ» ጌዒ ከኢታ ዓሲ ዳኬኔ።

8 ዬያ ሌሊቱዋንቴ ዓካኣዜ ጌኤዠ ማኣሮና ካአቱሞ ማኣሮናኮ ማህ ጌሃ ማኣሮይዳ ቡኩሲ ጌሃና ዋርቆንታ ቢሮንታ ዓሶኦሬ ካአቲም ዒንጎ ባኣዚ ማሃ ዒንጋኒ ዳኬኔ።

9 ዓካኣዜኮ ዬያ ያኦጪያ ዔኪ ፖሃ ደማሰቆ ደንዲ ያሊ ዓርቄ፤ ካአቲ ሬዊኔያ ዋዶኔ፤ ዒኢካ ዓኣ ደሮ ዒዚ ዲዒ ዔኪ ቁሬ ጌይንታ ቤሲ ደንዳኔ።

10 ካአቲ፣ ዓካኣዜ ዒማና ደማሰቆ ደንዲ ካአቲ ፖሃና ካአማዮ ዒኢካ ማሌ ያኦዞም ዒንጎ ባኣዚ ዒንጎ ቤሲ ፔቴ ደንቄ፤ ዬያ ዒንጎ ባኮ ዒንጎ ቤዛሢ ማሊሲ ማዠንዳጉዲ ዬያ ማሊሲ ኮሾና ባኣዚ ገኢጊሺ ቁኤሳሢ፤ ዑሪያም ዳኬኔ፤

11 ዬያሮ ካአቲ ዓካኣዜ ሙካንዳሢኮ ቤርታ ዑሪያ ዬኖ ማላያ ዒንጎ ቤሲ ኮሾኔ፤

12 ዓካዚያሴ ደማሰቆይዳፓ ማዓዮ ዒንጎ ባኮ ዒንጎ ቤዛሢ ዒማ ጎይያ ፔዜ ማዠንጉቴቴ ዛጋኒ ዒኢካ ዒንጎ ባኣዚ ዒንጋኒ ዒንጎ ቤዜሎ ገዒ ኬሰኬኔ፤

13 ዒዚ ዒኢካ ሚቺ ዒንጎ ቆልሞ ሹኪ፤ ሃሃ ሃኣኮ ዒንገሢያ ዒንገጌ፤ ዬያጉዲ ዋይናፓ ኮሾና ዑዠ ዒንገያና ፔቱሞና ዒንጎ ባኮኮ ሱጉያ ዒኢካ ዋሃ።

14 ሞኦኖ ዓንጎና ኮሾና፣ ናንገና ናንጋ ጎዳም ዲማዳ፣ ዒንጎ ባኮ ዒንጎ ቤዛ ዬኖ ዓኪ ኮሾና ዒንጎ ቤዜሎንታ ጌኤዠ ማኣሮንታኮ ባኣካ ዓኣኔ፤ ዓካኣዜ ዬያ ዒንጎ ቤዛ ሺኢሺ ዒዚ ኮሺሴ ዓኮ ዒንጎ ቤዛኮ ኬዶ ዛላ ጌሃኔ፤

15 ዬካፓ ዒዚ ዑሪያም፡- «ሃያ ታኣኮ ኮሾና ዴኤፖ ዒንጎ ቤዛሢ ያኦሲም ጉቴና ዒንጎ ባኮ ዒንጎያ፤ ዓባ ኬዳኣና ዒንጎ ሃኣኮ ዒንገያ ዒንጎያ፤ ካአቲንታ ደሮንታ ዛሎ ሚቺ ዒንጎ ዒንገያና ሃኣኮ ዒንገያና ዒንጎያ፤ ሃሃ ደራ ዋይና ዑዠ ዒንገያ ዔኪ ሙካሢ ሃሃንታንዳጉዲ ማሃ፤ ዓሳ ሹካ ቆልሞኮ ሱጉያ ጉቤ ዒኢካ ዋሃ፤ ሞኦኖ ዓንጎና ኮሺንቴ ዒንጎ ቤዛ ጋዓንቴ ታኣኒ ኮዔ ባኣዚ ማዳያ ማዓንዳኔ» ጌይ ዓይሄኔ።

16 ዬያሮ ዑሪያ ካአቲ ዒዛ ዓይሄ ጎይያ ማዳ።።

16:14 ኬሲ. ማጻ 27:1-2፤ 2ዎኦሲ. ዓሃኬ 4:1።

17 ጌኤዡ ማኣሮይ ወይ ማድ፡ ሞኦኖ ዓንጎና ኮሺንቴ ሺራ ቶካ ዓኣ ባኮ ካኣቲ ዓካኣዜ ተቈኔ፤ ላሻሲ ኮሾና ሃሊሢ ማዔ ባኮዎ ጎኦቦ ዘላፓ ዔኬኔ፤ ዬያቶይ ይሢንቲ ዓኣ ማሰቶ ሳኣኖ ዔኬኔ፤ ሞኦኖ ዓንጎና ኮሺንቴ ዋኣያ ዴይሦ ዶኦላሢ ዴማ ሬኤኪ ዓርቂ ዓኣ፡ ሞኦኖ ዓንጎና ኮሺንቴ ታጰ ላምዖ ጌማይ ማላ ባኮኮ ጊኢራፓ ዔኪ ሺኢሺ ሹቸና ኮሾና ቤሲ ይሢኔ።

18 ዓካኣዜ ዓሶኦሬ ካኣቲ ዎዛሳኒ ጌኤዡ ማኣሮይ ካኣቶ ዖይታ ጌሢንታ ዴጌ ቤዘ ባይዜኔ፤ ሃሣ ዬያኮ ቤርታ ካኣታ ጌኤዡ ማኣሪ ጌላ ካሮዎ ዲርቂኔ።

19 ካኣቲ፡ ዓካኣዜ ማዴ ማሌ ባካ ቢያ ዪሁ ያኣቶ ሃይሳ ፃኣፒንታ ማፃአፓ ፃኣፒንቲ ዓኣኔ፤

20 ዬካፓ ዓካኣዜ ሃይቂ፡ ዳውቲ ካታማ ካኣታ ዱኡታ ቤዘ ዱኡቲኔ፤ ዒዛ ቤዛ ዒዛኮ ናኣዚ፡ ሂዚቂያሴ ካኣታዴኔ።

17

ዒሰራዔኤሌ ካኣቲ ሆሴዔ

1 ዓካኣዜ ዪሁ ዳይ ያኣታዴንቴ ታጰ ላምዓሳ ሌዖና ዔላ ናኣዚ፡ ሆሴዔ ዒሰራዔኤሌ ያይ ያኣታዴኔ፤ ዒዚ ሳማሪያይ ያንጊ ታዘጳ ሌዔ ዎይሢኔ፤

2 ዒዚ ጎማ ማዲ ናንጊና ናንጋ ጎዳ ዖዪሴኔ፤ ማዔቲያ ዒዚ ማዴ ዳቢንታ ዒዛኮ ቤርታ ካኣታዴ ዒሰራዔኤሌ ካኣታ ማዴሢጉ ዲቱዎሴ፤

3 ዓሶኦሬ ካኣቲ፡ ሳልሚናሶሬ ዒዛ ዖሌም ዒ ባሺንቲ ኩቺ ዒንጊ ሌዓ ሌዓ ዒዛም ጊኢሪሢ ሳርቂኔ።

4 ጋዓንቲ ዳካ ሌዔኮ ጊንፃፓ ካኣቲ፡ ሆሴዔ ሶዒ ጌይንታ ጊብፄ ካኣቲሰኬይ ሙኪ ዒዛ ማኣዳንዳጉዲ ዖኦጫኒ ኪኢታ ዓሲ ዳኬኔ፤ ሃሣ ሌዓ ሌዓ ዒዚ ዓሶኦሬ ካኣቲም ጊኢራ ጊኢሮዎ ሃሽኔ፤ ሳልሚናሶሬ ዬያ ዎይዛዖ ሆሴዔ ዓርቂሲ ቱኡሲ ማርካ ቱኪሴኔ።

ሳማሪያ ካኣቲኮ ደዒያ

5 ዬካፓ ካኣቲ፡ ሳልሚናሶሬ ዖልዚሮ ሙኪ ዒሰራዔኤሌ ዓጮ ጌላዖ ሳማሪያ ካታሞ ሃይሦ ሌዔ ማንጌኔ፤

6 ሆሴዔ ካኣታዴንቴ ታዘጳሳ ሌዖና ሳልሚናሶሬ ዖሊ ባሺ ሳማሪያ ሳርቂኔ፤ ዬካፓ ዒሰራዔኤሌ ዓሶ ዲዓዖ ቱኪ ዔኪ ዓሶኦሬ ዳንዳኔ፤ ዒዚ ዬያ ዓሶኮ ዘሎ ሃላሄ ካታማ፡ ዘሎ ጊንሣ ጎዛኔ ዓጮ ጋራ

16:17 1ካእቶ. ማ 7:23-29፤ 2ዖኦሲ. ዓሃኬ 4:2-6። 16:20 ዒሲ. 14:28።

ዓኣ ሃቦሬ ዎሮ ዓጫ፤ ዬያጉዲ ጊንሣ ዓቲ ዓሶ ሜዶኔ ካታሞይዳ ካታሞይዳ ጌሣኔ።

7 ዬይ ያዲ ማዲንቴሢ ሲሰራዔኤሌ ዓሳ ጎሜ ማዲ ጊብጭ ካኣቲ ኩጫፓ ዔያቶ ዓውሲ ኬሲ ዔያቶም ዒዚ «ዒንገንዳኔ» ጌዔ ዓጩሎ ባንሣ ዳኬ ናንጊና ናንገ ጎዳ ማዔ ዔያቶኮ ጆኦዛሢ ጆሴህረኮ፤ ዔያታ ዎዎይቲይ ጌዔቲ፡- ሜሌ ጆኦዛ ዚጊ ካኣሽኬኔ፤

8 ዒሰራዔኤሌ ዴራ ቤርቲም ዴንዳኣና ዔያቶኮ ቤርታፓ ናንጊና ናንገ ጎዳ ዳኪ ባይዜ ዴርኮ ፑርቶ ማዶ ዔያታ ማዶኔ፤ ዬያጉዲ ሃሣ ዒሰራዔኤሌ ካኣታ ዔያቶ ዔርዜ ፑርቶ ማዶ ዔኪ ዔያታ ማዶያ ማዔኔ።

9 ዒሰራዔኤሌ ዓሳ ዔያቶኮ ጆኦሲ ማዔ ናንጊና ናንገ ጎዳሢ ዒፃ ባኮ ቢያ ማዶኔ፤ ዓጮ ካፓ ዓሳ ኬሰኪ ዔቃ ዴጌ ቤዘይዳፓ ዓርቃፃ ዴንዲ ዴኤፖ ካታሞንታ ኮይላ ዓኣ ካታሞንታይዳ ቢያ፤ ዬያጉዲ ሃሣ ጌሜራ ጌሜራ ዓይሁዴቱዎ ዓሳ ፔ ጆኦዛ ካኣሽካ ቤሲ ኮሼኔ፤

10 ዔያታ ፔቲ ፔቲ ጌሜር ዑጆና ዴኤፖ ዴኤፖ ሚያ ሸባ ሹቹ ዳኣቦንታ ዓሽራ ጌይንታ፡ ላኣሎ ጆኦዜሎ ማላሢያ ኮሺ ዴቄኔ፤

11 ናንጊና ናንገ ጎዳ ዓጩሎይዳፓ ዳውሲ ባይዜ፡ ሜሌ ዴራ ማዳ ባኮ ቢያ ማዲ ዬይ ዴራ ፔ ጆኦዛም ዒንገ ቤዘ ቢያይዳ ዑንጃ ጩቢሴኔ፤ ዬያ ፑርቶ ማዶ ቢያሢና ናንጊና ናንገ ጎዳኮ ዳጎ ዔያታ ዔቁሴኔ፤

12 ዔያታ ሜሌ ጆኦዛም ዚጉዎጉዲ ናንጊና ናንገ ጎዳ ዔያቶ ዓይሣ ዎጎ ቢያ ዔያታ ሃሽኔ።

13 ናንጊና ናንገ ጎዳ ዒማና ዒሰራዔኤሌና ዪሁዳናም ላቲ ኬኤዛንዳ ኪኢታ ዓሲና ጆኦሲ ማላሢ ኬኤዛ ዓሲና ዳኪ፡- «ዒንሢ ማዶ ፑርቶ ማዶ ቢያ ሃሺ ማዑዎቲ፤ ታኣም ማዶያ ማዔ፡ ታ ማሊያ ኬኤዛ ዓሶ ዛሎና፤ ጊንሣ ሃሣ ታ ዳዌ ባኮ ዛጋ ዓሶ ዛሎና ዒንሢኮ ቤርታኣ ዓደንሢንታ ዒንሢንታም ታ ዓይሣ ዎጎዳ ዳምቦና ካፑዎቲ» ጌዔያኩ።

14 ዔያታ ጋዓንቴ ዓይሢንታኒ ኮዒባኣሴ፤ ናንጊና ናንገ ጎዳ ማዔ ጆኦዛሢም ጉሙርቁንቱዎያ ማዔ ዔያቶኮ ቤርታኣ ዓደንሢጉዲ ዎይዚ ዒፃያ ዔያታ ማዔኔ፤

15 ናንጊና ናንገ ጎዳ ዔያቶም ዒንጌ ዎጎ ዔያታ ዔኪባኣሴ፤ ዒዚ ዔያቶኮ ቤርታኣ ዓደንሢና ጫኣቄ ጫኣቄምዎ ዔያታ ካፒባኣሴ፤ ዔያቶም ላቲ ኬኤዛና ባኮ ቢያ ቦሃ ሃሽኔ፤ ዔያታ ጉሪ ማዔ፡ ሜሌ ጆኦዛ ዚጊ ካኣሽኪያና ጉሪ ፓሡዎ ዓሲ ማዒ ዓቲኔ፤ ዬያ ዓሶኮ ፑርቶ ማዶ ዔያታ ማዶዎጉዲ ጌዒ ናንጊና ናንገ ጎዳ ዔያቶ ዓይሣ

ዓይሢያ ሃሺ ዔያቶ ዓጮኮ ኮይላ ናገጋ፥ ሜሌ ዓሳ ማዳ ባኮ ቢያ ማዳኔ።

16 ናገገና ናገጋ ጎዳ ማዔ ዔያቶ ጾኦዛሂኮ ዓይሢያ ቢያ ዔያታ ሃሺ ፔኤኮ ጾኦሲ ማሂ ዚጋኒ ናኣሪ ማላ ላምዖ ባኣዚ ዎርቄና ማዢ ዔቁሴኔ፤ ዔያጉዲ ሃሃ ዓሽራ ጌይንታ ላኣሎ ጾኦኬሎ ማሊሲያኣ ዔኤቢ ማዢ ዔቁሴኔ፤ ዡኦጎም ዔያታ ዚጌኔ፤ ባዓሌ ጌይንታ ማሌ ጾኦዛማኣ ማዳያ ማዔኔ።

17 ዔያቶ፥ ሜሌ ጾኦዛም ዔያታ ፔኤኮ ዓቲንቆ ናኣቶንታ ዉዳሮ ናኣቶንታ ሹኪ ሚቺ ዓኒጎ ዓኒገሢሂ ማሂ ሺኢሽኔ፤ ሃይቄ ዓሶኮ ዔኤኦላ ዓሶንታ ዡዎንታ ኮይላኣ ዴንዲ ፔ ሜቶ ጾኦጫያ፥ ሃሃ ዡኦቻያ ማዔኔ፤ ዔያጉዲ ጾኦሲ ዒፃ ፑርታ ማዳ ቢያ ማዳኒ ፔና ዓኣሂ ዓኒገሪዖና ናገገና ናገጋ ጎዳኮ ዳጎ ዔቁሴኔ።

18 ዔያሮ ናገገና ናገጋ ጎዳ ዒሰራዔኤሌ ዓሶ ዑፃ ዳጋዲ ዪሁዳ ዓጮ ዓሶ ሌሊ ሃሻዖ ዒሰራዔኤሌ ዓሶ ፔ ቤርታፓ ሺኢሽኔ።

19 ጋዓንቴ ዪሁዳ ዓሳኣ ናገገና ናገጋ ጎዳ ማዔ ዔያቶኮ ጾኦዛሂ ዔያቶ ዓይሢ ዓይሢያ ካፒባኣሴ፤ ዔያታ ዒሰራዔኤሌ ዓሳ ማዳ ጎይዖማ ማዳያ ማዔኔ።

20 ዔያሮ ናገገና ናገጋ ጎዳ ዒሰራዔኤሌ ዓሶ ቢያ ሃሽኔ፤ ዒዛኮ ቤርታፓ ዔያቶ ሺኢሽ ፑርታ ማዳ ማዳ፥ ዔያቶኮ ሞርኮም ዓኣሂ ዓኒገሪ ሜታሴኔ።

21 ናገገና ናገጋ ጎዳ ዒሰራዔኤሌ ዓሶ ዪሁዳ ዓሶፓ ዲማሳዛ ዒሰራዔኤሌ ዓሳ ናባፄ ናኣዚ፥ ዒዮርቢዓሜ ዶኦሚ ካኣታህኔ፤ ዒማና ዒዮርቢዓሜ ዔያቶ ጾኦሲ ሃሺሲ ፑርታ ጎሜ ማዳሽኔ፤

22 ዔያታ ዒዮርቢዓሜ ማዳ ጎይዖ ጎሜ ማዳያ ሃሺባኣሴ።

23 ዔያሮ ናገገና ናገጋ ጎዳ ዔያቶ ፔ ቤርታፓ ሺኢሽኔ፤ ዔያ ዒ ማዳንዳያታሂ ዒዛም ማዳያ ማዔ፥ ዒዛ ማሊያ ኬኤዛ ዓሶ ዛሎና ላቴያኮ፤ ያዲ ማዒያና ዒሰራዔኤሌ ዓሳ ዲዒንቲ ዓሶኦሬ ዓጮ ዴንዲ ሃኖ ሄላንዳኣና ዒኢካ ናገጋኔ።

ዓሶኦሬ ዓሳ ዒሰራዔኤሌ ዓጮይዳ ሙኪ ደዔሂ
24 ዓሶኦሬ ካኣቲ ባብሎኔይዳ፥ ኩታይዳ፥ ዓዋይዳ፥ ሃማቲይዳ፤ ሃሃ ሴፓርዎሜ ጌይንታ ካታሞይዳ ናገጋ ዓይሁዳቱዋ ዴር ዔኪ ሙኪ ዳውሲንቲ ዴንዴ ዒሰራዔኤሌ ዓሶ ቤዛ ሳማሪያ ካታሞይዳ ዴይህኔ፤ ዔያሮ ዔያታ ዩንሂ ካታሞንሂ ዔኪ ዒኢካ ናገገሂ ዓርቄኔ።

17:16 1ካእቶ. ማ 12:28። 17:17 ላሚ. ዎማ 18:10።

25 ዔያታ ዒኢካ ሙኪ ናንሳ ዓርቃያ ናንገና ናንጋ ጎዳ ካአሽኪባኣሢሮ ዒዚ ዘቢ ዔያቶይዳ ዳኪ ዔያቶፓ ዳካ ዛላ ዓሲ ማንሢ ዎዲሹኔ፤

26 ዒማና ዓሶኦሪ ካኣቲም፡- «ሳማሪያ ካታሞይዳ ኔ ዔኪ ሙኪ ዴይሢ ዓሳ ዬኖ ዓጮ ያኦሲኮ ዎሳ ዔራያ ማዒባኣሢሮ ናንገና ናንጋ ጎዳ ዔያቶ ማንሢ ዎዳንዳ ዘቢ ዳኬኔ» ጋዓ ሃይሴ ዎይዚንቴኔ።

27 ዬያሮ ካኣቲ፡- «ኦኦኒ ዲዒ ዔኪ ሙኬ ቁኤሶፓ ፔቴ ዓሲ ዒኢካ ዳኩዎቴ፤ ዒኢካ ዒዚ ዳንዲ ዳዒ ዬኖ ዓጮ ያኦሲ ዓይሢ ዳምቦ ዬያ ዓሶም ዔርዘንጎ» ጌዒ ዓይሢኔ።

28 ያዲ ጌይ ዓይሢንቴሢሮ ሳማሪያፓ ዲዒንቴ ዔውቴ፡ ፔቴ ዒሰራዔኤሌ ዓሲ ማዔ ቁኤሴሰኬይ ቤኤቴኤሌ ዳንዲ ዒኢካ ዳዓዖ ዴራ ዎማይዲ ናንገና ናንጋ ጎዳ ካአሽካኒ ኮይሳቴያ ዔርዘኔ።

29 ሳማሪያ ሙኪ ዳዔ ዓሳ ጋዓንቴ ፔኤኮ ካአሽኮ ባኮ ኮሺያ ሃሾ ዒዲ ዒሰራዔኤሌ ዓሳ ገኢጊሹ፡ ዳጌ ቤዘይዳ ዓኣ ካአሽኮ ቤዛ ጌሢኔ፤ ፔቴ ፔቴ ጉርዳ ዔያታ ናንጋ ካታሞይዳ ቢያ ፔኤኮ ካአሽኮ ባኣዚ ማዢ ዔቂሴኔ።

30 ዬያይዲ ባብሎኔ ዴራ ሱኮትቤኖቴ ጌይንታ ያኦዛሢ ሱንያና ካአሽኮ ባኣዚ ማዢኔ፤ ዬያጉዲ ሃሢ ኩታይዳ ናንጋ ዓሳ ኔርጋሌ ጌይንታ ማሌ ያኦዞ ሱንያና ካአሽኮ ባኣዚ ማዢኔ፤ ሃማቴይዳ ናንጋ ዓሳኣ ዒሽማ ጌይንታ ማሌ ያኦዞ ሱንያና ካአሽኮ ባኣዚ ማዢኔ፤

31 ዓዎ ዴራኣ ሃሢ ኒብሃዜና ታርታቄ ጌይንታ ያኦዞ ሱንያና ካአሽኮ ባኣዚ ማዢኔ፤ ጊንሢ ሃሢ ሴፓርዎዬማ ዴራ ዓዲራማሌኬና ዓናማሌኬ ጌይንታ ያኦዞም ፔኤኮ ናኣቶ ሹኪ ሚቺ ዒንጎ ዒንጊሢ ማሃ ሺኢሹኔ።

32 ዬይ ዓሳ ዒማና ናንገና ናንጋ ጎዳ ካአሽካኔ። ያዲ ማዔቴያ ፔቴ ፔቴ ጉርዳፓ ማሌ ዓሳ ፔ ያኦዞ ካአሽካ ቤዘይዳ ማዳንዳያ፤ ሃሢ ዒንጎ ባኮ ዒንጋንዳ ቁኤሴያ ዶኦሬኔ።

33 ዬያይዲ ዔያታ ናንገና ናንጋ ጎዳ ካአሽካሢ ዓርቁኔ፤ ፔቴ ዛሎና ጋዓንቴ ቤርታ ዔያታ ዎላ ናንጋ ዴራ ማዳ ጎይያ ማሌ ያኦዞም ዘጊ ካአሽካኔ።

34 ዬያ ዔያታ ሚና ማዳ ባኮ ሃኖ ሄላንዳኣና ማዲ ማዲ ዓኣኔ፤ ዔያታ ናንገና ናንጋ ጎዳ ካአሽኩዎሴ፤ ሱንያ ዒሰራዔኤሌ ጌይንቴ፡ ያይቆኦ ናኣቶም ናንገና ናንጋ ጎዳ ዓይሢ ዳምቦንታ ዓይሢያንታ ዎሳንታ ካፒ ናንጋያ ማዒባኣሴ።

17:34 ማዢ. ማፃ 32:28፤ 35:10።

35 ናንጊና ናንጋ ጎዳ ዔያቶና ጫአቁሞ ጫአቁ ዒሰራዔኤሌ ዓላም ሂዚ ጌዒ ዓይሣኔ፡- «ሜሌ ጾኦዞ ካአሽኪፖቴ፤ ዩያቶም ማዲያ ማዒ ካአሽካኒ ዘጊፖቴ፤ ዒንጎ ባአዚያ ዒንጊፖቴ፤

36 ዴኤፒ ዋልቁና ሃሃ ቢታንቶና ጊብፄ ዓጫፓ ዒንሣ ኬሴሣ፡ ታና፡ ናንጊና ናንጋ ጎዳሣም ዓይሣንታያ ማዑዋቴ፤ ዘጊ ካአሽካኒና ዒንጎ ባአዚ ዒንጋኒ ኮይሳሣ ታአም ሌሊኬ፤

37 ጻኣፒ ታኣኒ ዒንሣም ዒንጌ ዳምቦ፡ ዓይሣንታ ዋጎንታ ቢያ ዋዴ ካፑዋቴ፤ ሜሌ ጾኦዞ ካአሽኪፖቴ፤

38 ታኣኒ ዒንሣና ጫአቁ ጫአቁሞ ዋሊፖቴ፤ ሜሌ ጾኦዞ ካአሽኪፖቴ፤

39 ታና፡ ዒንሣኮ ጾኦዞሣ፡ ናንጊና ናንጋ ጎዳ ካአሽኩዋቴ፤ ታኣኒ ዒንሣ ሞርኮ ኩጫፓ ዓውሲ ዒንሣ ዳቁሻንዳኔ።»

40 ጋዓንቴ ዩያታ፡ ሜሌ ዴራ ዋይዞ ዒዲ ፔኤኮ ሚናኣ ማዲ ማዲ።

41 ዩይ ዴራ ዩያይዲ ናንጊና ናንጋ ጎዳ ካአሽኪሣ ዓርቄ፤ ፔቴ ዘሎና ጋዓንቴ ፔኤኮ ካአሽኮ ጾኦዞ ዘጊ ካአሽካኔ፤ ዩኖ ዓሳኮ ዜርፃ ሃኖ ሄላንዳኣና ዩያይዲ ካአሽካ ጎይሣኬ።

18

ዪሁዳ ካአቲ ሂዚቁያሴ (2ጾኦሲ. ዓሃኬ 29:1-2፤ 31:1)

1 ዔላ ናአዚ፡ ሆሴዔ ዒሰራዔኤሌይዳ ካአታዳንቴ ሃይሣሳ ሌዖና ዓካኣዜ ናአዚ፡ ሂዚቁያሴ ዪሁዳይዳ ካአታዳኔ፤

2 ዒ ካአታዳኣና ሌዓ ዒዛኮ ላማታሚ ደንጎኬ፤ ዒዚ ዒማና ዩሩሳላሚይዳ ናንጊ ላማታሚ ታዞጳ ሌዔ ዋይሣኔ፤ ዒንዳ ዒዛኮ ዓቢያ ጌይንታያ ዛካሪያሴ ናይኬ፤

3 ዒዛኮ ዓዴ፡ ዳውቴ ማዴ ኮዦ ማዲ ጎይፆ ማዲ ናንጊና ናንጋ ጎዳ ዋዛሴ።

4 ሜሌ ዴራ ፔ ጾኦዞ ካአሽካ ማኣሮ ሻሂ ዒዚ ባይዜ፤ ሹጮ ዳኣቢ ዔቁሶናሣያ ማንሣኔ፤ ዓሽራ ጌይንታ ላኣሎ ጾኦዞሎ ሱንፆና ማዢ ኮሻና ባኮ ቆዳ ቆዳ ማንሣ ኬኤሬ፤ ሙሴ ሞኣኖ ዓንጎና ማዢ፡ ኔሁሽታኔ ጌይንታ ሸኣዦ ማላ ባኮዋ ማንሣ ጋኣጩኔ፤ ዩማ ሄላንዳኣና ዒሰራዔኤሌ ዓሳ ዩያም ዑንጃ ጩቢሻኔ።

17:35 ኬሲ. ማፃ 20:5፤ ላሚ. ዋማ 5:9። 17:36 ኬሲ. ማፃ 6:13። 18:4 ፓይ. ማፃ 21:9።

5 ሂዚቂያሴ ዒማና ዒሰራዔኤሌኮ ጾኦሲ ማዔ ናንገና ናንጋ ጎዳሢ ጉሙርቄኔ፤ ዒዛኮ ቤርታኣ ማዖም ዒዛኮ ጊንፃፓ ዒዛጉዴ ማሌ ካኣቲ ዪሁዳይዳ ካኣታዲባኣሴ፤

6 ሂዚቂያሴ ናንገና ናንጋ ጎዳም ጉሙርቄንታያ ማዔሢሮ ዒዛ ጎይዖ ሃንቶ ሃሺ ከሰከ ዎዴ ባኣሴ፤ ናንገና ናንጋ ጎዳ ሙሴም ዓይሤ ዓይሤዖ ቢያ ሂርጊ ካፒ ዒዚ ኩንሣኔ።

7 ዬዖሮ ናንገና ናንጋ ጎዳ ዒዛና ዎላ ማዒ ዒዛ ማኣዴኔ፤ ዒ ማዳ ባካ ቢያ ዒዛም ጊኢጋኔ፤ ዒማና ሂዚቂያሴ ዓሶኦሬ ካኣቲም ዎይዙዎያ ማዒ ዬያ ካኣቲም ዎርቆ ዒዳኔ።

8 ሃሣ ዒዚ ፒሊሰፃኤማ ዓሶ ዖሊ ባሺ ዳኮ ጉርዳፓ ዴንዲ ካታም ዴኤፖ ሄላንዳኣና፤ ጋኣዛ ካታምንታ ዒዛኮ ኮይላ ዓኣ ዓጮንታ ፒሊሰፃኤማ ዓሳ ናንጋ ቤዞ ቢያ ጌሊ ዓርቄኔ።

9 ሂዚቂያሴ ካኣታዳንቴ ዖይዳሳ ሌዖና፤ ሃሣ ጊንሣ ሆሴዔ ዒሰራዔኤሌይዳ ካኣታዳንቴ ላንካሳ ሌዖና ዓሶኦሬ ካኣቲ ሳልሚናሶሬ ዒሰራዔኤሌ ዓጮ ዖላኒ ሙኪ ሳማሪያ ካታም ማንጌኔ፤

10 ሳማሪያ ካታማ ማንጊንቴ ዓኣዖ ሃይሣሳ ሌዖና ሞርኮ ኩጫ ጉቤ ጌሊ ዓዲንቴኔ፤ ዬይ ያዲ ማዔሢ ሂዚቂያሴ ዪሁዳይዳ ካኣታዳንቴ ላሃሳ ሌዖና፤ ሆሴዔ ዒሰራዔኤሌይዳ ካኣታዳንቴ ታዘጳሳ ሌዖናኩ።

11 ዒማና ዓሶኦሬ ካኣቲ ዒሰራዔኤሌ ዓሶ ዲዒ ዓሶኦሬ ዔኪ ዴንዳዖ ዒያቶይዳፓ ዳካ ዛላ ዓሲ ሃላሃ ካታማ፤ ዛላ ዓሲ ጊንሣ ጎዛኔ ዓጮ ጋራ ዓኣ ሃሶሬ ዎር ኮይላ፤ ዓቲ ዓሶ ማዶኔ ካታምይዳ ካታምይዳ ዴይሣኔ።

12 ሳማሪያ ካታማ ደዒ ዬያይዲ ባይቄሢ ዒሰራዔኤሌ ዓሳ ናንገና ናንጋ ጎዳ ማዔ ዔያቶ ጾኣዛሢም ዓይሢንቴባኣሢሮኩ፤ ዔያታ ዎዎይቴይ ጌዔቴ ናንገና ናንጋ ጎዳና ዎላ ጫኣቄ ጫኣቄም ሃሺኔ፤ ናንገና ናንጋ ጎዳ ዒዛኮ ዓይላሢ ሙሴ ዛሎና ዒንጌ ዎሳ ቢያ ዓይሢንቴ ካፓያ ማዒባኣሴ፤ ጾኦሲኮ ቃኣሎ ዎይዛኒ፤ ሃሣ ዎሳ ካፓኒያ ዔያታ ኮዒባኣሴ።

ዓሶኦሬ ዓሳ ዬሩሳላማ ዖላኒ ዚርቄ ዚርቄዖ
(2ዖኦሲ. ዓሃኬ 32:1-19፤ ዒሲ. 36:1-22)

13 ሂዚቂያሴ ካኣታዳንቴ ታጾ ዖይዳሳ ሌዖና ዓሶኦሬ ካኣቲ፤ ሴናክሬማ ዖልዚ ቡሊ ዙሎ ከልቄ ዲርቆና ዪሁዳ ካታም ዓርቄኔ፤

14 ዒማና ሂዚቂያሴ ላኪሺይዳ ዴንኪ ዴዒ ዓኣ ሴናክሬማም፡- «ታ ዳቤኔ፤ ሃዳራ ዖሊዖ ሃሺ፤ ኔ ጌዔ ባኣዚ ታ ኔኤም ጨጋንዳኔ» ጌይ ኪኢታ ዳኩኔ፤ ሴናክሬማ ማሃዖ፡- «ኔኤኒ ታጾ ሺያ ኪሎ ማዓ

ሹቺ ቢራና ፔቴ ሺያ ኪሎ ማዓ ዎርቁ ታኣም ዳካንዳጉዲ ታ ኮዓኔ» ጌዔኔ።

15 ዬያር ሂዚቂያሴ ጌኤዡ ማኣሮና ካኣቱም ማኣሮናኮ ማሆ ጌሆ ከኤኦይዳ ዓኣ ሹጮ ቢሮንታ ዎርቆንታ ቢያ ቡኩሲ ዔኪ ዒዛም ዳኮኔ፤

16 ሂዚቂያሴ ዒማና ጌኤዡ ማኣሮ ጌሎ ካሮ ጳርቁ ኮሸና ዎርቆንታ ዒዚ ፔኤሮ ጌኤዡ ማኣሮ ጌሎ ካራ ዓኣ ቱርቱር ጳርቁ ጊኢጊሼ ዎርቆ ቡጊ ቡጊ ዔኪ ሴናክሬሜም ዳኮኔ።

17 ዒ ያዲዴቲያ ላሚ ሃሃ ላኪሼጋ ያልዚ ያላንዳ ዲቢ ዓሲ ዬሩሳላሚ ዴንዲ ሂዚቂያሴ ያሎም ጌዒ ዓሶኦሬ ካኣቲ ፖኦሊሶ ዓይሣኔ፤ ዬና ያሎ ዓሳ ዴኤፒ ዴኤፒ ቢታንቶ ዓኣ ፖኦሊሴ ሱኡጌ ሃይሃ ዔያቶ ዔኪ ዓኣዲያኮ፤ ዔያታ ዒማና ዬሩሳላሚ ሄሄላያ ኬዴና ዓኣ ቦቆላጋ ዎኣፃ ዴንዳ ጎይያ ኮይሊና ዓፒሎ ማሰኮ ቤዞ ባንሣ ዔኪ ዴንዳ ጎይያይዳ ዔቁኔ፤

18 ዬካጋ ዔያታ ሂዚቂያሴም ኪኢታ ዳኮኔ፤ ዬያር ሂዚቂያሴ ዒዛኮ ደንዛ ማዔያ ቢታንቶ ዓኣ ሃይሃ ዓሲ ዬና ዓሶና ዴንዲ ካኣቶም ዳኮኔ፤ ዬንሣ ሃይሃ ዓሶንሣ፡- ካኣቱም ማኣራ ዓኣ ባኮ ቢታንቶና ዎይሃያ፡ ሂልቂያ ናኣዚ፡ ዔኤሌያቁሜንታ ካኣቱም ማኣሮይዳ ፃኣፖ ባኮ ፃኣጋ፡ ሼቢናንታ ዲማ ዲማ ፃኣፒንጉቴ ባኮ ጌሣ ዓርቃ፡ ዓሳኣፔ ናኣዚ፡ ዮዓሃንታኮ፤

19 ዓሶኦሬ ዓሶኮ ያሎ ዓሶ ዓይሣ ዓሶጋ ፔቴሰኬይ፡- «ዴንዲ ሂዚቂያሴም ሂዚ ጎዑዋቴ፤ ሳሶኦሬ ካኣቲ፡ ዴኤጋሣ ሂዚ ጋዓኔ፡ ኔ ዬያይዲ ጉሙርቁ ባኬላ ዓይጌንዴዳይ?

20 ጉሪ ዲቢ ባኣዚ ጌሰቲ ሺሪሣ ያልዚ ያላሣና ዎልቁና ማዓ? ያኦኒ ኔና ማኣዳንዳኔ ጌዒዳይ ኔኤኒ ዓሶኦሬም ዎይዞ ዒፃኒ ማሊ ዔቁሣ?

21 ጊብፄ ካኣቲ ታና ማኣዳንዳኔ ጌዒ ኔ ማሌቴ ሜቃኒ ጳሬ ዎኦሺ ኮኣላዴ ዓሲ ኔ ማዔያኮ፤ ዬይ ሜቁም ዬያኮ ጳኦሊንፃ ኩጮ ኔኤኮ ጫርጋንዳኔ፤ ዎይዞ! ጊብፄ ካኣቲ ጉሙርቃ ዓሲም ቢያ ጊብፄ ካኣቲ ያዲ ማዓንዳኔ» ጌይ ዓሶኦሬ ካኣቲ ኔና ያኦጫኔ» ሂዚ ጌዔኔ።

22 ዓሶኦሬ ዓሶኮ ያሎ ዓሶ ዓይሣሣ ጊንሣ ሃሃ፡- «ናገጊና ናገጋ ጎዳ ማዔ ኔ ያኦዛሣ ኔና ማኣዳንዳኔ ጌዒ ኔ ማላ? ዬይ ያዲ ማዑዋጉዲ ናገጊና ናገጋ ጎዳኮ ዲማዴ ቤዞና ዒዛም ዒንጎ ባኮ ዒንጎ ቤዞ ሻሃ፡- «ይሁዳ ዓሶንታ ዬሩሳላሚ ዓሶንታ ካኣሸካኒ ኮይሳሣ ዬሩሳላሚይዳ ዓኣ፡ ፔቴ ዒንጎ ቤዞማካ ሌሊኮ» ኔኤኒ ጌዔኔ።

23 ሃሣ ታኣኒ ዓሶኦሬ ካኣቲ ሱንያና ዔቃዛ ኑ ሂንዳ ዎሊ ዛጎም፤ ሳጋሪ ዳንዳዓንዳ ጊዳ ዓሲ ኔኤኮ ዓኣቴ ሂንዳ ታ ኔኤም ላምዎ ሺያ

ፓሮ ዲንሳም!

24 ዓሶኦሬ ዓሶኦ ሶሎ ዓሶ ሱኡሳፓ ሚርጌና ለኣፓ ማዔ ዓሰናታዎ ኔኤኒ ዓርቂ ዲንዳዓዓኬ፤ <ጊብፄ ዓሳ ሳርጌሎ ያይቶና ፓራሢና ታኣም ዳካንዳኔ> ጌዒ ኔኤኒ ካፓሢ ይያርኩ።

25 ታኣኒ ኔ ዓጮ ያሊ ባይዛኒ ሙኬሢ ናንጊና ናንጋ ጎዳ ጌዔምቱዎ ኔኤም ማላ? ሃኖ ዓጮሎ ያሊ ታኣኒ ባይዛንዳጉዲ ናንጊና ናንጋ ጎዳ ፔኤሮ ታና ዓይሣኔ» ጌዔኔ።

26 ዩካፓ ዔኤሊያቁሜንታ ሹቢናንታ ዮዓሃንታ ይያ ያሎ ዓሶ ዓይሣሢ ኮይላ፡- «ኩም ዔርታያታሢሮ ሃዳራ ሶኦሪያ ሙኡቺና ኬኤዜ፤ ካታሞኮ ኬኤሎ ዲያ ዑፃ ዓኣ ዴራ ቢያ ወይዘ፡ ዔብሬ ዓሶ ሙኡጮና ኬኤዚፖ» ጌዔኔ።

27 ጋዓንቲ ዒዚ፡- «ዓሶኦሬ ካኣቲ ሃያ ባኮ ቢያ ዲንሢና ዲንሢ ካኣቲናም ለሊ ኬኤዛንዳጉዲ ዳኬያ ዲንሢም ማላ? ፔቲታዎ ያዲቱዋሴ፤ ዔያታኣ ዲንሢጉዲ ፔኤኮ ሺዎ ሙዓንዳያና ሹኤዠ ዑሽካንዳያ ሄላንዳኣና ካራ ባይዚ ሜታዳንዳ ዓሰታሢሮ ታኣኒ ኬኤዛ ባኮ ካታሞኮ ኬኤሎ ዲያ ዑፃ ዓኣ ዓሳኣ ወይዛንዳጉዲኬ» ጌዔኔ።

28 ዩካፓ ይይ ዓሶኦሬ ዓጮኮ ቢታንታ ዓኣ ዓሢ ዴዔ ቤዛፓ ዔቁ፡ ዑኡዘ ፔኤኮ ዳጊዳዎ ዔብሬ ዓሶ ሙኡቺና ሂዚ ጌይ ኬኤዚሢሢ ዓርቁኔ፤ «ዓሶኦሬ ካኣቲ ዲንሢም ጋዓ ባኮ ወይዘቱ!»

29 ሂዚቁያሴና ጌሺንቲፖቲ! ዒዚ ዲንሢ ዓውሳኒ ፔቲታዎ ዳንዳዑዋሴ!

30 ሂዚቁያሴ፡- ናንጊና ናንጋ ጎዳ ጉሙርቁዋቲ፤ ዒዚ ዲንሢ ዓውሳንዳኔ፤ ኦኡኮ ካታማ ዓሶኦሬ ዓሶኮ ያሎ ዓሶ ኩጮ ጋሮ ጌሎዋጉዲ ናንጊና ናንጋ ጎዳ ቃዛንዳኔ» ጌይ ጌይ ዲንሢ ማቃ ማቁዎ ወይዘፖቲ፤

31 ሂዚቁያሴ ጋዓ ባኮ ወይዘፖቲ፤ ዲንሢ ካታማፓ ኬሰኪ ኩቺ ዲንጋንዳጉዲ ዓሶኦሬ ካኣቲ ዲንሢ ዓይሣኔ፤ ዲንሢ ይያይዴቲ ዲንሢ ቢያሢ ዲንሢኮ ወይኖ ዓኣፖና ቤሌሴ ሚዎኮ ዓኣፖ ሙዓንዳኔ፤ ዲንሢኮ ዔቶ ዋኣፃፓኣ ዋኣፃ ዲንሢ ዑሽካንዳኔ፤

32 ያዲዲ ዲንሢ ማዲ ዴዓንዳሢ ዓሶኦሬ ካኣቲ ሙኪ ዲንሢ ዓጮሎ ማማላ ዓጪ ዔኪ ዓኣዲ ዲንሢ ዴይሣንዳያ ሄላንዳኣናኬ፤ ዩኖ ዓጮሎይዳ ወይኖ ዑዠ ጩኡጲ ኮሺንታ ወይኔ ጎሺንታ ቃራ ሃኣኮ ካፃ ጊዳ ጎሺያ ዓኣኔ፤ ዩኖ ሳዔሎይዳ ዛይቶ ሪሚቶ ዓኣፖንታ ይያፓ ዔውታ ዛይቶንታ፤ ይያጉዲ ሃሣ ዔኤሲያ ኩሜ ዓጪኬ፤ ዓሶኦሬ ካኣቲ ዲንሢ ዓይሣማ ዲንሢ ማዳቲ ሹምፔና ዲንሢ

ናንጋንዳኔ፥ ሃይቂንዲዋሴ፤ ዬያሮ ሃሢ ሂዘቂያሴ፡- <ናንገና ናንጋ ጎዳ
ዒንሢ ዓውሳንዳኔ፥ ጌይፆና ማቂ ጌጌሼሢ ዔሩዋቲ፤

33 ሂንዳ ማሉዋቲ፤ ሜሌ ዴሮኮ ዓሶኦሬ ካኣቲ ኩጫፓ ፔኤኮ
ዓጮ ዓውሴ ፆኦዛ ፔቲታ? ዓኣ?

34 ሂዳፆ ሃሢ ሃማቲና ዓርፓዴ ካታሞናኮ ፆኦዛ ዋካዳፆ?
ሴፓርዋዬሜንታ ሄናዒንታ ዒዋንታኮ ፆኦዛሸ፡ ዋካዳፆ?
ዔያቶይዳፓ ፔቲ ፆኦዛሢታፆ ሳማሪያ ካታሞ ታ ኩጫፓ ዓውሲያ?

35 ዬያቶ ዓጮ ቢያሢኮ ፆኦዛ ዓሶኦሬ ካኣቲ ኩጫፓ ዬያ ዓጮ
ዓውሴ ዋዴ ዓኣ? ሂዳፆ ዒንሢ፡- <ናንገና ናንጋ ጎዳ ዬሩሳላሜ
ዓውሳንዳኔ፥ ጌይ ዋቲቲ ማላይ?>

36 ዴራ ዒማና ካኣቲ ሂዘቂያሴ ዔያቶ ዓይሢ ከኢቲያታሢሮ
ዔኤቢ ጎፀዋፆ ዜቲ ጌዔኔ፤

37 ዬካፓ ዔኤሊያቂሜንታ ሼቢንታ ዮዓሄንታ ፆዩ ፔኤኮ ማኣዓሢ
ዳርዜኔ፤ ዬያይዴሰካፓ ዔያታ ካኣቲ፥ ሂዘቂያሴ ኮይላ ሙኪ ዓሶኦሬ
ዓጮኮ ቢታንታ ዓኣ ዓሢ ጌዔ ባኮ ከኤዜኔ።

19

ካኣቲ ሂዘቂያሴ ፆኦሲ ማሊፆ ከኤዛ ዒሲያሴ ኮይላ ፆኦጮፍ
ባኮ

(ዒሲ. 37:1-7)

1 ካኣቲ፥ ሂዘቂያሴ ዬያ ባኮ ቢያ ዋይዛፆ ፆዩ ፔኤኮ ማኣዓሢ
ዳርዜኔ፤ ሲዬፓቲሌያ ማይንቲ ናንገና ናንጋ ጎዳ ካኣሸኪንታ ጌኤዢፍ
ማኣሪ ዴንዴኔ፤

2 ኔጉዋፆ ዒማና ዒዚ ካኣቲሞ ማኣራ ሱኡጋቶና ማዳ፥
ዔኤሊያቂሜንታ ካኣቲሞ ማኣሮይዳ ፆኣፖ ባኮ ፆኣፓ፥ ሼቢናንታ
ጫዋ ጫዋ ማዔ ቁኤሴንታ ዓሞፆ ናኣዚ ፆኦሲ ማሊፆ ከኤዛ
ዒሲያሴ ኮይላ ዳኬኔ፤ ዔያታኣ ዒማና ሲዮፓቲሌ ማይንቲ ዓኣኔ።

3 ዒሲያሴሞ ዒዚ ሂዚ ጋዓ ከኢታ ዳኬኔ፡- «ሃሮ ሃይ ዴኤፒ ሜቶ
ከሊኬ፤ ኦና ቦርሲሳ ፑርታ ባኣዚ ኦጊዳ ሙኬኔ፤ ሸይጮ ዋዳ ሄላዛ
ባናኒ ዋልቁ ባይቁ ላኣሊ ኦ ማዔኔ፤

4 ናንገና ናንጋ ጎዳሢ ጫሽካንዳጉዲ ዓሶኦሬ ካኣቲ ዒዛሞ ማዳ፥
ዴኤፒ ሱኡጌሰኬያ ዳኬኔ፤ ጎፆንቲ ናንገና ናንጋ ጎዳ ማዔ ኔ ፆኦዛሢ
ዬያ ጫዢ ዋይዚ ዬያ ጫሽኬሢዳ ሜቶ ዓጋንዳያ ናንዳኔ፤ ዬያሮ
ኦ ዴሮ ባኣካፓ ሸምፔና ዓቲ ዓኣ ዓሶሞ ሃዳራ ናንገና ናንጋ ጎዳ
ሸኢቁ።»

5 ሂዘቂያሴ ዳኬ ከኢቶ ዓሶንሢ ዒሲያሴ ኮይላ ሙካዛ፥

6 ዲሲያሱ:- «ናንገና ናንጋ ጎዳ ሂዲ ጋዓኔ፡ ጌዒ ዲንህ ጎዳህም ኬኤዙዋቲ፤ ዓሶኦ ላካቲም ማዳ ዓሳ <ዲንህ ዲ ዓውሲንዲዋሱ> ጌዒ ታና ጫሽካንቴ ዲንህ ዋይዜ ባኮሮ ዔያቶ ዲጊጨፖቲ።

7 ታኣኒ ዲዛ ዲጊቹ ካራ ባይዚሳንዳ ዓያና ዳካንዳኔ፤ ሃይሴያ ዲ ዋይዛንዳኔ፤ ዬያሮ ዲ ፔ ዓጮ ማዒ ዴንዳዛ ታ ዲኢካ ዲዛ ጨንቻ ዓፓሮና ዋዲሻንዳኔ።»

ዓሶኦ ላካ ሃሃ ማሌ ዚርቁህ ከኢታ ዳኬህ
(ዲሲ. 37:8-20)

8 ዓሶኦ ላካቲ ዲዚ ዲንኪ ዴዔ ቤዞ፡ ላኪሽፓ ሊቢና ያላኒ ዴንዳህ ዓሶኦ ላካ ስሎ ዓሶ ዓይሃህ ዋይዛያ ዲኢካ ዴንዳኔ።

9 ዲማና ዲቶጲያ ካኣቲ፡ ቲርቃሃ ጊብፄ ዓሲ ማዔያ ያልዚ ዓሲ ዔኪ ዔያቶ ያላኒ ሙካህ ዓሶኦ ላካ ዋይዜ፤ ዬያሮ ኔጉዋየ ዓሶኦ ላካቲ ሂዚቁያሱም ሂዚ ጋዓ ከኢታ ዋርቃታ ያኣፒ ዳኬኔ፡-

10 «ዪሁዳ ካኣቲዮ፡ ሂዚቁያሱ! ኔኤኒ ጉሙርቃ ያኣዛህ፡- ዩሩሳላሜ ዓሶኦ ላካቲ ኩጮ ጋሮ ጌላዓኬ» ጌይ ኔና ማቆፓ፤

11 ዓሶኦ ላካቲ ዓጮ ሚርጌህ ቢያ ዋይቲ ጋፒሲ ባይዜቲያ ኔ ዋይዜ፤ ኔ ዬያ ኩጫፓ ቶላንዳያ ኔኤም ማላ?

12 ታ ዓዶንህ ሚና ጎዛኔንታ ካኣራኔንታ ሬፀፔ ጌይንታ ካታዋ ደይሲ ባይዜ፤ ቲላሳሪይዳ ናንጋ፡ ዔይኔ ዓሶ ዔያታ ዋይኔ፤ ዬይ ባካ ቢያ ማዲንቴያና ዔያቶኮ ያኣዛፓ ፔቲታዖ ዔያቶ ዓውሲያ?

13 ሂንዳ ኮሺ ማላ፤ ሃማቲ፡ ዓርፓዴ፡ ሴፓርዋዔ፡ ሄናዲንታ ዲዋ ካታሞንታኮ ካኣታ ሃህ ዋካዳይ?»

ሂዚቁያሱ ሺኢቁ ሺኢጲያ

14 ካኣቲ፡ ሂዚቁያሱ ዬያ ያኣፒንቴ ከኢቶ ዓሶንህፓ ዔኪ ናባቤ፤ ዬካፓ ዬያ ዋርቃቶ ዔኪ ጌኤዡ ማኣሪ ዴንዳየ ናንገና ናንጋ ጎዳ ቤርታ ቡሊ ጌህ፤

15 ሂዚ ጌዒ ሺኢቁ፡- «ናንገና ናንጋ ጎዳ ማዔ ዲሰራዔኤሌ ያኣዛሂዮ! ከሩቤኤሎይዳ፤ ሃሃ ጊንሃ ኔኤኮ ቦንቹንቴ ካኣቲዋ ያይቶይዳ ዴዒ ዓኣ ያኣዛህ ኔና ሌሊኬ፤ ዓጮ ጉቤ ካኣቶኮ ሱኡጋህ ኔናኬ፤ ጫሪንቹንታ ሳዓንታ ማዡህ ኔናኬ፤

16 ናንገና ናንጋ ጎዳሂዮ! ኦና ሂሌ ባኮ ቢያ ሂንዳ ሃህ ዛጌ፤ ናንገና ናንጋ ያኣዛህ፡ ኔና ሴናክሪሜ ጫሽኪ ዚርቃ ዚርቁያ ጉቤ ዋይዜ፤

17 ናንገና ናንጋ ጎዳሂዮ! ዓሶኦ ላካታ ሚርጌ ዴሬንታ ዓጨንታ ያሊ ባይዜህ ጎኔኬ።

19:15 ኬሲ. ማፃ 25:22።

18 ዬያቶ ዓሶኮ ያኦዛ ሚሢና ሹቸናይዳፓ ዓርሲ፥ ዓሲ ፔ ኩቻ ማገድያ፤ ያኦሲ ማዒባኣያታሢሮ ዓሶኦሬ ካኣታ ታሚዳ ዓጊ ሚቸ ባይዜኔ።

19 ናንጊና ናንጋ ጎዳ ማዔ ያኦዛሢ፤ ኔኤኒ ሌሊ ያኦሲ ማዔሢ ጉቤ ዓፎኤ ካኣታ ዔራንዳጉዲ ሃሢ ኑና ዓሶኦሬ ካኣቲፓ ዓውሴ። »

ዒሲያሴ ካኣቲ ሂዚቁያሴም ዳኬ ኪኢቶ (ዒሲ. 37:21-38)

20 ዬዛፓ ዓሞፃ ናኣዚ፥ ዒሲያሴ ካኣቲ ሂዚቁያሴም ሂዚ ጋዓ ኪኢታ ዳኬኔ፡- «ናንጊና ናንጋ ጎዳ ማዔ ዒሲራዔኤሌ ያኦዛሢ ሂዚ ጋዓኔ፤ ዓሶኦሬ ካኣቲ፥ ሴናክሬሜ ዛሎ ኔኤኒ ሸኢቁ ሸኢጲያ ታ ዋይዜኔ፤»

21 ዒዛ ዛሎ ናንጊና ናንጋ ጎዳ ሂዚ ጋዓኔ፡-
ጲዮኔይዳ ዓኣ ኩሙዖ ዉዲሮ ናዔላ
ኔና ቦሃንዳኔ፥ ቶኦኪ ኔኤኮ ዒዛ ባይዛንዳኔ፤
ኔኤኒ ዒጊጨ ጊንሢም ጳሽካኣና
ዬራሳላሜይዳ ዓኣ ዉዲሮ ናኣታ ኔና ሚኢጫንዳኔ።

22 ሂንዳ ማሌ፤
ኔኤኒ ጫሽኬሢ ሃሃ ኔኤኒ ቦሃሢ ያናዳይ?
ኔኤኒ ዑኡዞ ኔኤኮ ጴጊዴሢ
ዖቶሮሞ ዓኣፒና ኔኤኒ ዛጌሢ ያናዳይ?
ኔኤኒ ዬያይዴሢ ጌኤዮ፥ ዒሲራዔኤሌ ያኦሲዳኬ።

23 ኔኤኮ ኪኢቶ ዓሶ ዛሎና
ጋፑዋ ጫሺ ናንጊና ናንጋ ጎዳ ኔ ጫሽኬኔ፤
ኔኤኒ ጫሽካዖ ሂዚ ጌዔኔ፡-
ታኣኮ ሳርጌሎ ያይቶንታ ጴኤፖ ዲኮ
ለባኖኦሴኮዋ ቶኦኮ ታኣኒ ኬሰኬኔ፤
ያዶዞ ያዶዞ ለባኖኦሴ ሚዖ
ሚዛጳ ዚቢቆዋ ታኣኒ ቲቁኔ፤
ዬኖ ቤዞኮ ጋፖ ሄላንዳኣና
ጊንሃ ሃሃ ሚዛጳ ካዮዋ ዴንዲ ታ ሄሌኔ።

24 ዓሲ ዓጨዳ ዔቲ ቦኦኪ ዋኣሢ ታ ዑሽኬኔ፤
ታኣኒ ሄርቁ ኮጲዞና ጊብፄ ዎሮ ታ ሚጨሴኔ፤
ጌዒ ኔ ዖቶርቁኔ።

25 ሴናክሬሜ! ኮሺ ማሌ፤
ሚና ታኣኒ ማዖንጎ ጌዔ ጎይዖ
ቤርታኣ ዎዶና ታ ማሌ ጎይዖ
ሃሢ ማዲንቲ ኩሜ ጎይዖ

ዙሎ ደዲሺ ዲርቆና ካታሞ ሻሂ
ሻሂንቴ ባአዚ ኩሎናያ ኔኤኒ ማሃንዳጉዲ
ዬያ ማዴሂ ታናታሂ ኔ ዋይዚባአዓዳ?

26 ዬያ ዓጮይዳ ናንጋ ዓሶኮ ዋልቃ ላቢ

ዋዛ ባአያ ማዒ ቦርሲንታንዳጉዲ
ዬይ ዓሳ ዓባ ኬሰካ ዛላፓ ሙካ ዠባርና

ሄርቁንቴ ሃአኮ ማዓንዳጉዲ
ሃሃ ገንሣ ዑጎ ዒዲ ቢኢጫዴ ባቃሊ ማዓንዳጉዲ
ማአሪኮ ቶአካ ባቃሌ ማአቲ ዔያታ ማዔኔ።

27 ታአኒ ጋዓንቴ ኔ ዔቃሂንታ ዴዓሂንታ

ኔኤኒ ኬሰካሂንታ ጌላሂንታ
ኔ ታና ዒዲ ማዳ ባኮዋ ታ ዔሬኔ።

28 ኔኤኒ ታና ዒዲ ማዳ ባኮና
ኔኤኒ የቶርቃ የቶርማ ታ ዋያ ጌሌኔ፤
ሲኢዳ ታ ኔኤኮ ዓንገሊ ዳኪ

ዳንጋአ ታ ኔኤኮ ቢፃላ ኩልሲ
ኔ ሙኬ ካርና ማሂ ታ ኔና ዳካንዳኔ።»

29 ዬካፓ ካአቲ፥ ሂዚቁያሴም ዒሲያሴ ሂዚ ጌዔኔ፡- «ዬይ ቢያ ማዳንቴ ኩማንዳሂኮ ማላታ ያዲ ማዓንዳኔ፤ ሃሃአ ሌዖና ገንፃአሲና ጫአሌ ማዒ ባቃሌ ሃአኮ ዒንሂ ሙዓንዳኔ፤ ሃይሃሳ ሌዖና ጋዓንቴ ዜርቁ ዒንሂ ጎዛፓ ሃአኮ ካፂሲ ዔካንዳኔ፤ ሃሃ ገንሣ ሙዋ ማሂ ዓአፒ ቱኪ ዓአፖ ዒንሂ ሙዓንዳኔ፤

30 ዪሁዳ ዜርፃፓ ሃይቁዋዖ ዓቲ ዜርፃ ቢያ ሳአ ዴሚ ፃጺ ዳኪ ዑገ ዓአፒ ዓአፓ ማሂ ማዓንዳኔ፤

31 ዬሩሳሌሜይዳ፤ ሃሃ ፂዮኔ ዳካፓ ሃይቁዋዖ ቶሊ ዓቲ ዜርፃ ሹምፔና ዓአያ ማዒ ናንጋንዳኔ፤ ቢያ ባኮ ዋይሃ ናንገና ናንጋ ጎዳ ማዔ ያኦዛሂ ዬያይዲ ማዳ ኩንሠዋዖ ገንሂም ጋዓዓኩ።»

32 ናንገና ናንጋ ጎዳ ዓሶኦሬ ካአቲ ዛሎ ሂዚ ጌዔኔ፡- «ሴናከሬሜ ሃኖ ካታሞ ፔቲታዖ ጌላዓኬ፤ ፔቲ ሂኢሺታዖ ሃኖ ካታማ ዒ ዳካዓኬ፤ ጌቲማ ዔኪ ሙካ ፖኦሊሴያ ዒዛ ባንሂ ዑካዓኬ፤ ዓጪ ኩሊ ዋርዲንታ ዋርዲያና ዒዛ ማንገንታዓኬ።

33 ዒዚ ሃኖ ካታሜሎ ጌሉዋዖ ሙኬ ጎይዖማና ማዒ ዴንዳንዳኔ፤ ሃያ ጋዓሂ ታና፥ ናንገና ናንጋ ጎዳኬ፤

34 ታአኒ ታ ቦንቾር ጌዒ፤ ሃሃ ታአም ማዳ፥ ዳውቲም ታ ዒንጌ ሃገ ማዓንዳ ዋዛ ቃአሎር ጌዒ ሃኖ ካታሜሎ ታአኒ ታአር ዖልቲ ዓውሳንዳኔ።»

35 ዬሮ ዋንቶ ናንገና ናንጋ ጎዳኮ ከኢታንቻ ባሶኦሬ ዓሳ የሎሮ ዲንኪ ዴዔ ቤዘይዳና ዓኣዳዎ ፔቲ ጃኤታና ሳሊታሚ ዶንጎ ሺያ ፖኦሊሴ ዎዴኔ፤ ዚሮ ጉቲ ዓሳ ገንዓፓ ጳጫንጉቲ ቢያሢ ሃይቂ ዓኣኔ።

36 ዬካፓ ባሶኦሬ ካኣቲ፣ ሴናክሬሜ ፔ የሎ ባሶና ዎላ ገንሢሞ ኔኔዌ ካታሞ ዴንዴኔ።

37 ፔቲ ኬሊ ዒዚ ኒሰሮኬ ጌይንታ የኦዞ ካኣሽኮ ማኦሪዳ ዬያ የኦዞሢ ዚገ ካኣሽካንጉቲ ዓዲራሜሌኬና ሳራሳሬ ጌይንታ ዒዞኮ ናይሰኩንሢ ጩንቻ ዓፓሮና ጫርገ ዒዞ ዎዴኔ፤ ዬንሢ ናኣታ ዒማና ዓራራቲ ጌይንታ ዲኮ ባጮ ፑኒ ዴንዴኔ፤ ዬያሮ ሴናክሬሜ ቤዘይዳ ዒዞኮ ናኣቶ ባኣካፓ ዓሰራዶ ጌይንታሰኬይ ካኣታዴኔ።

20

ካኣቲ ሂዚቂያሴ ሃርጌፓ ዳቄሢ (ዒ.ሲ. 38:1-8፤21-22፤ 2፻ኦ.ሲ. ዓሃኬ 32:24-26)

1 ዒማና ካኣቲ፣ ሂዚቂያሴ ዶዲ ሃርጌና ሃርጌንጉቲ ሃይቃኒ ዑኪ ዓኣንጉቲ ዓሞፄ ናኣዚ፣ የኦሲ ማሊያ ኬኤዛ፣ ዒሲያሴ ዒዞ የኦጫኒ ሙካዎ «ናንገና ናንጋ ጎዳ፡- «ኔኤኒ ሃያ ሃርጋፓ ፖዓዓኬ፤ ኔ ሃይቢ ዓቲንዶዎኣሢሮ ዔልቃሚ ኔኤኮ ማኦሮ ገኢገሺ» ጋዓ።» ጌይ ኬኤዜኔ።

2 ዬያሮ ሂዚቂያሴ ሴካ ኮጮ ባንሢ ሺሪ ሂዚ ጌዒ ናንገና ናንጋ ጎዳ ሺኢቄኔ፡-

3 «ናንገና ናንጋ ጎዳሢየ! ታኣኒ ኔኤሞ ጉሙርቂንጉቲ፣ ሃሣ ፒዜ ማዒ ማዴኔ፤ ገንሣ ሃሣ ኔኤኒ ዎዞዳ ባኣዚ ማዳኒ ቢያ ኬሊ ታ ጳሽኬሢ ኔ ማላንዳጉዲ ኔና ታ ሺኢቃኔ!» ጋዓዎ፣ ዒናፓ ጎጋይቂ ዬኤኬኔ።

4 ዬካፓ ዒሲያሴ ካኣቲ ኮይላፓ ኬሰኪ ካኣቲሞ ማኦሮኮ ሳዛ ዓኣ፣ ዓሳ ቡካ ቤዞና ዓኣዲዎንጉቲ ናንገና ናንጋ ጎዳ ዒሲያሴሞ፡-

5 «ታኣኮ ዳሮ ዓኪ ዓኣዳ፣ ካኣቲ፣ ሂዚቂያሴ ኮይላ ማዒ ዴንዲጋፓ ሂዚ ጌዔ፤ ታኣኒ ናንገና ናንጋ ጎዳ ማዔ ኔኤኮ ዓዶ ዳውቲ የኦዞሢ ሺኢጲያ ኔኤሲ ዎይዜኔ፤ ታ ኔኤኮ ባቢያዎ ዛጌኔ፤ ታ ኔና ፖዒሳንዳኔ፤ ሃይሣ ኬሊኮ ገንፃፓ ጌኤኩ ማኦሮ ዴንዲ ኔታና ካኣሽካንዳኔ፤

6 ታ ኔኤኮ ሌዎይዳ ታጳ ዶንጎ ሌዔ ቃሳንዳኔ፤ ኔናንታ ሃሮ ዬሩሳላሜ ካታሚሎንታ ባሶኦሬ ካኣቲ ኩጫፓ ታ ዓይሳንዳኔ፤ ታ ቦንቸሮ ጌዒ፤ ሃሣ ገንሣ ታኣሞ ማዳ፣ ዳውቲሞ ታ ዒንጌ ሃገ

ማዓንዳ ዎዞ ቃእሎር ጌዒ ካታሜሎ ዛሎ ታኣኒ ታኣር ያልተ ካፓንዳኔ» ጌዒኔ።

7 ዩካፓ ዒሲያሴ ካኣቲሞ ማዶ ማዶ ዓሶ፡- «ቤሌሴ ሚያ ዓኣፖ ላጩሲ ገእጊሸናያ ዔኪ ታኣሞ ዩዑዋቲ» ጋዓዛ፡ ዔያታ ዔኪ ዩዓዖ ሂዚቂያሴኮ ዲንጫ ኬሰኬ ቤዘይዳ ጌሣዛ ኪፃ ፓፃኔ።

8 ዒማና ካኣቲ ሂዚቂያሴ ዒሲያሴ ኮይላ፡- «ናገገና ናገጋ ጎዳ ታና ፖዒ ሳንዳሢና ሃይሣ ኬሊኮ ገንፃፓ ጌኤኸ ማኣሪ ታ ዴንዳንዳሢ ዓይጎና ታ ዔራንዳይ?» ጌይ ያኣጩኔ።

9 ዒሲያሴ ማሃዖ፡- «ናገገና ናገጋ ጎዳ ኔኤሞ ዒንጌ ሃገ ማዓንዳ ዎዞ ቃእሎ ኩንሣንዳሢኮ ዒ ፔኤር ማላታ ዳዋንዳኔ፤ ኔኤኒ ሃሢ ኮዒሢ፡- ሃይ ዓሶ ጌሎ ሸባ ሃርቂ ገዖ ሳኖኮ ታጾ ታኣኪሢ ቤርቲሞ ዴንዳንዳጉዲሞ? ታጾ ታኣኪሢ ገንሢሞ ማዓንዳጉዲዳይ?» ጌዒኔ።

10 ሂዚቂያሴ ዒማና፡- «ሃርቂ ገዖ ሳኖኮ ታጾ ታኣኪሢ ቤርቲሞ ሸባ ዴንዳቲ ሹሌዒኔ፤ ዩያር ታጾ ታኣኪሢ ገንሢሞ ዔኪ ሙኡሴ» ጌዒኔ።

11 ዩያር ዒሲያሴ ናገገና ናገጋ ጎዳ ሸኢቁሞ ካኣቲ፡ ዓካኣዜ ማዠሴ ሃርቂ ገዖ ሳኖይዳ ዓኣ ሸቦ ታጾ ታኣኪሢ ናገገና ናገጋ ጎዳ ገንሢሞ ማሃኔ።

ባብሎኔፓ ሙኬ ኪኢቶ ዓሶ
(ዒሲ. 39:1-8)

12 ዩኖ ዎዶና ባብሎኔ ካኣቲ፡ ባላዳኔኮ ናኣዚ፡ ሜርዳክባላዳኔ ጎዖሢ ካኣቲ ሂዚቂያሴ ሃርገ ዓኣሢ ዋይዜኔ፤ ዩያር ሜርዳክባላዳኔ ዒዛሞ ዒንጎ ባኣዚና ኪኢታ ዋርቃታና ዎላ ዳኬኔ፤

13 ሂዚቂያሴ ዒማና ኪኢቶ ዓሶንሢ ዎዛና ሸኣቲንሢ ዔኬኔ፤ ዩካፓ ዒዛኮ ካኣቲሞ ማኣርይዳ ሚሆ ጌሣ ኬኤፃ ዓኣ ባኮ ቢያ፤ ጌይፃ፡- ሹጮ ቢርንታ ዎርቆንታ ዲማ ዲማ ሳውቃ ፊኤሸንታ ዛይቶንታ ያሎ ዓንጋሞዎ ቢያ ዳዌኔ፤ ካኣቲሞ ማኣርይዳ ሚሆ ጌሣ ኬኤፃ ዓኣ ባኮንታ ዒ ካኣታዲ ዎይሣ ዓጮይዳ ዓኣ ባኮ ቢያ ፔቲታዖ ዓይሱዎዖ ዳዌኔ።

14 ያኦሲ ማሊያ ኬኤዛ፡ ዒሲያሴ ካኣቲ ሂዚቂያሴ ኮይላ ሙካዖ፡- «ሃና ዓሳ ዎካፓ ሙኬይ? ኔኤሞ ዔያታ ዓይጎ ኬኤዜይ?» ጌዒ ያኣጩኔ።

ሂዚቂያሴ፡- «ዔያታ ሙኬሢ ባብሎኔ ጌይንታ ሃኬ ዓጩፓኬ» ጌዒኔ።

15 ዒሲያሴ ሂዚቂያሴ ኮይላ፡- «ዔያታ ካኣቲሞ ማኣራ ዓይጎ ዛጌይ?» ጌዒ ያኣጩኔ።

ሂዘቁያሴ ዒዛም፡- «ቢያ ባኮ ዛጌኔ፤ ማሆ ጌሦ ከኤይይዳ ዓኣ ባኮይዳፓ ታ ዔያቶም ዳዋባኣ ባኣዚ ፔቴታፖ ባኣሴ» ጌዔኔ።

16 ዬያሮ ዒሲያሴ ካኣቲም፡- «ቢያ ባኮ ዳንዳዓ ጎዳሢ ሂዚ ጋዓኔ፤

17 ኔ ዓደንሢ ሃይማ ሃሊሲ ኔኤኮ ካኣቲም ማኣሮይዳ ቡኩሲ ጌሢ ባኣ ቢያ ጋፒ ባብሎኔ ዓጮ ዔውታንዳ ዎዴ ሙካንዳኔ፤ ፔቴታፖ ዓታዓኔ፤

18 ኔኤኮ ዜርፃፓ ፔቴ ፔቴ ዓሲ ባብሎኔ ዲዒንቲ ዔውቲ ካኣቶ ማኣሮይዳ ዓሽቲሚ ማዒ ማዶ ማዳንዳኔ።»

19 ሂዘቁያሴ ዒማና፡- «ኔኤኒ ከኤዜ፣ ናንጊና ናንጋ ጎዳኮ ቃኣላ ቃራኬ» ጌዔኔ፤ ዒዚ ዬያ ጌዔሢ ዒዛ ዎድና ሜታ ሃሊንዱዋኣሢ ዔሬሢሮኬ።

ካኣቲ ሂዘቁያሴኮ ካኣቲም ጋፒንፖ
(2ፆኦሲ. ዓሃኬ 32:32-33)

20 ሂዘቁያሴ ማዶ ማሌ ባኣ ቢያ፤ ዒዚ ጫርቂ ፖሊ ባሽ ባሽፆንታ ዋኣፆ ዎራፓ ዔኪ ሙኤሲ ዴይሦንዶ ቤሲ ዎማይዲ ኮሽሴቴያ፤ ዬያጉዲ ሃሃ ካታም ዔኪ ሙካኒ ጎፆኮ ዴማና ቦኦኪሲ ዒ ኮሽ ባኣ ቢያ ዪሁዳ ካኣቶ ሃይሳ ፃኣፒንታ ማፃኣፓ ፃኣፒንቲ ዓኣኔ።

21 ዬካፓ ሂዘቁያሴ ሃይቄኔ፤ ዒዛ ቤዛ ዒዛኮ ናኣዚ፣ ሚናኣሴ ካኣታዴኔ።

21

ዪሁዳ ካኣቲ ሚናኣሴ
(2ፆኦሲ. ዓሃኬ 33:1-20)

1 ሚናኣሴ ዪሁዳይዳ ካኣታዳኣና ሌዓ ዒዛኮ ታጳ ላምፆኬ፤ ዒዚ ዒማና ዬሩሳላሜይዳ ናንጊ ዶንጊታሚ ዶንጎ ሌዔ ዎይሢኔ፤ ዒዛኮ ዒንዳ ሄፒፂባ ጌይንታያኔ፤

2 ዒሰራዔኤሌ ዓሳ ፆኦሲ ዔያቶም «ዒንጋንዳኔ» ጌዔ ዓጩሎ ሙካኣና ናንጊና ናንጋ ጎዳ ዔያቶኮ ቤርታፓ ዳውሲ ባይዜ፣ ማሌ ዴራ ማዳ ቦርሲሳ ማዶ ሚናኣሴ ማዲ ጎማዲፆና ናንጊና ናንጋ ጎዳ ፆዪኔ።

3 ዒዛኮ ዓዴ፣ ሂዘቁያሴ ዶይሲ ባይዜ ማሌ ዴርኮ ካኣኦ ቤዛ ሚናኣሴ ጊንሃ ማኸሴኔ፤ ቤርታ ዒሰራዔኤሌኮ ካኣቲ፣ ዓክዓቤ

20:16 2ካኦቶ. ማ 24:13፤ 2ፆኦሲ. ዓሃኬ 36:10። **20:18** 2ካኦቶ. ማ 14:14-15፤ ዳኣኔ. 1:1-7። **21:2** ዔር. 15:4።

ማዳ ጎይዖ ባዳኣሌ ጌይንታ ሜሌ ያኦዞም ዒንጎ ባኣዚ ዒንጎ ቤሲ፤ ሃሃ ጊንሣ ዓሼራ ጌይንታ ላኣሎ ያኦዞሎኮ ማላሢያ ማዢ፤ ጫሪንጫ ዓኣ ዠኦጋሢያ ዘጊ ካኣሽኬኔ።

4 ናንጊና ናንጋ ጎዳ ፔና ካኣሽካንዳጉዲ ዓይሢ ቤዘይዳ ጌይዖ፡- ጌኤዠ ማኣሮይዳ ሜሌ ዓሳ ፔ ያኦዞም ዒንጎ ባኮ ዒንጋ ቤዞ ማዢሲ ዔቁሴኔ።

5 ጌኤዠ ማኣሮኮ ዓሳ ቡካ ላምዖ ቤዘይዳ ጫሪንጫ ዠኦጋ ካኣሽከንታንዳ ቤሲ ዒዚ ጊኢጊሼኔ፤

6 ሃሃ ዒዚ ፔኤኮ ናዖ ሚቸ፣ ዒንጎ ዒንጊሢ ማሂ ሹኪ ሺኢሹኔ፤ ዒዚ ፔኤሮ ዠኦቃያ፤ ሃሃ ማርሻ ማርሻያ ማዒ ዒዛጉዲ ዠኦቃ ዓሶንታ ሃይቁ ዓሶኮ ዔኤዠ ዔኤላ ዓሶ ኮይላ ዴንዲ ዔኤቢ ያኦጫ ዠኦቃያ፤ ዬያ ባኮ ቢያ ማዲያና ጎሜ ማዲ ናንጊና ናንጋ ጎዳኮ ዳጎ ዒ ዔቁሴኔ።

7 ዒዚ ጌኤዠ ማኣሮይዳ ዓሼራ ማሊሲ ኮሾና ባኮ ጌልዚ ጌሢኔ፤ ዬይ ጌኤዠ ማኣራ ዳውቴና ዳውቴኮ ናኣዚናም ናንጊና ናንጋ ጎዳ፡- «ሃይ ዬሩሳላሜይዳ ዓኣ ጌኤዠ ማኣራ ታኣኒ ናንጊና ዒኣካ ካኣሽከንታያ ማዓንዳጉዲ ታጰ ላምዖ ዒሰራዔኤሌ ዓጰ ዓጮፓ ቢያ ታ ደኦሪ ቤሲኮ፤

8 ዒሰራዔኤሌ ዴራ ታኣኮ ዓይሢያ ካፔቴ፤ ሃሃ ታ ዓይላሢ ሙሴም ታኣኒ ዒንጌ ዎጎ ማዲ ዔያታ ኩንሣቴ ዔያቶኮ ቤርታኣ ዓድንሢም ታኣኒ ዒንጌ፤ ሃሮ ዓጮሎፓ ዳኪ ታ ዔያቶ ባይዛዓኬ» ጌዒ ቤርታዲ ኬኤዜያኬ፤

9 ዪሁዳ ዓሳ ጋዓንቴ ናንጊና ናንጋ ጎዳ ቃኣሎም ዓይሢንታያ ማዒባኣሴ፤ ዔያታ ዎዎይቴይ ጌዔቴ፡- ዒሰራዔኤሌ ዓሳ ቤርቲም ሙካኣና ናንጊና ናንጋ ጎዳ ዔያቶኮ ቤርታፓ ዳውሲ ባይዜ፤ ዴራ ማዳ ጎም ማዳይዳፓ ዑሣ ዓኣዳ ጎሜይዳ ሚናኣሴ ዔያቶ ዔኪ ጌልዜኔ።

10 ዬያሮ ናንጊና ናንጋ ጎዳ ፔ ዓይሎ፤ ዒዛ ማሊዖ ኬኤዛ ዓሶ ዛሎና ሂዚ ጌዒ ኬኤዜኔ፡-

11 «ዪሁዳ ካኣቲ፤ ሚናኣሴ ሃያጉዴ ቦርሲሳ ማዳ ቢያ ማዳኔ፤ ዬይ ባካ ቤርታ ካኣናኔ ዓሳ ማዳሢፓ ዑሣ ዓኣዳ ፑርታኬ፤ ዒዚ ያኦዞ ማሂ ኮሼ ባኮ ዛሎና ዪሁዳ ዴሮ ዔኪ ጎሜይዳ ጌልዜኔ፤

12 ዬያሮ ናንጊና ናንጋ ጎዳ ማዔ ዒሰራዔኤሌ ያኦዞሢ ሂዚ ጋዓኔ፡- ሸይዛ ዓሲም ዎይዚ ዓርቁሳንዳ ዴኤሢ ሜቶ ታኣኒ ዬሩሳላሜና ዪሁዳናይዳ ሄሊሳንዳኔ፤

13 ሳማሪያንታ ዲሰራዔኤሌ ካኣቲ፣ ዓክዓቤ ዜርቆ ታ ማዳ ጎይቶ
ዩሩሳሌም ታ ዲማይዳንዳኔ፤ ጋባዳ ጌኤሺ ማሰከንቴሰካፓ ጉኡፒ
ጌሢንታሢጉዲ ዩሩሳሌም ታኣኒ ጎማፓ ጌኤሺ ጌኢሊሻንዳኔ።

14 ባይሰንታፓ ባቲ፣ ታ ዴሮ ዔያቶኮ ሞርኮም ታኣኒ ዓኣሢ
ዒንጋንዳኔ፤ ዔያታ ዲዒንታንዳኔ፤ ዔያቶኮ ዓኣ ባካኣ ቡሪንታንዳኔ።

15 ዔያቶይዳ ዩያ ታ ማዳሢ ዓይጎሮዳይ ጌዔቴ፡- ዔያቶኮ ቤርታኣ
ዓደንሢ ታኣኒ ጌብፃፓ ኬሴሰካፓ ዓርቆፖ ሃይማ ሄላንዳኣና ጎማ
ማዲያና ታና ዔያታ ምዲሳ፣ ዳጎሞ ታኣኮ ዔቂሴሢሮኬ።። »

16 ሚናኣሴ ማዳ ባካ ዩሁዳ ዴሮ ሜሌ ምእዞ ካኣሽኪሲያናናንጊና
ናንጋ ጎዳ ምዲሳ ጎሞ ባንሢ ዔኪ ጌልዚያ ሌሊቱሞንቴ ጌኤሺ ማዔ
ሚርጌ ዓሲ ምዲሺ ዩሩሳሌም ካታሞኮ ሳዞ ጎይቶ ሱጉሢ ሌሊ
ማሄኔ።

17 ሚናኣሴ ማዳ ሜሌ ባኮንታ ዒዚ ማዳ ጎማ ቢያ ዩሁዳ ካኣቶ
ሃይሳ ምእፒንታ ማፃእፖይዳ ምእፒንቲ ዓኣኔ፤

18 ዩካፓ ሚናኣሴ ሃይቁ፣ ዒዛኮ ካኣቱሞ ማኣሮኮ ዲሮ ጋራ «ዑዛ
ጎምሢኮ ዲማ ዲማ ባኮ ቱኮ ጎዡ» ጌይንታ ቤሲዳ ዱኡቴኔ፤ ዒዛ
ቤዘይዳ ዒዛኮ ናኣዚ፣ ዓሞኣኔ ካኣታዳኔ።

**ዩሁዳ ካኣቲ ዓሞኣኔ
(2ፆኦሲ. ዓሃኬ 33:21-25)**

19 ዓሞኣኔ ዩሁዳይዳ ካኣታዳኣና ሌዓ ዒዛኮ ላማታሚ ላምፆኬ፤
ዒዚ ዩሩሳሌምይዳ ናንጊ ላምፆ ሌዔ ምይሣኔ፤ ዒዛኮ ዒንዳ
ሚሹሌሜቶ ጌይንታያ ሃሩፄ ናይኬ፤ ዒዛ ሸይንቴሢ ያዒቤ
ካታማኬ።

20 ዓሞኣኔያ ሃሢ ዒዛኮ ዓዴ፣ ሚናኣሴ ማዳ ጎሞጉዴያ ናንጊና
ናንጋ ጎዳ ቤርታ ፑርታ ማዳ ማዳኔ።

21 ዒዚ ዒዛኮ ዓዴ ማዳ ፑርቶ ማዳ ቢያ ማዳያ ማዔኔ፤ ዒዛኮ
ዓዴ ዚጊ ካኣሽካ፣ ሜሌ ምእዞ ዒ ካኣሽኬኔ፤

22 ናንጊና ናንጋ ጎዳ ማዔ ዒዛኮ ቤርታኣ ዓደንሢ ምእዞሢ ዒ
ሃሹኔ፤ ናንጊና ናንጋ ጎዳ ዓይሢ ጎይሢያናኣ ዓኣዳኒ ኮዒባኣሴ።

23 ዒዛኮ ደንዞ ማዔ፣ ቢታንታ ዓኣ ዓሳ ጌኔ ማላሢና ዒዛይዳ
ዔቂ ካኣቱሞ ማኣሮይዳ ዒዛ ምዳኔ፤

24 ዒማና ዩሁዳ ዴራ ዓሞኣኔ ምዳ ዓሶ ምዲ ባይዘፆ ዒዛኮ
ናኣዚ፣ ዒዮሲያሴ ካኣታሢኔ።

25 ዓሞኣኔ ማዳ ሜሌ ባካ ቢያ ዩሁዳ ካኣቶ ሃይሳ ምእፒንታ
ማፃእፓ ምእፒንቲ ዓኣኔ።

26 ዓሞኣኔ «ዑዛኮ ዲማ ዲማ ባኮ ቱኮ ጎዡ» ጌይንታ ዱኡፖ
ቤዛ ዱኡቴኔ፤ ዒዛ ቤዛ ዒዛኮ ናኣዚ፣ ዒዮሲያሴ ካኣታዳኔ።

22

ጴሁዳ ካኣቲ ዒዮሲያሴ
(2ፆኦሲ. ዓሃኬ 34:1-2)

1 ዒዮሲያሴ ሃጊ ሳሊ ለዔ ናይ ዓኣዖ ጴሁዳይዳ ካኣታዳኔ፤ ዒዚ ዩሩሳላሚይዳ ናገጊ ሃይሢታሚ ፔቲ ለዔ ዎይሢኔ፤ ዒዛኮ ዒንዳ ዩዲዳ ጌይንታያ ቦፅቃቲ ካታማ ሾይንቴሰኬያ፡ ዓዳያ ጎይሢ ናይኬ፤

2 ዒዮሲያሴ ዒዛኮ ቤርታኣ ዓዳሢ፡ ዳውቲኮ ኮዦ ማዶ ጎይዖ ማዳ፤ ሃሃ ዖኦሲኮ ዎጎም ጉቤ ዓይሢንታያ ማዒ ናገጊና ናገጋ ጎዳ ዎዛሳ ማዶ ማዳ።።

ፆኦሲኮ ዎጎ ማፃአፓ ጴዳሢ
(2ፆኦሲ. ዓሃኬ 34:8-28)

3 ዒዮሲያሴ ካኣታዳዖ ታጶ ሳላሳ ሌዖና ሜሹላሜኮ ናኣዚ ናይ፡ ዓፃሊያ ናይ ማዒ ካኡቱሞ ማኣራ ፃኣፖ ባኮ ፃኣፓ፡ ሳፓኔ ዑፃ ጌኤዦ ማኣሪ ሂዚ ጋዓ ኪኢታ ዳኬ።-

4 «ሂልቂያ ጌይንታ፡ ቁኤሶ ቢያኮ ሱኡጋሢ ኮይላ ዴንዲጋፓ ጌኤዦ ማኣሪ ጌሎ ካሮ ኮራ ዎሊ ዓኣሢ ዓኣሢ ዴርይዳፓ ሚኢሾ ዔካንዳጉዲ ቢታንታ ዒንጊንቴ ቁኤሳ ሃይማ ሂላንዳኣና ዎማዲ ሚኢሾ ቡኩሴቲያ ዒዛፓ ዖኦጪ ዔሪ ዩዔ፤

5-6 ዩና ዓሳ ጌኤዦ ማኣሮ ጊንሣ ጊኢጊሻ ዓሶኮ ሱኡጎም ሚኢሾ ዒንጎንጎ፤ ዩያታ ሱኡጋ ዔኬ ሚኢሾ ጌኤዦ ማኣሮኮ ዶዔ ቤዛ ጊኢጊሻ ዓሶም፡ ሚያ ዓርሲ ጊኢጊሻ ዓሶም፡ ሹጮና ኬልቂ ማዦ ዓሶንታ ሹጮ ዓርሳ ዓሶንታም ጨጎንጎ፤ ሃሃ ጊንሣ ጌኤዦ ማኣሮ ማዦንዶ ላሻሢ ሚያንታ ዓርሲንቴ ሹጮንታ ዔያታ ሻንቆንጎ፤

7 ዩኖ ማዶ ማዳ፡ ሱኡጋ ጉቤ ዒናፓ ጉሙርቂንታ ዓሲታሢሮ ሚኢሾ ዛሎ ዔያቶ ጎኦጮንዶያቱዎሴ።።»

8 ዩካፓ ዩይ፡ ካኣቶ ማኣራ ፃኣፖ ባኮ ፃኣፓሢ፡ ሳፓኔ ሂልቂያም ካኣቲ ዒዛ ዓይሢ ዳኬ ኪኢቶ ኬኤዜኔ፤ ሂልቂያ ዒማና፡- «ፆኦሲኮ ዎጎ ማፃአፖ ጌኤዦ ማኣሮ ጋራፓ ታ ዴንቂ ዔኬኔ፡ ሃኣዛጌ» ጌዒ ሳፓኔም ዒንጋዛ ሳፓኔ ዔካዖ ናባቤኔ፤

9 ሳፓኔ ናባቤሰካፓ ካኣቲ ኮይላ ማዒ ዴንዳዖ፡- «ኔኤኮ ዓይላ ጌኤዦ ማኣሮይዳ ዓኣ ሚኢሾ ዔኪ ጌኤዦ ማኣሮ ጊኢጊሻ ማዦ ዓሶኮ ሱኡጎም ዒንጌኔ» ጌይ ኬኤዜኔ፤

10 ዩካፓ ሃሃ ዒ ኬኤዛዖ፡- «ቁኤሳሢ ሂልቂያ ማፃአፔ ዴንቂ ዔኪ ታኣም ዒንጌኔ፡ ሃኣዛጌ» ጋዓዖ ካኣቲም ዩያ ማፃአፖ ናባቤኔ።

22:1 ዔ.ር. 3:6። 22:7 2ካእቶ. ማ 12:15።

11 ዬይ፣ የኦሲኮ ዎኅ ማፃአፓ ናባቢንታኣና ካአቲ ዋይዛየ ያዪ ፔኤኮ ማኣዓሢ ዳርዜኔ፤

12 ዒማና ሃሣ ዒ ኔጉዋየ ቁኤሳሢ ኪልቁያም፣ ሳፓኔ ናኣዚ ዓሂቃም፣ ሚካያ ናኣዚ ዓክቦሬም፣ ካአቱም ማኣሮይዳ ፃአፖ ባኮ ፃአፓ ሳፓኔንታ ካአቲኮ ደንዞ ማዒ ማዳ ዓሳያንታም ሂዚ ጋዓ ኪኢታ ደኬኔ፡-

13 «ሃሢ ዴንዲጋፓ ታናንታ ዪሁዳይዳ ናንጋ ዴሮንታም ጴዳ ሃያ ማፃአፖይዳ ዓኣ ባካ ዓይኅ ባኣዚታቲያ ኬኤዛንዳጉዲ ናንገና ናንጋ ጎዳ የኦጩዋቲ፤ ኦኤኮ ቤርታኣ ዓደንሢ ሃያ ማፃአፖይዳ ፃአፒንቲ ዳምቦ ካፒ ማዳባኣሢሮ ናንገና ናንጋ ጎዳ ኑ ዑ-ፀ ማርጌና ዳጋዴኔ።»

14 ዬያሮ ሂልቁያ፣ ዓሂቃሜ፣ ዓክቦሬ፣ ሳፓኔንታ ዓሳያንታ ዩፋሳላሜይዳ ዓኣ ዓኪ ማዢንቲ ጉርዳሰከኖይዳ ናንጋ ሁልዳ ጌይንታ የኦሲ ማሊሢ ኬኤዛሰከኖ ኮራ የኦጩኒ ዴንዴኔ፤ ዒማና ሃርሃሴ ናኣዚ ናይ ማዒሢ፣ ቲቁዋ ናኣዚ፣ ዒዘኮ ዓኒ ሻሉሜ ጌኤዢ ማኣሮይዳ ማይንቶ ማኣዓሢ ቢታንቶና ዓርቃያኬ፤ ዔያታ ዬያ ባኮ ቢያ ዬኖ የኦሲ ማሊያ ኬኤዛዞም ሃይሳዴኔ።

15 ዒዛዒ ዔያቶም ሂዚ ጌዔኔ፤ ናንገና ናንጋ ጎዳ ማዒ ዒሰራዔኤሌ የኣዛሢ ሂዚ ጋዓኔ፤ ታ ኮይላ ዒንሢ ዳኬ ዓሢም ሂዚ ጌዒ ኬኤዘዋቲ፡-

16 «ናንገና ናንጋ ጎዳ ሂዚ ጋዓኔ፤ ዪሁዳ ካአቲ ናባቤ ማፃአፖ ጋራ ፃአፒንቲ ጎይያ ሃኖ ዓጮይዳ፤ ሃሣ ጊንሣ ዴር ዑ-ፀይዳ ፑርታ ባኣዚ ታ ዔኪ ዬዓንዳኔ።

17 ዔያታ ታና ሃሺ ሜሌ የኣዞም ዒንኅ ባኣዚ ሺኢሺኔ፤ ዔያታ የኣዞ ማሂ ፔ ኩቻ ማዢ ባኮ ቢያሢና ታና ዳጋሴኔ፤ ታኣኮ ዬይ ዳጋ ማዓዓኬ፤

18 ናንገና ናንጋ ጎዳ ኮይላ የኦጩዋቲ፣ ጌዒ ዒንሢ ዳኬ፣ ዪሁዳ ካአቲም ሂዚ ጎዑዋቲ፤ ታኣኒ፣ ናንገና ናንጋ ጎዳ ማዒ ዒሰራዔኤሌ የኣዛሢ ሂዚ ጋዓኔ፤ ኔኤኒ ዬያ ማፃአፖይዳ ጌይንቲ ባኮ ዋይዚ፤

19 ሃኖ ዓጮንታ ዴሮንታ ጋዳንቁንቲያ ታ ማሃንዳሢ፤ ሃሣ ጊንሣ ቤሲ ታ ዔያቶኮ ባይዛንዳኔ ጌዒ ኬኤዜ ቃኣሎ ኔኤኒ ዋይዛየ ዒኔ ዲጲ ኔና ኔ ሂርኪዴኔ፤ ማኣዓሢያ ኔኤኮ ኔ ዳርዚ፣ ታ ቤርታ ዬኤኪ ኔ ሺኢቁ ሺኢጲያ ታ ዋይዜኔ።

20 ዬያሮ ዩፋሳላሜይዳ ታ ዔኪ ዬዓንዳ ፑርቶ ባኮ ኔኤኒ ኔ ዓኣፒና ዛጉዋየ ሃይቃንዳያ ሄላንዳኣና ዬይ ባካ ማዲንታዓኬ፤ ኔኤኒ ዔባ ቢያ ኮሺ ዓኣንቲ ሃይቁ ዲኡታንዳኔ።»

ኪኢቶ ዓሶንሢ ዬያ ሃይሶ ዔኪ ካአቲ፣ ዒዮሲያሴ ኮራ ማዒ ዴንዴኔ።

23

ዒዮሲያሴ ሜሌ ጾኦዞ ካአሽኮ ካአዡ ባይዜሢ (2ጾኦሲ. ዓሃኬ 34:3-7፤29-33)

1 ካአቲ፥ ዒዮሲያሴ ዪሁዳና ዬሩሳላሜናፓ ዔርቱ ዓጮ ጨሞ ቢያ ዔኤሌኔ፤

2 ዬያፓ ሙኬ ዓሳ፡- ቄኤሶንፓ ጾኦሲ ማሊያ ኬኤዛ ዓሶንፓ ዳካፓ ዴንዲ ዴኤፒ ጌይንፓ ዓሶ ሃላንዳአናኬ፤ ዬያፓ ዓሳ ጌኤዡ ማአሪ ሙካዛ ካአቲ ባይቄያፓ? ጌኤዡ ማአርይዳ ዴዴ ማፃአፖ ጋራ ዓአ ባኮ ቢያ ዴርሞ ናባቤኔ፤

3 ካአቲ ዒማና ጌኤዡ ማአርኮ ቤርቶ ዛላ ዓአ ቱርቱር ኮራ ዔቄ ጉቤ ዒናፓ፤ ሃሃ ጊንሃ ጉቤ ማሊፃፓ ናንጊና ናንጋ ጎዳሞ ዓይሢንፓኒና ዓይሢጾንፓ ዳሞቦንፓ ዋጎንፓ ካፓኒ ጾኦሲ ቤርፓ ጫአቄሞ ጊንሃ ዓካሴኔ፤ ዬኖ ማፃአፖይዳ ፃአፒንቱ ጫአቄሞ ካፒ ኩንሃንዳሢ ጉቤ ዒናፓ ኬኤዜኔ፤ ዴራአ ዬያ ማዳኒ ዒዛና ዋላ ጫአቄኔ፡፡

4 ዬካፓ ዒዮሲያሴ ቄኤሶ ቢያሢኮ ሱኡጋሢ፤ ሃልቄያንፓ ዒዛ ማአዲ ማአዲ ማዳ ቄኤሶንፓ ጌኤዡ ማአሪ ጌሎ ካር ካፓ ቄኤሶንፓ ዔኤሌ ባዓአሌና ዓሼራ ጌይንፓ ላአሎ ጾኦዜሎና፤ ዬያፓዲ ሃሃ ዡኦጋሢ ካአሽኮ ባኮሞ ቢያ ጌኤዡ ማአራፓ ኬሳንዳጉዲ ዓይሢኔ፤ ካአቲ ዬያ ሜሆ ቢያ ዬሩሳላሜ ካፓሞኮ ዙላ ዓአ ቄድሮኦኔ ዶኦጮይዳ ታሚና ሚቶ ዲቢንጾ ቤኤቱኤሌ ዔኪ ዓአዳኔ፡፡

5 ዪሁዳ ካፓሞና ዬሩሳላሜኮ ኮይላ ዓአ ቤዘናይዳ ቢያ ጌሜራ ጌሜራ ሜሌ ጾኦዞሞ ዒንጎ ባኮ ዒንጎ ቤዘይዳ ማዳንዳጉዲ ቤርፓ ዪሁዳ ካአፓ ዶኦሪ ጌሢ፤ ቄኤሶ ቢያ ማዳፓ ኬሲ ዳኬኔ፤ ባዓአሌ ጌይንፓ ሜሌ ጾኦዞሞ፥ ዓቦሞ፥ ዓጊኖሞ፤ ዬያፓዲ ሃሃ ዓቦኮ ኮይላ ሽራ ዓጮንፓ ዡኦጋሢንፓሞ ዒንጎ ባኮ ዒንጊ ዒንጊ ማዳ ቄኤሶ ቢያ ኬሴኔ፡፡

6 ዓሼራ ጌይንፓ ላአሎ ጾኦዜሎ ማሊሲ ማዡና ባኮ ጌኤዡ ማአራፓ ቱጊ ዔኪ ካፓሞኮ ዙሎ ኬሳጾ ቄድሮኦኔ ዶኦጮ ዔኪ ዴንዲ ታሚና ሚቶኔ፤ ዬና ባኬላ ሲላሊ ማፃንዳያ ሃላንዳአና ጋአጪ፥ ሃይቄ ዴርኮ ዶኡጉይዳ ላአሌኔ፡፡

7 ዓቲንቆና ላሃ ዓቲንቃ ጌኤዡ ማአርይዳ ፔ ማዳ ማዳ ኬኤጾንፓ ላአላ ዓሼራ ጌይንፓ ጾኦዜሎሞ ጋርይዳ ዶማሲጾር ጎኦቦ ዓፒሎ ሱኪ ጊኢጊሻ ኬኤጾሞ ቢያ ዶይሴኔ፡፡

23:6 2ካአቶ. ማ 21:3፤ 2ጾኦሲ. ዓሃኬ 33:3።

8 ዲዚ ዲማና ዪሁዳ ካታሞና ዓጮ ጉቤናይዳ ጌይፃ፡-
ጌባዔይዳፓ ዓርቃፃ ቤርሳቤ ሄላንዳኣና ዓኣ ቁኤሶ ቢያ ዩሩሳላሚ
ዔኪ ሙኬኔ፤ ዔያታ ዒንጎ ባኮ ዒንጎ ቤዛ ጉቤ ዒኢቲያ ማዔሢ ቢያ
ዓሶሞ ዒ ኬኤዜኔ፤ ካታሚሎ ወይሢ፡ ዒያሱ ካታሞ ጌሎ ካሮ ኮይላ
ማዢሲሴ ካኣሸኮ ቤዛ ዒዮሲያሴ ሻሂ ዶይሴኔ።

9 ዩያታ፡ ቁኤሳ ጌኤዢ ማኣሮይዳ ማዲሞጉዲያ ዒዚ ላኣጌኔ፤
ያዲ ማዔቲያ ዔያቶኮ ላጎ ማዔ ቁኤሶሞ ዒንጎጎታ፡ ሙኑቆ ፃኣዛ
ጌሊባኣ ካሦ ዔያታ ሙዓንዳጉዲ ጌይንቴኔ።

10 ካኣቲ፡ ዒዮሲያሴ ሂሮሚ ዶኦጮይዳ «ቶፔቴ» ጌይንታ ሚሌ
ዓሳ ፔ ፆኦዞ ካኣሸካ ቤዛ ዒኢቲ ቤሲ ማዔሢ ዓሶሞ ኬኤዜኔ፤
ዩያሮ «ሞሎኬ» ጌይንታ ፆኦዞሞ ዓቲንቄ ናይያ ማፆሞ ዉዱሮ ናይ
ሚቹ ዒንጎ ዒንጎሢ ማሂ ዒንጎ ዓይጎ ዓሲያ ባኣያ ማዓንዳጉዲ
ላኣጎጎቴኔ፤

11 ቤርታ ዪሁዳ ካኣታ ዓቦ ካኣሸኪያሞ ማፆንጎ ጌዒ ዲማሲ
ጌሢ፡ ፓራሢ ቢያ ዒዮሲያሴ ዒኢካፓ ሺኢሺ ባይዜኔ፤ ዩያ ካኣዢሞ
ጌኢጊሻና ሳርጌሎ ፆይቶዋታሚና ሚቹኔ፤ ዩይ ባካ ቢያ ምንዴ ዴኤፖ
ሱኡጋሢ ጌይንታ ናኣታንሚሌኬ ጎፆሢ ናንጎ ኬኤፆኮ ኮይላ፤ ሃሣ
ጎንሣ ጌኤዢ ማኣሮኮ ቤርቶ ዛላ ዓሳ ቡካ ቤዛ ጌሎ ካራ ዓኣያኬ፤

12 ካኣቲ፡ ዓካኣዜ ማዢሴ ወይፆ ኬኤፆኮ ዑፆይዳ ዓኣ ካኣቲሞ
ማኣሮይዳ ዪሁዳ ካኣታ ማዢሴሴ ዒንጎ ባኮ ዒንጎ ቤዞንታ ጌኤዢ
ማኣሮኮ ዓሳ ቡካ ላሞፆ ቤዞይዳ ካኣቲ፡ ሚናኣሴ ማዢሴሴ ዒንጎ
ባኮ ዒንጎ ቤዞ ዒዮሲያሴ ሻሂ ዶይሴኔ፤ ዩያ ዒንጎ ቤዞ ኮሾና ባኮ
ጋኣጪ ሲላሊ ማሂ ዔኪ ዴንዲ ቁድሮኦኔ ዶኦጮ ላኣሌኔ።

13 ዩያጉዲ ሃሣ ዩሩሳላሚፓ ዓባ ኬሰካ ዛሎና ዒኢቲ ዲኮኮ
ድኣሎ ዛላ ዓሰታሮቴ ጌይንታ ሲዶና ዓሶ ፆኦዜሎ፡ ኬሞሽ ጌይንታ
ሞዓኣቤ ዓሶ ፆኦዞንታ ሞሎኬ ጌይንታ ዓሞኦኔ ዓሶ ፆኦዞሞ ካኣቲ
ሴሎሞኔ ማዢሴሴ ሻኣካያ ማዔ ማሊሲ ኮሾና ባካ ቢያ ዒኢቲ
ባኣዚ ማዔሢ ዓሶሞ ዒዚ ኬኤዜኔ።

14 ካኣቲ፡ ዒዮሲያሴ ዒማና ሹጮና ደኣቦና ደኣቦ ቢያ ሚንሣኔ፤
ዓሽራ ጌይንታ ፆኦዜሎ ማሊሲ ኮሾና ባኮዋ ቆዒ ቆዒ ኬኤሬኔ፤ ዩይ
ደቂንቲ ዓኣ ቤዞ ቢያ ዓሲ ሚጌሢ * ሌሊ ማሂኔ።

15 ዒሰራዔኤሌ ዓሶ ጎሞይዳ ዔኪ ጌልዜ፡ ናባፄ ናኣዚ፡
ዒዮርቢዓሚ ቤኤቴኤሌይዳ ማዢሴሴ ካኣዢ ቤዞ ዒዮሲያሴ ሻሂ

23:10 ለዊ. ዓከ 18:21፤ ዔር. 19:1-6፤ 32:35። 23:12 2ካአቶ. ማ 21:5፤
2ፆኦሲ. ዓሃኸ 33:5። 23:13 1ካአቶ. ማ 11:7። * 23:14 ዓሲ ሚጌሢ፡- ዩይ
ያዲ ማዲንቲሢ ዩሩ ቤዞይዳ ሚሌ ፆኦዞ ካኣሸኪንቲሞጉዲ ማሃኒኔ።

ባይዘኔ፤ ዲኢካፓ ዲንጎ ባኮ ዲንጎ ቤዘዋ ቱጊ፣ ደቆና ሹጮዋ ቢያ ዲይ ማንህ ጋእጪ ሲላሊ ማህኔ፤ ዓሹራ ማሊሲ ማዠና ባኮዋ ታሚና ሚቹኔ፤

16 ዩካፓ ዲዮሲያሴ ኮይሎ ሸሪ ዛጋንቴ ጌሜሮይዳ ዑያ ገኢጊሺ ኮሽና ዱኡፒ ዳዳኔ፤ ዲዚ ዩያ ዱኡፖ ጋራ ዓኣ ማጌያ ቢያ ዔኪ ዲንጎ ባኮ ዲንጎ ቤዘይዳ ታሚና ሚቹኔ፤ ዩያይዲ ዩይ፣ ዲንጎ ባኮ ዲንጎ ቤዛ ዲኢቲያ ማዔህ ዔርዘኔ፤ ዲዮሲያሴ ዩያ ቢያ ማዳህሮ ሚርጌ ዋዳኮ ቤርታ ፔቲ ካኣሺ ኬሊሰኬኖና ካኣቲ ዲዮርቢዓሜ ዲንጎ ባኮ ዲንጎህኒ ኮይላ ዔቁ ዓኣንቴ ያኦሲ ማሊያ ኬኤዛህ ጌዔ ሎንህ ዩያና ኩሜኔ፤ ካኣቲ፣ ዲዮሲያሴ ሃሃ ኮይሎ ሸሪ ዛጋፖ ዩያ ያኦሲ ማሊያ ኬኤዘህኒ ዱኡፖ ዳንቁ፡-

17 «ሃሴኬ ዱኡፓ ፖ ዱኡፒዳይ?» ጌዔ ያኦጩኔ።

ዲማና ቤኤቴኤሌ ዓጮ ዓሳ፡- «ዩሁዳፓ ሙኪ ሃያ ዲንጎ ባኮ ዲንጎ ቤዘይዳ ኔኤኒ ማዳ ባካ ቢያ ኩማንዳህ ኬኤዘ፣ ያኦሲ ማሊያ ኬኤዛ ዓህሲኬ» ጌዔኔ።

18 ዲዮሲያሴ፡- «ዩና ዱኡፓ ዳዖንጎ፤ ሃሹዋቲ፤ ዲዛኮ ማጌያ ቤዛፓ ዓጊያንዳያ ኮይሱዋሴ!» ጌዔኔ።

ዩያሮ ዲዛንታ ሳማሪያ ካታዋይዳ ያኦሲ ማሊያ ኬኤዛ ዓሳንታኮ ማጌያ ቱጊንቲባኣሴ።

19 ካኣቲ፣ ዲዮሲያሴ ዲሰራዔኤሌ ካታዋ ጉቤህዳ ዲሰራዔኤሌ ካኣታ ማዢሲሴ፣ ናንጊና ናንጋ ጎዳኮ ደጎ ዔቁሳ፣ ማሌ ዳራ ፔ ያኦዞ ካኣሽካ ቤዘ ቢያ ሻሂ ባይዘኔ፤ ቤኤቴኤሌይዳ ዲ ማዳ ጎይያማ ዩያቶ፣ ዲንጎ ባኮ ዲንጎ ቤዘ ቢያ ዲማይዳኔ።

20 ዩያ፣ ዲንጎ ባኮ ዲንጎ ቤዘይዳ ማዳ ቁኤሶ ቢያ ዲዚ ዋዳኔ፤ ዩያ ዲንጎ ባኮ ዲንጎ ቤዘይዳ ዓሲኮ ማጌህ ሚቹኔ። ዩያ ቢያ ዲ ማዳሰካፓ ዩራሳላሜ ማዒ ዳንዳኔ።

**ዲዮሲያሴ ዑሃ ዓኣዲያ ቦንቾ ቦንቹህ
(2ያኦሲ. ዓሃኬ 35:1-19)**

21 ካኣቲ፣ ዲዮሲያሴ ያኦሲኮ ጫኣቁዋ ማፃኣፖይዳ ፃኣፒንቴ ጎይያ ናንጊና ናንጋ ጎዳ ማዔ ዔያቶኮ ያኦዛህኒ ዑሃ ዓኣዲያ ቦንቾ ቦንቻንዳጉዲ ዳሮ ዓይህኔ።

22 ዲማ ዲማ ሱኡጋ ዳሮ ዋይህ ዋዳፓ ዓርቃያ ሃይማ ሄላንዳኣና ዲሰራዔኤሌ ካኣቶይዳ፤ ሃሃ ጊንሃ ዩሁዳ ካኣቶይዳ ዓይጎ

23:15 1ካእቶ. ማ 12:33። 23:16 1ካእቶ. ማ 13:2። 23:17 1ካእቶ. ማ 13:30-32።

ካእቲ ዋዳናኣ ማፖም ዩያጉዴ ቦንቾ ዑሣ ዓኣዲያ ኬላ ቦንቹንቲ ቤቁባኣሴ።

23 ዒዮሲያሴ ካእታዳንቲ ታጳ ሳላሳ ሌዖና ዩይ፥ ዑሣ ዓኣዲያ ቦንቾ ዩሩሳላሜይዳ ቦንቹንቲ።

ዒዮሲያሴ ማዳ ሜሌ ባኮ

24 ቄኤሶ ቢያኮ ሱኡጋሢ፥ ሂልቂያ ጌኤዠ ማኣራፓ ዳንቂ ዔኬ ማፃአፖ ጋራ ዓኣ ዋጎም ቢያ ዓይሢንታንዳጉዲ ጌዒ ካእቲ ዒዮሲያሴ ዩሩሳላሜንታ ሜሌ ዩሁዳ ካታሞ ቢያሢፓ ሃይቄ ዓሶኮ ዔኤዠ ዔኤላ ዓሶንታ ዠዋንታ ፔቲ ፔቲ ዓሳ ፔ ማኣራ ያኦዞ ጌዒ ካእቫካ ባኮንታ ሜሌ ዓሳ ፔ ያኦዞ ካእቫካ ሜሆዋ ቢያ ዓጫፓ ባይዜ።

25 ሙሴ ዔርዜ ዋጎም ዓይሢንቲ ጉቤ ዒናፓ፥ ጉቤ ሸምፓፓ፤ ሃሣ ጉቤ ዋልቃፓ ናንገና ናንጋ ጎዳም ማዳይ ካእቲ ዒዮሲያሴጉዴ ዒዛኮ ቤርታኣ ማፖም ጊንፃፓ ጴዲባኣሴ።

26 ዒዚ ዩያ ቢያ ማዳንቲ ካእቲ፥ ሚናኣሴ ማዳ ፑርቶ ማዳ ዛሎና ዩሁዳይዳ ናንገና ናንጋ ጎዳኮ ዔኤቲ፥ ዒጊቻ ዳጋ ዩያ ሄላንዳኣና ሸሚባኣሴ።

27 ዩያሮ ናንገና ናንጋ ጎዳ፡ «ዒሰራዔኤሌይዳ ታ ማዳ ባኮ ቢያ ዩሁዳይዳኣ ዒማይዳንዳ፤ ታ ዋዳንዳይ ጌዔቲ ዩሁዳ ዳር ታ ቤርታፓ ታኣኒ ሸኢቫንዳ፤ ታኣኒ ዶኦ፥ ዩሩሳላሜ ካታሞንታ ሩሱፃ ታኣኮ ዒኢካ ካእቫኪንቶንጉ ታ ጌዔ ጌኤዠ ማኣሮንታ ታኣኒ ሃቫንዳ።» ጌዔ።

**ዒዮሲያሴኮ ካእቱሞ ዋዶ ጋፒንያ
(2ያኦሲ. ዓሃኬ 35:20—36:1)**

28 ካእቲ፥ ዒዮሲያሴ ማዳ ሜሌ ባካ ቢያ ዩሁዳኮ ካእቶ ሃይሳ ፃኣፒንታ ማፃኣፓ ፃኣፒንቲ ዓኣ፤

29 ዒዮሲያሴ ካእታዲ ዓኣ ዋዶና ኔኮ ጌይንታ ጊብፄ ካእቲ ዓሶኦሬ ካእቲ ማኣዳኒ ፔኤኮ ያሎ ዓሶ ዔኪ ዔፕራዒሴ ዋሮ ካሮ ሙኬ፤ ዩያሮ ካእቲ፥ ዒዮሲያሴ ሜጊዶ ጌይንታ ቤሰካ ጊብፄ ካእቲኮ ያሎ ዓሶ ያሊ ማሃኒ ያልዚ ዓርቃያ ዩያ ያሎይዳ ሃይቄ፤

30 ዒዛኮ ዶንዞ ማዔ፥ ቢታንታ ዓኣ ዓሳ ዒዛኮ ሌዞ ሳርጌሎ ያይቶና ጫኣኒ ዔኪ ዩሩሳላሜ ሙካፖ ካእታ ዱኡታ ቤዛ ዱኡኬ። ዩካፓ ዩሁዳ ዓሳ ዒዮሲያሴ ናኣዚ፥ ዒዮሃዜ ዶኦሚ ካእታሣ።

**ዩሁዳ ካእቲ ዒዮሃዜ
(2ያኦሲ. ዓሃኬ 36:2-4)**

31 ዲዮሃዜ ዪሁዳይዳ ካኦታዳኣና ሌዓ ዲዛኮ ለማታሚ ሃይሃኬ፤ ዒዚ ዲማና ዬሩሳላሜይዳ ናንጊ ሃይሃ ዓገሊ ዎይህኔ፤ ዲዛኮ ዲንዳ ሃሙፃሎ ጌይንታያ ሊቢና ካታማ ሾይንቱ፣ ዔርሚያሴ ናይኬ፤

32 ዲዮሃዜያ ዲዛኮ ቤርታኦ ዓድንሢ ማዴ ጎይያ ናንገና ናንጋ ጎዳ ቤርታ ፑርታ ባኦዚ ማዴኔ።

33 ዬያሮ ጊብፄ ካኦቲ፣ ኔኮ ጎይሢ ዲዮሃዜ ዬሩሳላሜይዳ ካኦታዳ ሞጉዲ ሃማቱ ዓጮይዳ ዓኣ ሪቢላ ጎያ ቤስካ ቱኡሲ ማርካ ቱከ፣ ዪሁዳ ዓጮሞ ሃይሃ ሺያና ያይዶ ጻኤታ ኪሎ ማዓ ቢራ፤ ሃይሢታሚ ያይዶ ኪሎ ማዓ ሞርቄ ጊኢሪሾኔ። ዬማ ዲዮሃዜኮ ካኦቱሞ ሞዶ ጋፕንያ ማዔኔ።

34 ጊብፄ ካኦቲ፣ ኔኮ ዲዮሲያሴኮ ናኦዚ ዔኤሊያቄሚ ዲዮሲያሴ ቤዛ ዪሁዳይዳ ካኦታህኔ፤ ዬይ ጊብፄ ካኦታህ ዔኤሊያቄሚኮ ሱንያ ለኣሚ ዲዮዓቄሚ ጌይ ጌህኔ፤ ዲማና ካኦቲ ኔኮ ዲዮሃዜ ዲዒ ዔኪ ጊብፄ ዳንዴሞ ዲኢካ ዲዚ ሃይቄኔ።

**ዪሁዳ ካኦቲ ዲዮዓቄሚ
(2ዎኦሲ. ዓሃኬ 36:5-8)**

35 ካኦቲ ዲዮዓቄሚ ጊብፄ ካኦቲ ኔኮ ያኦጩ ቢርንታ ሞርቆንታ ጩጌኔ፤ ዬያ ዳንቃኒ ዳራ ጊኢራኒ ዳንዳዓሢጉዴያ ጊኢራ ዓሶ ዑፃ ዓጌኔ።

36 ዲዮዓቄሚ ዪሁዳይዳ ካኦታዳኣና ሌዓ ዲዛኮ ለማታሚ ድንጎኬ፤ ዒዚ ዬሩሳላሜይዳ ናንጊ ታጾ ፔቱ ለዔ ዎይህኔ፤ ዲዛኮ ዲንዳ ዜቢዳ ጌይንታያ ሩማ ካታማ ሾይንቱ፣ ፔዳያ ጎያሰኬያ ናይኬ።

37 ዲዮዓቄሚያ ዲዛኮ ቤርታኦ ዓድንሢ ማዴ ጎይያ ናንገና ናንጋ ጎዳ ቤርታ ፑርታ ማዶ ማዴኔ።

24

1 ዲዮዓቄሚ ካኦታዳ ዓኣንቱ ባብሎኔ ካኦቲ፣ ናቡካዳናዎሪ ፔ ያልዚ ዓሲና ሙኪ ዪሁዳ ዓርቄኔ፤ ዬያሮ ዲዮዓቄሚ ሃይሃ ለዔ ዲዛሞ ጊኢራሰካፓ ጊንሣ ሞይዞ ዲጻኔ፤

2 ናንገና ናንጋ ጎዳ ፔኤኮ ዓይሎ ማዔ፣ ዲዛ ማሊያ ኬኤዛ ዓሶ ዛሎና ዪሁዳ ባይዛኒ ኬኤዜህ ኩንህኒ ዪሁዳ ሙኪ ያላንዳጉዲ ባብሎኔ ዓጮ፣ ሶኦሪያ ዓጮ፣ ሞዓኣቤ ዓጮንታ ዓሞኦኔ ዓጮንታ ዲዮዓቄሚይዳ ዔቂሴኔ።

23:34 ዔር. 22:11-12። 23:36 ዔር. 22:18-19፤ 26:1-6፤ 35:1-9። 24:1 ዔር. 25:1-38፤ ዳኣኔ. 1:1-2።

3 ዪሁዳ ዴራ ናንገና ናንጋ ጎዳ ቤርታፓ ሺኢካንዳፖዲ ዬይ ባካ ቢያ ያኦሲ ዓይሠ ጎይያማጉዴያ ማዲንቴኔ፤ ዬይ ማዲንቴሠ ሳኦቴ፤ ሚናኦሲ ማዴ ጎሞ ዛሎናኬ።

4 ሚናኦሲ ጌኤዡ ዓሶኮ ሱጉያ ላኦሊ፤ ዬሩሳላሜ ካታሞ ሱጉሠ ሌሊ ማሠሠር ባሾ ዬይ ባካ ቢያ ማዲንታኒ ዳንዳዔኔ፤ ናንገና ናንጋ ጎዳ ሚናኦሲም «ዓቶንጎ» ጋዓኒ ኮይባኦሲ።

5 ዒዮዓቄሜ ማዴ ሜሌ ባካ ቢያ ዪሁዳ ካአቶ ሃይሳ ፃኦፒንታ ማፃኦፓ ፃኦፒንታ ዓኦኔ፤

6 ዬካፓ ዒዮዓቄሜ ሃይቄኔ፤ ዒዛ ቤዘይዳ ዒዛኮ ናኦዚ፤ ዮዓከኔ ካኦታዳኔ።

7 ባብሎኔ ካኦቴ ዔፕራዒሴ ዎራፓ ዴንዲ ገብፃኮ ኬዳ ዛሎ ዓፎ ዛጳ ሄላንዳኦና ገብፃሮ ማዔ ዓፎ ቢያ ዓርቄሠር ገብፃ ካኦቴንታ ዒዛኮ ያሎ ዓሶንታ ሜሌ ዓፎ ማይ ዴንዲ ያለባኦሲ፤

**ዪሁዳ ካኦቴ ዮዓከኔ
(2ያኦሲ. ዓሃኬ 36:9-10)**

8 ዮዓከኔ ዪሁዳይዳ ካኦታዳኦና ሌዓ ዒዛኮ ታጳ ሳሊኬ፤ ዒዚ ዒማና ዬሩሳላሜይዳ ናንገ ሃይሠ ዓገኒ ዎይሠኔ፤ ዒዛኮ ዒንዳ ኔሁሽታ ጌይንታኔ፤ ዒዛኮ ዓዴ ዬሩሳላሜይዳ ሾይንቴያ፤ ዔልናኦታኔ ጌይንታያኬ።

9 ዮዓከኔያ ዒዛኮ ዓዴ ማዴ ጎይያማ ቢያ ባኮ ማዲ ናንገና ናንጋ ጎዳ ያዪሴኔ።

10 ካኦቴ ናቡካዳናያሬኮ ያሎ ዓሶ ሱኡጋ ዔኪ ሙኬ ባብሎኔ ዓሳ ዬሩሳላሜ ያሊ ማንገ ዓርቄሠር ዬይ፤ ዮዓከኔ ጎያሠ ካኦታዲ ዓኦንቴኬ።

11 ዬሩሳላሜ ማንገንታ ዓኦንቴ ናቡካዳናያሬ ፔ ቶኦኪና ዒኢካ ሙኬኔ፤

12 ዒማና ካኦቴ ዮዓከኔ ፔኤኮ ዒንድንታ ዒዛኮ ድንዘ ማዔ ዴኤፖ ዴኤፖ ሱኡጎንታ ያሎ ዓሶ ሱኡጎንታ ቢያ ዎላ ሙኪ ባብሎኔ ዓሶም ኩቺ ዒንጌኔ፤ ናቡካዳናያሬ ካኦታዴዎ ሳላሳ ሌዎና ካኦቴ፤ ዮዓከኔ ዓርቄ ዔኪ ቱኬኔ፤

13 ጌኤዡ ማኦርና ካኦቱሞ ማኦርናይዳ ዓኦ ባኮ ቢያ ናቡካዳናያሬ ጋፒሲ ዔኪ ባብሎኔ ዴንዴኔ። ቤርታ ናንገና ናንጋ ጎዳ ኬኤዜ ጎይያ ካኦቴ፤ ሱሎሞኔ ያኦሲኮ ጌኤዡ ማኦርም ኮሺሴ ዎርቆና ሚዛጲሶና ሚሆ ጉቤ ሚንሠኔ።

14 ናቡካዳናያሬ ዬሩሳላሜ ዓሲንታ ካኦቴኮ ድንዘ ማዔ፤ ዴኤፖ ዴኤፖ ሱኡጎንታ ሜሌ ዴኤፒ ዴኤፒ ጌይንታ ዓሲንታ ቢያ ዎሊ ዑፃ

24:12 ዔር. 22:24-30፤ 24:1-10፤ 29:1-2።

ታጾ ሺያ ዓሲ ዲዒ ዔኪ ዴንዴኔ፤ ዬያቶ ዓሶና ዎላ ኩቸና ዔኤቢ ማዢ ዔራ ዓሲንታ ዓንገ ዲዒ ዓሲንታ ቢያ ዔኪ ዴንዴኔ፤ ዒዚ ዬሩሳላሜይዳ ጋፒንሢ ማንቆ ማዔዘንሢ ሌሊ ሃሼኔ።

15 ናቡካደናዖሬ ዮዓኪኔ ዓርቁ ቱኪ ዒዛኮ ዒንደንታ ላኣሎንታ ዒዛኮ ደንዞ ማዔ ሱኡጎንታ ዩሁዳይዳፓ ዴኤፖ ዴኤፖ ዓሶንታ ዎላ ቢያ ዔኪ ባብሎኔ ዴንዴኔ።

16 ባብሎኔ ካኣቲ ዖልዚ ዖላኒ ዳንዳዓ ላንካይ ሺያ ዓቲንቁ፤ ዬያጉዲ ሃሃ ዓንገ ዲዒ ፔቴ ሺያ ዓሲንታ ኩቸና ዲማ ዲማ ባኣዚ ኮሻ ዓሲ ዔኪ ባብሎኔ ዓኣዴኔ።

17 ናቡካደናዖሬ ዮዓኪኔ ቤዛ ማታኒያ ጌይንታ ዮዓኪኔኮ ዓዶ ዒሾ ዩሁዳይዳ ካኣታሃዖ ሱንዖ ዒዛኮ ሴዴቂያሴ ጌይ ጌሢኔ።

ዩሁዳ ካኣቲ ሴዴቂያሴ
(2ዖኦሲ. ዓሃኬ 36:11-12፤ ዔር. 52:1-3)

18 ሴዴቂያሴ ዩሁዳይዳ ካኣታዳኣና ሌዖ ዒዛኮ ላማታሚ ፔቴኬ፤ ዒዚ ዬሩሳላሜይዳ ናንገ ታጾ ፔቴ ሌዔ ዎይሢኔ፤ ዒንዳ ዒዛኮ ሃሙዓሎ ጌይንታ፤ ዒዛኮ ዓዴ ሊቢና ካታማ ሸይንቴያ፡ ዔርሚያሴ ጎዖሢከ።

19 ዒዮዓቆሜ ማዴ ጎይዖ ሴዴቂያሴያ ናንገና ናንጋ ጎዳ ቤርታ ፑርታ ማዶ ማዴኔ።

20 ዬያሮ ናንገና ናንጋ ጎዳ ዬሩሳላሜና ዩሁዳ ዴሮናይዳ ዳጋዲ ፔ ቤርታፓ ዔያቶ ሺኢሹኔ፤ ሴዴቂያሴያ ሃሃ ባብሎኔ ካኣቲሞ ዎይዞ ዒዳኔ።

25

ዬሩሳላሜኮ ሞርኮ ኩጫ ዓዲንቲዖ
(2ዖኦሲ. ዓሃኬ 36:13-21፤ ዔር. 52:3-11)

1 ዩካፓ ናቡካደናዖሬ ፔኤኮ ዖሎ ዓሶ ቢያ ዔኪ ሴዴቂያሴ ካኣታዴንቴ ታዘጳሳ ሌዖና ታጳሳ ዓገኖኮ ታጾ ማዓ ኬሎይዳ ዬሩሳላሜ ዖላኒ ሙኬኔ፤ ዒማና ዬይ ፖኦሊሳ ካታሞኮ ዓጮ ማንገ ዲንካዖ ዓጪ ኩሊ ዎርዲ ዴዔኔ፤

2 ሴዴቂያሴ ካኣታዴንቴ ታጾ ፔታሳ ሌዖ ሄላንዳኣና ዬሩሳላሜ ካታማ ማንገንቲ ዴዔኔ፤

24:15 ሂዚ. 17:12። 24:17 ዔር. 37:1፤ ሂዚ. 17:13። 24:18 ዔር. 27:1-22፤ 28:1-17። 24:20 ሂዚ. 17:15። 25:1 ዔር. 21:1-10፤ 34:1-5፤ ሂዚ. 24:2።

3 ዒዛ ሌዎኮ ያይዳሳ ዓገና ታዘጸ ኬሊ ማዓኣና ናያ ዓሶ ባሺ ደዳሣረ ዳራ ሙዖንዶ ባኣዚ ባይዜኔ።

4 ዒማና ባብሎኔ ዓጮ ፖኦሊሳ ካታሞኮ ዙሎ ማንገሊ ዓኣንጌ ጸሁዳ ካኣቲኮ ፖኦሊሳ ዲማ ካታሞኮ ዙሎ ኬልቂ ዲርቆና ዲያ ዳርዘያ ቶሊ ኬሰኪ ዴንዴኔ፤ ዬይ ፖኦሊሳ ላምዖ ዲያ ዎላ ካኣማ ቤዘይዳ ዓኣ ካርና ኬሰኪ ካኣቲኮ ዲማ ዲማ ባኮ ቱኮ ጎዡ ባንሣ ዴንዳ ጎይያና ፑኒ ዴንዴኔ።

5 ባብሎኔ ዓጮኮ ያሎ ዓሳ ጋዓንጌ ሴዴቂያሴ ደውሲ ዴንዲ ዒያርኮ ኮይላ ዓኣ ቦኦሎይዳ ዓርቄኔ፤ ሴዴቂያሴኮ ፖኦሊሳ ዒማና ዒዛ ሃሺ ጳሽኬኔ፤

6 ዬያር ፖኦሊሳ ሴዴቂያሴ ዔኪ ሪቢላ ካታሞይዳ ዓኣ፣ ናቡካዳናያሬ ኮይላ ዴንዴኔ፤ ዒኣካ ዒዛይዳ ማዲንታንዳ ባኮ ናቡካዳናያሬ ዎጌኔ፤

7 ዎዎዴይ ጌዔቴ፡- ሴዴቂያሴኮ ዓኣፓ ዛጋንጌ ናኣታ ዒዛ ቤርታ ሹኪንጌኔ፤ ዒዛኮ ዓኣፖዎ ዎቂ ኬሲ ዓኣፒ ባይቂ ዓሲ ዒዛ ማሄኔ፤ ካኒ ቢራታናኣ ኩጮ ዒዛኮ ቱኪ ዔኪ ባብሎኔ ዴንዴኔ።

ጌኤዡ ማኣርኮ ሻሂንጌያ
(ዔር. 52:12-33)

8 ናቡካዳናያሬ ባብሎኔይዳ ካኣታዴንጌ ታጳ ታዘጸሳ ሌያና ደንጋሳ ዓገኖኮ ላንካሳ ኬሎይዳ ናቡዛርዳኣኔ ጌይንታያ ናቡካዳናያሬ ካፓ ፖኦሊሶ ሱኡጌሰኬይ ዬሩሳላሜ ሙኬኔ።

9 ዒዚ ዒማና ጌኤዡ ማኣርንታ ካኣቱሞ ማኣርንታ ዬሩሳላሜይዳ ናንጋ፣ ዴኤፖ ዴኤፖ ዓሶኮ ማኣርንታ ካታሞይዳ ዓኣ ማኣር ቢያ ታሚና ሚቹኔ፤

10 ካኣቲ ካፓ ፖኦሊሶ ዓይሣሣ ዔኪ ሙኬ፣ ባብሎኔ ፖኦሊሳ ቢያሣ ዬሩሳላሜኮ ዙላ ዓኣ ኬኤሎ ዲያ ሻሂኔ፤

11 ዬካፓ ዬይ፣ ናቡዛርዳኣኔ ጎያሣ ካታሞይዳ ዓቲ ዓኣ ሜሌ ዓሶ፤ ዬያጉዲ ሃሣ ባብሎኔ ዓሶሞ ኩቹ ዒንገሊ ዓኣ ዓሶዎ ዔኪ ባብሎኔ ዴንዴኔ፤

12 ጋዓንጌ ዒዚ ዒማና ፔቴታያ ዔኤቢባኣ ማንቆ ዓሳ ቱኮ ባኣዚ ቱኪ፣ ጎሺያ ጎሺኪ ናንጋንዳጉዲ ጸሁዳ ዓጮይዳ ሃሺ ዴንዴኔ።

13 ባብሎኔ ዓሳ ጌኤዡ ማኣርይዳ ዓኣ ሞኦኖ ዓንጎ ቱርቱርንታ ሺራ ቶኪ ዓኣያ፣ ማሆ ጌሃ ባኮንታ ሞኦኖ ዓንጎና ኮሾና ዎኣያ ዴይሃ ዴኤፖ ዶኦላሣያ ማንሣኔ፤ ዬያ ሞኦኖ ዓንጎ ቢያ ዔኪ ባብሎኔ ዴንዴኔ።

25:4 ሂዚ. 33:21። 25:7 ሂዚ. 12:13። 25:13 1ካእቶ. ማ 7:15-26፤ 2ዎኦሲ. ዓሃኬ 3:15-17።

14 ዔያታ ዒማና ሺልዓ፥ ታሞ ካኣሾ ባካ፥ ዲቢንዖ ቆንቾ ባካ፥ ዐንጅ ጌሆ ባኮንታ ሞኦኖ ዓንጎና ኮሺንቴ ጌኤዡ ማኣራ ማዲንቶ ማሆንታ ዔኬኔ።

15 ጌኤሺ ዋርቁና ቢራ ዓንገና ኮሺንቴ ታሞ ጩቢሾ ባኮንታ ፑጮ ባኮ ፑጮ ዔቶ ሳኣኖንታ ዔኪ ዴንዴኔ።

16 ካኣቲ ሴሎሞኔ ጌኤዡ ማኣሮሞ ኮሺሴ ላሞዖ ቱርቱሮንታ ሺራ ቶኮና ዓኣ ማሆ ጌሆ ባኮንታ ዋኣዖ ዴይሆ ዴኤፖ ዶኦላሢንታ ዴኤሠሞ ዓኣሢሮ ዔሮ ባኮና ዛገ ዔራኒ ዔያታ ዳንዳዒባኣሴ።

17 ፔቴ ፔቴ ቱርቱራ ታጳ ሳሊ ዋዳ ማዔኔ፤ ቶኦካ ሙሰኩሉ ማሊሲ ሞኦና ዓንገና ኮሾናይ ዓኣኔ፤ ዬያ፥ ሙሰኩሉ ማሊሲ ኮሾና ባኮኮ ዔጳ ሃይሆ ዋዳኬ፤ ዬያ ባኮኮ ዓጮ ሺርሺ ሮኦጩ ማላያ ኮሾና ባኮይዳ ሮኦማኣኔ ጌይንታ ሚዖ ዓኣፖ ማላያ ኮሺ ጌሆና ባኣዚ ዓኣኔ።

**ዪሁዳይዳ ናንጋ ዓሳ ዲዒንቲ ባብሎኔ ዔውቴሢ
(ዔር. 52:24-27)**

18 ዖሎ ዓሶ ዓይሣሢ፥ ናቡዛርዳኣኔ ቄኤሶ ቢያኮ ሱኡጋሢ ሴራያንታ ሴራያኮ ሂሊ ዴማ ማዒ ማዳ ቄኤሳሢ ሶፖንያሴንታ ጌኤዡ ማኣሮ ካፓ፥ ሃይሆ ዓሲሰኬንሢያ ዎላ ቱኪ ዔኪ ዴንዴኔ፤

19 ካታሞ ፖኦሊሶኮ ሱኡጌ ማዔ ፔቴ ዓሲሰኬያንታ ዬማ ሄላንዳኣና ዬኖ ካታሞይዳ ካኣቲኮ ደንዘ ማዒ ዘራ ደንጎ ዓሲሰኬንሢያንታ ዬኖ ዓጮ ዴሮፓ ዖሎ ዓሶ ዶኦሪ ዶኦሪ ኬሳ፥ ፖኦሊሴ ሱኡጌሰኬያንታ ማሌ ላሂታሚ ዓሲያ ዎላ ዔኪ ዴንዴኔ፤

20 ናቡዛርዳኣኔ ዬያቶ ዓሶ ቢያ ዔኪ ሃማቴ ዓጮ ጋራ ዓኣ ሪቢላ ካታማ ናንጋ ባብሎኔ ካኣቲ ኮይላ ዓኣዴኔ፤

21 ካኣቲ ዬያ ዓሶ ዒኣካ ጳርቂሲ ማታሲ ዎዲሼኔ።
ዬያይዲ ዪሁዳ ዴራ ፔ ዓጫፓ ዲዒንቲ ዔውቴኔ።

**ጌዳሊያ ጎዖሢ ዪሁዳ ዓጮ ዎይሣሢ
(ዔር. 40:7-9፤ 41:1-3)**

22 ባብሎኔ ካኣቲ ናቡካዳናዖሬ ሳፓኔኮ ናኣዚ ናዖ ማዔሢ፥ ዓሃቃሜ ናኣዚ፥ ጌዳሊያ ዲዒንቲ ባብሎኔ ዔውቴዎዖ ዓቴ ዴሮኮ ቢያ ሱኡጌ ማዒ ዪሁዳ ዓጮ ዎይሣሞ ዶኦሬኔ።

23 ዒማና ኩጮ ዒንገባኣዖ ዓኣ ዪሁዳ ዓጮኮ ፖኦሊሶ ሱኡጎንታ ፖኦሊሶንታ ባብሎኔ ካኣቲ ጌዳሊያ ዶኦሪ ዓጮይዳ ሱኡጋሴሢ ዎይዛዖ ሚዒጳ ሙኪ ጌዳሊያና ካኣሚኔ፤ ዬያታ ዖሎ ዓሶኮ ሱኡጋ፡-ኔታኒያ ናኣዚ ዒሰማዔኤሌ፥ ቃሬሃ ናኣዚ ዮሃናኔ፥ ታንሁሜቴ ናኣዚ

25:14 1 ካእቶ. ማ 7:45፤ 2ዖኦሲ. ዓሃኬ 4:16።

ሴራያ ጌይንታያ ኔፃፓ ካታማ ሾይንቴሢንታ ማዒካ ካታማ ሾይንቴ
ዛኒያንታኬ፤

24 ጌዳሊያ ዔያቶና ዔያቶ ፖኦሊሶናም፡- « ብብሎኔ ዓጮኮ
ቢታንታ ዓኣ ዓሶ ዛሎና ዒንሢዳ ሄላንዳ ባኣዚ ዓኣኔ፤ ጌዒ ዒንሢ
ዒጊጩዋጉዲ ታ ዒንሢም ጫኣቃኔ፤ ሃሮ ሳፆይዳ ዴዒ ናንጉዋቴ፤
ብብሎኔ ካኣቲም ጊኢሩዋቴ፤ ዒንሢ ዬያይዴቴ ቢያ ባኣዚ ዒንሢም
ጊኢጋንዳኔ» ጌዔኔ።

25 ጋዓንቴ ዬሮ ሌዎኮ ላንካሳ ዓጊኖና ካኣቲ ዜርሢ ማዔሢ፡
ዔሊሻማዔኮ ናኣዚ ናፆ ማዔሢ፡ ኔታኒያ ናኣዚ፡ ዒሰራማዔሌ ታጾ
ዓሰና ዋላ ሚዳጾ ዴንዴኔ፤ ዒኢካ ዴንዳፆ ፆልዚ ቡሊ ጌዳሊያ
ዋዴኔ፤ ሃሣ ዒዛና ዋላ ዓኣ ዒሰራዔኤሌ ዓሶንታ ብብሎኔ ዓሶንታ
ቢያ ዋዴኔ፤

26 ዬያሮ ብብሎኔ ዓሶ ዒጊጩ ዒሰራዔኤሌ ዓሶኮ ፆርጎጮንታ
ማንቆ ማዔ ዓሶንታ ፔኤኮ ፖኦሊሶ ሱኡጎንታ ዋላ ፔቴይዳ ዔቂ
ጊብፄ ዓጮ ቤቴኔ።

ዮዓኪኔኮ ቱኡዛፓ ቡሊንቲፆ
(ዔር. 52:31-34)

27 ዮርማሮዴቆ ዔዊልማሮዳኬ ጎፆ ዓሣሢ ብብሎኔይዳ ካኣታዴ
ሌዎና ዬሁዳ ካኣቲ፡ ዮዓኪኔ ቱኡዛፓ ቡሊ ጉሪ ሃሼኔ፤ ዬይ ያዲ
ማዔሢ ዮዓኪኔ ቱኪ ዲዒ ዔኮናንቴ ሃይሢታሚ ላንካሳ ሌዎኮ ታጾ
ላምዓሳ ዓጊኖ ላማታሚ ላንካሳ ኬሎናኬ።

28 ዔዊልማሮዳኬ ዒማና ዮዓኪኔም ኮሺ ባኣዚ ማዴኔ፤ ዒ
ዋዋዴይ ጌዔቴ፡- ዒዛጉዲ ዲዒንቲ ዔውቲ ብብሎኔይዳ ናንጋ ካኣቶ
ቢያፓ ቦንቸንታ ዴኤፒ ቤሲ ዒዛም ዒንጌኔ፤

29 ዬያሮ ዮዓኪኔ ቱኡዛ ማኣራ ዓኣፆ ማይንታ ማኣዓሢ
ላኣሚ፡ ዴንዲ ዒዚ ሃይቃንዳያ ሄላንዳኣና ካኣቲ ሙዓ ሙፆ ዋላ
ሙዓንዳጉዲ ዒዛም ዓይሢንቴኔ፤

30 ዒዚ ናንጌ ዋዶ ቢያይዳ ቢያ ኬሊ ዓይጎ ባኣዚማኣ ማፆም
ኮይሳ ባኣዚኮ ዒዛም ዒንጊንታ ባኣዚ ዓኣኔ።

ጌሌዢ ማጻሕፍት
The Holy Bible in the Maale language of Ethiopia,
using Ethiopic script

copyright © 2008 The Word for the World International and The Bible Society of Ethiopia

Language: Maale (Male)

Translation by: The Word for the World

Contributor: Bible Society of Ethiopia

ጌሌዢ ማጻሕፍት

Maale Full Bible

The Word For The World International

Bible Society of Ethiopia

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

PDF generated using Haiola and XeLaTeX on 13 May 2025 from source files dated 13 May 2025

bbcfb90a-3ae3-5452-983d-6c4c02375929